



秀水王仲瞿著

樓文集
煙霞萬古

樸華居士題



嘉慶廿一年孟冬之
月刻于虎丘東山廟

故孝廉王君仲瞿奇才也嘉慶二十一年七
月嘗偕余遊雲臺山同客海州刺史師禹門
幕中者三閱月仲瞿之學無所不窺而尤工
於駢體直可壓倒齊梁余戲題其詩文藁後
云斗牛之光芒角四起河海之水縱橫萬里
似戰國策亦韓非子二千年來無此才矣或
又謂仲瞿之作真如決汝漢淮泗而注之江
合金銀銅鐵爲一鑪者也仲瞿好游俠兼通
兵家言善弓矢上馬如飛慷慨悲歌不可一
世嘗謂余曰吾死後必葬我於虎邱短簿祠

側乞題一碣曰晉故散騎常侍東亭侯五十
三世孫王曇之墓其好奇如此嗚呼惜哉平
生著作甚多有經解三卷史論三卷西夏書
四冊洪範五事官人書五類未分卷歷代神史
一百卷仿班固漢書例居今稽古錄二十卷讀竺貫
華三十卷繙帑集一百卷傳家六法一卷隨
園金石考四冊烟霞萬古樓文集四十四卷
計散體六卷四六文六卷本集十六卷外集
十六卷又歸農樂傳奇九齣玉鉤洞天傳奇
四十八齣萬花緣傳奇四十八齣遼蕭皇后

十香傳奇十二齣魚龍嬰傳奇四十八齣俱
未刻僅刻駢體文六卷亦殘闕矣俟見原藁再當補全
仲瞿既歿之二十載余始集其文而傳之爲
述大略如此道光十有八年孟夏句吳錢泳
書時年政八十



先友王君仲瞿生前嘗刻其駢體文數十篇於禾中旣而置之散佚過半君旣歿垂二十年友人錢君梅溪求得補之作序以行於世因將歸虞山以刊本附余吳門書局余因更補其缺佚者數篇今年又爲刻其遺詩於繁昌付刻工湯生晉苑攜歸吳門併存之王君邃於史及諸子百家之集又精通乾竺之學故其爲文奇古奧博俾讀者如讀淮南呂覽又如入琅嬛委宛所見皆上古之書故其文非近世駢儷家所及求之古人亦罕其匹抱奇才而抑鬱以終是可惜也君嘗欲爲余注碧城仙館詩又嘗以秘籍數百卷效蔡邕王粲故事貽余子裴之裴之繼君逝亦十五六年矣而君之文錢君與余哀輯而梓行之錢君於君不愧范張嵇阮而桓譚著論敬禮定文余得幸從錢君後以盡朋友後死之責以畢生平未竟之志亦足以告君於九京矣

既以自慰並以告後之讀君文者書付湯生卽以爲序
道光二十年庚子九月錢唐陳文述書於春穀官舍

煙霞萬古樓結集自序

太元之草成而劉歆欲覆醬瓿三都之賦出而士衡欲蓋酒甕
同是時也桓譚以爲絕倫張華爲之紙貴豈文無定體嗜痂者
有異癖雙眇者多一目歟李百藥曰文章者性情之風標神明
之律呂也張融自序曰吾文章之體多爲世人所驚又曰文豈
有常體丈夫何至因循寄人籬下裴子野論文曰人皆成於手
吾獨成於心北齊祖瑩亦語人曰文章須自出機杼成一家風
骨何能共人生活哉讀劉勰之雕龍不如通摯虞之流別讀鍾
嶸之詩品不如追韓嬰之傳說見其委海若天吳見其原岷觴
積石統四千年之文爲一文觀合四千年之詩爲一詩釋而古
今詩與文之正變洞然胸中矣法律一新如曹參守蕭何之文
旌旗一變如光弼將子儀之軍非謂師涓奏樂必造新聲徐摛

作文不拘舊體也。或曰：延年隘薄靈運，空疎爲之，奈何？曰：此不盡讀天下之書與詩文而漫然操觚之謂也。漢郭憲、王嘉全搆虛辭，孟堅所以致譏；張華爲之絕倒，抱朴子所謂懷空抱虛，有似蜀人葫蘆之喻乎？南史氏曰：文章容易，逋峭難。又曰：文章不斌媚，正如疥駱馳。今世之勉力宏詞者，班馬奇字，白孔陳羹，華林類苑，疊韻雙聲，驟焉而蘇綽大誥，忽然而王莽金滕，著淵通以擬道德，仿太元而作測靈，以艱深文其淺陋，以奇險幸其功名揚雄，以爲曉曉之學，繡其鞶悅而目之爲翰林主人者，非也。亦有好事焉者，鑄賈島而拜像，東坡而祀蜜膏，飲杜少陵之灰，遍體刺白香山之字，老兵之貌，中郎優孟之學，期思高冠大屐而自居某一家之詩與文者，悖矣。氣水也，言浮物也。袁先生曰：重而能行，乘萬斛舟重而不行；猴騎土牛，水浮而物之浮者大。

小畢浮不然而任昉、沈約，結其集，魏收、邢邵爲之偷斯文之末流也。鼻馬、頰牛之論，中軍聽之而生爭，搗齏、嗽杵之談，洗馬思之而成病。則又斯文之魔業，翰墨之魔境。至若宏通、碩彥、經師、大儒、鄭玄之文，通人不取；溫公之筆，四六不能。此不可以辭章律之者，其經濟大也。樂旨、潘詞、廣談、虞筆，二千年以下兼而有之者，繫何難哉？予髫幼成文，中年萬里經史爛於胸中，雲山亂於脚底，自以爲才學識皆當有也。乃志功名急經濟，遭臺官之禍，纂述之成書者，經史之論辨者，樂府之未諧，宮商金石之未付，雕鐫者吳中郡縣官持抱以去，而摯仲治半世之文書蕩然矣。並非關通，丁謂之書而概與一燒，亦不借重洪喬之寄而投之江底，此砥柱之沉，災榮宮之火，洗當時也。郭子橫之救火，任文公之逃水，何暇計及著與撰之存焉否耶？幸而王陽燹道險。

路求生韓愈華山危途獲濟或藏之股浩手巾或寄之王恭如意主人莊子僅畱漁父殘篇中書孝經惟剩王混摘句抑不啻嵩山蚪斗之文顯節陵中之蠹也已竊惟彥章死豹名以皮畱楚國神龜生以骨貴而乃陸澄著述力已倦於經年任昉屬辭才將盡於晚歲五行志少尚可暗抄三篋書亡多難默背憶當日十吏環書五題岔集門庭瀋溷盡是賦才戶牖門牆無非刀筆沈慮而王充爲之氣衰苦思而桓譚爲之感疾見楊汝士蘭亭金谷元白無詩聞孟浩然疎雨微雲中書罷唱議禮經則白虎堂中講論語則金華殿上何其壯也無谷子雲之筆而空有樂令之口無揚子雲之才而徒有光庭之手開頃刻之花造逡巡之酒斯文之道有急就章乎蘇明允之詩祇有廿篇杜子美之賦不過十首片羽苟重其吉光千金可享其敝帚僕今年四

十五歲矣前不遇古後不遇今死不見峴首沈碑英雄墮淚生不見阿難結集活佛傷心李旭曰文章之事不足傳於後世蕭恭亦曰千秋而後亦復誰能傳此嗚乎未爲傖父已笑衙官纔讀離騷便稱名士劉季緒才非一世偏能誹毀文章徐孝穆一代傳人未嘗譏訶作者畱達生廿四首丈人之集娛我餘年傳枚臯數十篇必不可讀之文自傷嫫詆哀我文者亦庶幾躋我言而恕我狂也

煙霞萬古樓文集卷一

穀城西楚霸王墓碑

秀水王曇

神瞿氏

一名良士

乾隆五十九年觀察泰武臨兵備督山東全省糧運前守濟南
泰安府知府長洲宋思仁繕畢泰山馳道種補天門上下長松
溝泄穀城水利遂封樹於西楚霸王之墓周方一畝土階三等
屬其友人王曇為文

惟王廡馬祥車月矢日弓臨汝江陽之戰吳興廳事之中一牛
醜血百騎騰風王何神於蘇侯蔣帝而不神於蕭琛孔恭臣知
王魂安卞山死羞魯公也王以漢五年葬穀城魯生制服漢王
臨哭嶽抱峯藏汶回隧曲談書遷筆曾經史例三皇五帝楚書
本紀作者謂有大王之江東八千子弟有孔子之廟堂車服禮



器。佞臣班固竇憲筆奴爲葉公龍爲史公猪沈魂狴犴置書葫
蘆臣知大王不愛平分之天下而忍殺手版之腐儒哉而竊爲
大王幸幸王不葬橐泉雍宮祈年豕驪麓陰盤藍田魚膏照尸
亡羊燒山臣竊笑漢皇帝長陵坏土高廟玉環呂后淫屍赤眉
入關而王陶人茅馬紙衣瓦棺斥上無將軍之金復土無校尉
之官南山鐵固石槨泥丸臣竊笑漢子孫茂陵原陵闕地及泉
園郎寢郎邑瓦無烟玉衣出柙文園盜錢作昌陵便房方中斲
紵絮陳漆其間校尉摸金而入鑿郎將發邱而破穿而大王佳
城鬱鬱萬鷲銜泥羣鳥耘田壽於櫟陽萬年也羸趙毒螫陳田
淫虐王燒秦宮室夷齊城郭復春秋九世之讐報戰國六王之
惡食教倉戰京索方將斬紵而自王何云入關而背約宋義走
卒項氏遁將背武信而沮援誑高陵而賺賞陽將楚軍陰爲齊

相幸君之敗不忠居軍之右不讓搏牛破虱之談驕一軍而跋
扈猛虎貪狼之令殺諸將如反掌王不斬莊賈難爲穰苴不戮
揚干誰爲魏絳牧奴孫心芻狗兒戲義非孤注名類奕棋如陳
涉之號扶蘇原非太子或陽虎之竊狀貌聊借蒙魑楚方借面
而弔喪心乃尸居而餘氣飾箏琶之爪者義甲髡禿婦之髮者
義髻擁之則爲懷王去之則爲義帝曰取則取曰廢則廢大王
方端冕以禮犧鷄祝宗以拜牢龜而敢肩尻乎雕俎之上縞素
乎三軍之士者漢王之詐也榮仇不封餘去無功王諸將善地
則忠王故王醜地則公漢方佩我關中之印而紆我三秦之盟
樓煩則嗔楊喜則驚質淫雉於軍中不御置太公於高俎不烹
鴻門不殺鴻溝不爭而漢敢劫兵以犯我彭城漢爲魚肉楚爲
刀俎智不鬪睢水流力不伏廣武弩虜魏王不仁梟塞王不武

滎陽西拔靈壁東破怯則銷六國印懼則說九江布張良如廁始爲逃人紀信乘車終爲降虜漢之十罪臣不屑數也爲天子不忠報漢以梧羹分之太公爲天子不仁報漢以姬骨醉之戚夫人爲天子無禮報漢以不類如意之惠帝爲天子無義報漢以慙不可言之審食其擁帚不孝頡羹不弟墮二子車不慈死一婦手不智而大王七十戰之功十七王之封亘六帝四王而無窮也宛邱太皞濮陽高辛黃帝橋山唐帝穀林九疑舜豕苗山禹墳湯無葬處或曰汾陰衡山二妃鮒魚九嬪虞則烏江王則穀城臣謹案殷人以柏夏氏以松將軍之樹大王之風銘曰盤古葬魂大王葬身魂爲雷霆身爲風雲皮毛爲草木髮髭爲星辰頭爲東嶽左臂爲衡足爲西嶽右臂爲恒喜爲晴怒爲陰精髓爲玉齒骨爲金江河其血地里其筋眼爲日月蛆蟲爲黎民三百里海南之墓周一畝大王之墳

班固父子之廢項王本紀微特王之罪人亦孔子之罪人也滅六國燔六經項不滅秦而魯之廟堂車服禮器有存焉乎魯諸生爲王三年服城守不下尊孔也非私項王也司馬遷以項王功高故加於孔子世家之上而進之三皇五帝殷周之後固何人斯而黜王本紀宜其狴犴瘦死而王之神靈亦於是乎喑啞咤叱三百年於吳興之堂矣漢章帝以班固爲葉公龍鄭漁仲以固之比遷如龍之與猪其信然歟是碑作於二千餘年之後蓋斷自二千餘年以來無此手筆

東臯寶光

蠟磯孫夫人廟碑

蠟磯有廟俗相傳爲吳大帝妹孫夫人殉蜀主白帝崩聞以黃武三年薨於此吳書簡略夫人與全公主大小虎無傳失春秋內女致聘歸寧卒媵之例案蜀志進妹固好不紀年月大致在建安十三年十二月赤壁破魏蜀主牧荊州之十四年春婚於京也吳后傳先主旣得益州而孫夫人還吳亦不明叙所以還吳之故則法正已進瑁妻吳氏於宮舟船之迎夫人見幾作也是歲爲二十年權襲取長沙三郡分畝連和之日可想見蜀主與夫人遷豆同牢七年主祭矣陳壽所以有綢繆恩紀之筆也廟無石吳不知夫人之德史無文蜀不知夫人之仁於是懲裴松之失以補史官曰

某聞殺龍蛇以祀川岳者勾踐之獻美人也遇嫦娥以筮有黃

者成湯之嫁帝妹也。權之壻備讐，非塞庫必無贖。目喉宜生之謀，事類師昏亦斷不作。反斗擊代王之計，大意謂吳蜀不爲一家，則一鼎三足不立，東西不主，二帝則一槽三馬，難平。周郎之意，以爲婚姻者，春秋之王道也。縱橫者，戰國之長城也。橋公二女皆嫁英雄，破虜四男尙無佳壻。孫夫人之侍婢，弓刀亦猶甄夫人之借兄筆硯也。何也？破虜天下豪也，夫人將門子也，親見皇甫夫人以文武忠臣之妻死，刀圍而罵董卓，蔡文姬以徒行乞命之身，跌蓬首而拜曹公，生女如鼠，強臣若虎，峴山之父仇未報，小女不敢反。龐娥之兵許貢之兄，雛未洩女弟不能釋姊。嬖之仗此，所以逐馬褰裘，翔鷗鳴鏑，大眼戎粧，小妹雍容，追隨於猢猻家，兄之馬後，而史以爲驕豪多將，吳吏兵者過也。女子母教也。吳夫人助桓王軍，國疇不知訓，井家風大。皇帝愛趙母。

文才况又有官中師傅，是蜀中三尺童子皆知夫人文武兼資，禮義足智矣。而法正佞人也，賊舊君以賣國調新主，以瀆倫瑁。妻吳漢中王之宗婦人也，時也闕巖道，銅梁祭武，擔石鏡夫人。方將媾補漢天，夔鳴炎鼓，張錦繖以定羌涼，持赤節以平懿丕。而王已隗囂，天水子陽，白帝坐大之勢，未安楠木之心，遂蕩伯明，就后羿之室，闔廬居子建之宮，謂鄭多父，貪鄩國，夫人利其土地，則吳非小君，謂晉文公，暱子圉，懷羸，感其沃盥，則吳豈秦援，姐已以賜周公，曹操之所不收，寡婦何知社稷，孫后以爲可笑。此習鑿齒所謂匹夫猶惡無禮惡法，正惡漢王也。夫人剛猛人也，無鹽薦枕不取，娛於好色之齊王，嫫母清宮徒見忌於無情之黃帝，勢將醉餽，唐姬則烈女不能事亡國，婦人將麋爛望卿，則高明又必失中宮大度，與其椒房散號，口戰銀刀，左右英。

娥心寒粉陣使漢中王束帶自稱下官耳順強呼娘子芒刺在背交戟入頸以魚水夫妻爲戎狄以酣睡臥榻爲他人外揚高帝幃簿不脩之名內彰孝文衽席無辨之醜穆姜且豫卜東宮雲臺亦自疑霧露威貓呂鼠勝負未可知也呼阿斗而告曰深山大澤余恐生龍蛇以禍汝也善事漢王不暇刺促顧婢子語矣於斯時也腸繞吳門魂啼蜀鳥夫人行矣某獨笑趙子龍官官也左轂鳴則雍門狄爲之請死矣樓船御則薛廣德爲之頸血矣雲無張良能羽翼太子之功而有蓬越實亡君夫人之罪牽孺子爲牛之小恩而率輿愛子投車之大衆扈當陽坂一抱零丁之弱子而凌犯長秋宮七年大歸之小君且以此舉截江畱斗爲大有名之師足摠發吳人一咲也雲試思慎夫人走邯鄲之道袁盎如何卻退晉穆羸抱太子而啼趙盾可曾豪奪借

使夫人綉旗一怒武帳珠襦鼉鼓三中水軍將令呼孟勞而侍女刀光叫餘皇而長袞濯棹則其時鱗鱗藏兵白衣而呼警者呂蒙也艤衝脫繼暴風而二拒者董襲也招以北風丁奉之帆登岸皆升城之督麾以舵樓谷利之令上山皆白棒之兵而夫人敬以鼓角勞軍旂門受詔蹕前周泰縑蓋先鋒馬後虞翻持矛步從雲能以一身之膽納百婢之刀乎吾恐張飛僅能瞋目橫矛以決死據長坂橋不能牽人斫頭以沙囊斷長江流也蓋其時權且大遣舟船迎妹而夫人慟哭也知夫人必以太子歸吳何也魏略禪以建安十六年身賣漢中父事劉括禪年數歲竄匿隨人西入漢中爲人所賣及建安十六年關中破亂扶風人劉括避亂入漢中買得禪問知其良家子遂養爲子與娶婦生一子初禪與父相失時識其父字元德比舍人有姓簡者及備得益州而簡爲將軍備遣簡到漢中舍都郵禪乃詣簡簡相檢訊事皆符驗簡喜以語張魯魯乃洗浴送詣益州備乃立爲太子據魏略以爲建安十六年事則在十三年趙雲抱太子之後使其時杵嬰不識趙孤書退勿呼父字則十三年趙雲長坂之功又

委棄字於牛羊。乳鬪文於邱虎矣。幸而方望真人能留孺子華。陽奇貨得歸異人。夫人念嬰媿於伊水。此兒久付空桑。失抱帝之滕公。諸將誰爲擁樹。寧使漢家有烹羹。置俎之太公。不可使劉氏有白板。青衣之太子。與其吳鴻。扈稽呼著。父胸孰若石紐。塗山藏諸母腹。與其趙媯。胡組誤二漢之保阿。孰若遜抗機雲。親三吳之師傅。在英雄不顧妻孥。龍種豈無媪母。况孔甲有此乳兒。阿蘇何非已子。其挾以歸也。雷震宮長子。東方免秦宓。天頭西顧。秦康公之爲晉甥。非長安君之爲趙質也。而况阿斗者。甘后之玉人。又二兄之鼻涕。聖公升殿。俯首羞慚。盆子探符。汗衣欲哭。夫人憫齊歸早死。雖狀稠有童心。望周子迎京。或者悼能霸晉。且后縉自計歸。仍子疆。不曾廢母。則安知不六后臨朝。身猶故劍。四帝外立。雷此前星。已不沙落。豕牢人免薰君。丹穴。

此夫人嗽乳捫天。推乾就溼也。乃漢王始以孟子諱。吳終以向姜絕莒。不畱堯母之門。忽絕鄧甥之好。謂娶妻必得陰麗華乎。則惟斯人乃有斯婦。謂生子當如孫仲謀乎。則無此舅焉。有此甥而蜀之人乃以爲趙王歸漢。如意之酒必酖燕丹。機橋太子之烏必白。則孫夫人非呂太后。吳大帝豈秦始皇耶。曰使趙雲勒兵斷江。魏晉春秋之言。佞臣法正之謀也。曰與張飛勒兵截江。趙雲別傳之言。非丞相葛亮之策也。時正爲軍謀主。亮所謂正能制主。上亮不能制法。正故曰非亮罪也。太公之法曰。一女子當百丈夫。又曰。理四海如妻子。故孟津用婦人。與周孫武戰。宮人勝楚。由余未霸。小戎以女子談兵。蚩尤不禽元女。以南車教戰。世能祖祖。鮮能將將也。而况吳多謀士。蜀無將才。使夫人以定姜卜。戰之龜灼。銅雀金臺之兆。以馮嫪詔使之節。渚分香。

賣履之宮將見西揖闕氏魂褫冒頓北呼公主馬抱烏孫割長江而讀甥舅聯盟之碑開玉門以鑄外孫單于之印許馬懿巾幗來朝使甄后掖庭贊拜而後東封呂範之妻歸拜張昭之母江東衣錦爰漢重興也而乃鼎未三分商亡一物夫人遜國淫后如宮使虎威南郡忿興拜賜之師伯言夷陵怒報泛舟之役而猶謂楚文荆尸勿因息媯齊桓伐楚不爲蔡姬吾不信也向使夫人身不歸吳計能鎮蜀則長沙零桂焉知不三索來歸雲長益陽又何必單刀去會罷巫峽七百里之屯唾虜亭四十營之火全琮陸遜安敢輕挑黃蓋韓當豈能平視箠使吳兵鞭敲蜀將又何必西增白帝之兵東益巴邱之戍哉亮書曰主上之在公安也外慮曹操孫權之逼內懼夫人肘腋之憂曰在公安者言初婚至京一卮盃酒之夫人非于飛入蜀七年牀第之夫

人也某聞春秋之義忿不廢親怨不滅德殺陟尙報秦施城濮不忘楚惠蜀主乃不念敗亡樊口棄其室家奔問柴桑未諧昏媾吾江東先之魯肅但有蒼梧遁跡之言詢之孔明惟有披髮山林之請而其時甘皇思血飛小沛有狐誰綏曹丞相華落許都荊州誰借設孫將軍或有趙襄夏屋之忌孫夫人不守季芊一負之仁借弟姊以摩笄中鑿壺於智伯則吾江東帳構之銅皆專諸之鉞也夫英雄之見助夫不非慶女殺夫亦是雍妻而卒使齊姜返國無煩蠶妾之謀嫖妹于歸不浴龍工之藥則可知西施越絕斷無種蠡陰謀昭君和親不是漢宮秘計矣乃蜀主恩忘齊大陰輕子忽之援義茂秦嬴佯忍先軫之唾此吳國君臣寧以盤郢之劍送死女不以女膝之口食殘魚也夫人蓋以有生日爲未亡人矣讀魯史孔子以彭城子宋非子宋也通

吳援也。虎牢子鄭非子鄭也。脩楚戰也。吳無荊州而巫峽之援不通。吳無荊州而濡須之陽難戰。是吳以一女初婚失三江大局矣。吳爲索地蜀實負人。魯橫江所謂凡夫不忍行而况整領人物之主者非怨語也。洎乎臨沮敗好盪寇歸元白帝脩盟張溫報聘安知非哀姜哭市內椎歎后之環綠衣拜勤外解宋王之閉而能敦舊乎。夫自古處女爭桑尙開邊釁焉。有呂姜斷髮不啟鄰仇在夫人埋壁情深履薪怨小謀桑不霸就木徒甘輟聲已。帷堂不視之哭應意其畫紙埋人之識漸臺水沒萬里江長杞國城崩千年蜀破娥皇無子堯母無夫伊可慟也。嗚呼白狐九尾開山啟母之魂暴雨飄風杜宇鷓鴣之血讀華嚴宮門發表吳太情深惡法正盜國劫宗蜀無人理某竊咲君王巾幗女子英雄手陳承祚殘書兩冊牝后有名悲裴松之補注千條

夫人無傳此天難補斷女媧神化之腸是文若傳擲吳國東門之眼銘曰

雌鳳不隨雌龍不飛三分鼎足一篋當歸于歸不戀京大歸不出惡聲國君外淫夫人不爭公安無家夫人則守益州有家夫人則走爭國世子劫君王后子龍之膽敢如斗樊口來婿喪家之狗三年不言三年不笑繞吳門者腸倚大井者教戴冠佩劍夫人之孝以智事備則隨以禮事備則歸以仁事備子其子以義事備死則死蟲入蜀腹橫目苟身薰蕕不同器以劉瑁妻爲夫人勇而禮不亂仁而禮能斷亡乎亡乎有夫人之德而不能興漢婦人有集英雄有記吳書寥寥蜀書廢桓桓夫人弓刀侍婢

隣水縣先賢子路顯神碑

梓。潼。不。神。夔。子。無。靈。於。是。有。蜀。賊。徐。添。德。者。紅。巾。鼓。亂。綠。林。弄。
兵。脅。達。州。九。姓。之。衆。攻。隣。水。斗。大。之。城。田。單。守。卽。墨。而。天。神。下。
降。法。和。軍。江。陵。而。羣。神。隨。行。長。圍。於。丙。辰。垂。破。於。庚。申。羌。蠻。三。
兔。之。窟。合。秦。楚。一。蛇。之。勢。成。豈。特。人。肝。切。膾。柳。下。跖。之。大。盜。城。
頭。子。路。刁。子。都。而。同。名。哉。守。隣。水。將。宰。隣。水。令。勇。則。樓。煩。入。壁。
怯。則。陳。餘。棄。印。城。上。尸。膊。地。中。角。鳴。叢。祠。狐。鳴。而。呼。火。毛。人。泣。
城。而。見。精。於。時。讀。孝。經。則。漢。朝。皆。笑。拜。韓。信。則。一。軍。皆。驚。如。我。
友。甘。補。堂。孝。廉。冕。以。達。徒。七。十。當。賸。巴。三。千。於。旗。之。續。蟠。於。地。
鐘。鼓。之。音。震。於。天。宣。父。圍。匡。之。日。仲。由。氏。結。纓。之。年。也。
見縊於荒谷懸絕
得賊糧鄉兵復振冕以義從五萬人保西鄉八九路百戰艱危五年暴
時冕以鄉兵
萬餘人糧絕露人謂曲阜有曾參則鷓鴣不入城郭宋君用墨子則輸盤撤

其攻具冕勝則爲子思守敗不爲武城去使徐賊負偃王筋骨而來爭聽與霸鈴聲而不懼非勇也不知鳥窮則啄獸窮則攫顏子仁人之言也時有官逼民變之語見邱抄白羽若月赤羽若日季路有勇之氣也昔李靖告華山而呼僕射蕭邁顓瞿唐而見白帝心之感則思禽之制在烝四墉鄭祈三塗晉祭蓐收虎爪夢其威刑天干戚誅其厲我先賢示夢於隣水校官也命以黑旗書子路之神白堊寫至聖先師之位當四門插當火器跪如靈姑旌如桑林旆賊之礮侈聲箝賊之圍魚鱗潰者何也冕抑知寶雞黃蛇之時崇丕聆隧之神天淵玉女礮館神君巫咸神大而詛楚杜主鬼小而霸秦而况石盤虎尾由也雷精雞冠猥佩尼山素臣乃狐黠畏子路之目而堂衣犯孔子之門城破則桓魋樹板賊入則金絲堂焚使其開吾戶據吾牀飲吾酒此城勿守孰若料

虎頭編虎鬚免虎口此跡可走先賢所爲蒲弓木戟

子路遺孤仲子崔以蒲弓木戟

報狐屬殺父仇見孝子傳

蠡耀蛟奮仇敵在前乳虎在後也某聞天之所輔者德

神之所佑者國狀成湯伊尹之夢則晏嬰不伐宋師廢祝融鬻熊之祀則夔人終爲楚滅祿山大盜居軋犖而爲鬪神周公神兵助隋朝而戰李密霍神以白衣助唐王陵以陰兵討賊卞山救臨汝項王之土偶如風大眼寇鍾離蔣帝之馬蹄盡溼何必祭子胥以牛酒祀之推以寒食元謨救命空誦觀音之咒敬則還神徒殺十牛之劫哉案唐咸通五年有黔軍校居宣父廟每食則薦每夢則教見王者衣冠曰吾孔仲尼也汝當以更名顯以殺賊効以司農卿晉汝之官以謬宗儒易汝之號其後蠻寇滅孔子笑今冕之戰多甚於彼而冕之署功辭其報者又何也冕之言曰戰五年而滅賊非勇殺萬人而受賞非仁方冕受圍

於隣水也守無韋獻戰無張巡婦人則琅邪呂姥王襄仙苗婦也時起於南籠女

子則睦州碩真齊王氏娶女也以白衣起於襄陽欲與徐賊合子不聞順者或亡逆者或存盧

循禱戰助水者南康之廟爾朱入洛縮波者灑津之神降靈則

有摩醯出盪則有子文倚鄴下神兵不破朱榮之膽城隍風浪

反助慕容之軍則冕方且之反之策殿馬焉能有若之保稷門

人見僕射陂邊有無數小旗之李衛國冕不望臨海廟裏有一

州相報之陰子春也幸而鬼叫狼啼乘茅將軍出獵之勢鳴鼙

響角藉夏后子赤城之靈使徐賊五斗道窮債其鬼卒八公山

木見此人形不然則豕狗入曾參之室河伯陷澹臺之城冕亦

將覆醢而待死斷纓而無生天不絕五殘六賊昭明咸漢之妖

國不宜養黎軒幻人木熙偃子之兵墨吏橋虔而虎冠兵官干

掇而膽青險不使俎豆豐宮之司寇脫冕微行而出走燔臺率

爾之仲由三都一怒而墮邾我為子說子為我銘銘曰

隣水之圍掘鼠煮弩有睢陽危無玉壁固冕也斷顏回之劍絕

曾參之火如子路氏拜拯溺牛暴馮河虎制虎者頭扼虎者喉

戎山顯神至於韞邱時惟仲由使有若三百人之中樊遲踰溝

冉求用矛勝兵八百養徒三千縞衣白冠端木氏陳說其間如

甘興霸如魯仲連贈顏回少師贈曾參少保子路行行司空一

纛何居乎必子賤之一琴冕抱之而終老

漢高安侯董賢廟碑

讀漢書至董偃令終鄧通強死未嘗不廢書歎也齟齬小忌乃積怒於青宮含桃餘甘不操刀於太子者豈無術哉予登華山遍遊秦中求唐陵碑板至杜鄠見有漢高安侯董賢廟焉堧垣聿興榱桷舂飾曰異哉此道州有鼻之祠常山董卓之廟乎曹操廟於夷陵而申屠撤之王敦像於武昌而溫嶠去之此無怪秦檜之血食於溫吳元濟之俎豆於蔡也遂下馬見堂廡樹碑大書以辨哀帝臥起之妄其文甚美因揖神而告曰嗚乎聖卿君侯奚見辨之小也君臣魚水何鯁鯁於臥起不臥起哉昔馬援與隗囂同臥魯肅與孫權合榻關張國士也而先主同牀衛霍大將也而茂陵外嬖爲大臣者感幸臣一星之恩割袖藉眠之愛內平四母之爭外攘五侯之橫撤簾而太后入於雲臺徙

薪而將軍止於畫室一河帶礪九廟磐桑雖首枕帝膝股加帝腹良史美談也而彪固不爲君侯佳傳者以侯有大司馬之權不早除一王莽爾莽不奪侯之印則新都之功不侯莽不斲侯之棺則丁傅之屍不戮是君侯假司馬而新莽真皇帝也侯自謂居高位蒙盛寵不害一士大夫誠盛德也然某竊爲侯罪也侯不請斬馬尚方之劍殺張禹乞養牛上尊之酒殺孔光羗纓白冠槃水而賜巨君而侯公賓漸臺漢不得厝太山之安矣謂侯無罪某請以有罪數侯可乎漢郎侍中官皆傅粉貝帶冠鷄鷄而侯傳漏黃門不奢領修裘衣小袖不敬其罪一延年始幸給事狗監而聖卿初拜卽駙馬都尉侍中驂乘不讓其罪二新聲協律穉侯以弄兒壯大擁項而誅之而董恭以男妾國奢尻帶而貴之不孝其罪三淳于亂長定宮不謹身與嬖外交而昭儀入椒

風舍且旦夕與妻上下不別其罪四鄧氏布天下錢死不着身一簪而縣官沒董氏財賣且四十億萬不忠其罪五韓嫣徒以先趨副車江都王驚爲天子而高安乃以後穿登天麒麟殿傳爲堯舜不道其罪六富平儀比將軍不過走馬鬪雞長楊五柞而高安食邑千戶遂致五殿六門連薨北闕不制其罪七寵已在丁傅之右而代明位爲大司馬事已誤東平之獄而借雲禍爲高安侯不次其罪八識温室省中之樹丞相拜於車前欺匈奴孤憤之君單于拜於殿上不耻其罪九至於便房題奏瑩塚僭於義陵玉柙珠襦禁兵索於武庫不反地上反地下也其罪十如是諸罪爲君侯口實也雖然某數侯之善昔衛青不舉士而君侯實薦何武石顯害名賢而君侯不讐師丹王嘉嘔血侯無必殺望之之心鄭崇上書侯亦無沈廢更生之意大行在殯

張放之淚不乾。山陵未成。向魑之目盡腫。王莽神姦而僅責尚方醫藥之弗親。東廂喪事之不治。則可知藉閔婉媚。別無材能。安陵蓐身。但知螻蟻侯之無罪。萬歲千秋也。夫鳳凰負義。則反苻帝於阿房矣。艾豸忘恩。則逐靈公於死鳥矣。使侯當日者。承執中受命之詔。不屑共鮫。居然翬昇。釋子貢婦人之衣。成妹喜丈夫之志。以雌風而竟薰重華之宮。以男子而竟作女媧之帝。借炎漢之金椎。碎亡新之威斗。銅山久已。自鑄黃袍。早可加身。則斬蛇之天下。安知不爲擾龍氏之天下也。嗚乎。光武與嚴光共寢。誰見星文。鄧萬與桓帝同牀。何干天變。君臣之交。何鯁鯁於臥起不臥起哉。飛來大鳥。誰似埋屍。朱詡之忠死後。前魚宜必有驩兜崇州之廟。

附錄袁弓韜董賢廟碑原文

此碑已載畢昇山制府所修西安府志第七十九卷

錢唐袁弓韜以西安郡丞奉檄禱雨於終南之太乙靈湫。經杜鄆有神祠焉。神金貂華袞如漢上公。服問土人曰。府君廟也。弓韜時修太白神祠。意欲移其垣棟。是夕宿候館。夢神召見曰。余非唐崔府君。乃漢大司馬高安侯董聖卿也。哀帝末造。爲賊臣王莽所害。天帝謂予在朝。雖居高位。蒙盛寵。未嘗害一士大夫。不合羸尸埋獄。且遭發棺之慘。命予署西極郎位。專司此方雨暘。弓韜見神妍媚。因憶賢本傳有美麗自喜之語。諦視不止。神有頰色。旋轉怒曰。汝母爲班固所欺也。固作哀帝紀。謂帝雅不好聲色。時覽卞射武戲。卽位痿痺。末年寢劇。賢本傳中亦有主疾無嗣之語。如此。安能復幸我邪。當日君臣相得。與上同臥起。事實有之。此是漢家故事。孝武時衛青霍去病兩大將亦蒙此寵。可以安陵龍陽。例視邪容貌。

華麗天所賦也非貌美者必僻行且幸臣一星上應天象此我二千年難明之案子爲我昭雪之言未畢有鬼卒二牽一囚聲嘶頭禿捧一卷書至墀下神指曰此莽賊也上帝以其罪惡滔天監置寒門爲毒蛇齧嚼今始救出爲我司溷園犯小過輒以毒草鞭鞭之弓韜因問囚手何書神笑曰此賊酷好周禮至今抱持每受鞭尚以護背弓韜就視果周禮猶有臣劉歆恭校字不覺失笑而寤次日禱畢議新其廟復夢神謝曰蒙君修廟甚感但思一人配食吏朱詡者曾爲我自劾去大司馬府收葬我我訴於帝帝嘉詡義命子浮爲光武大司馬云弓韜歸西安捐俸爲倡數月廟成旁墀朱詡像并墀一囚爲莽持書跪墀下如夢見狀署門爲漢大司馬高安侯董府君之廟而刊之石

煙霞萬古樓文集卷二

秀水王曇仲瞿氏一名良士

哀江南文

大盜移國天子無愁相公曲子將軍斷頭予昨者過真州黃靖南之墓而慨然亡明也長江天塹投鞭斷流遂乃溯金陵泛桃舟徘徊麾扇之渡遲遲鳳皇之洲有登高而吟者曰此曹彬舊遊之長干兀朮立馬之雨花臺也賈誼過秦干寶論晉子爲我述宏光之所以亡晉宋渡江之所以勝者曰鄙哉子亦不聞於舊史氏矣蕭譽三世不登梁史班范二書不尊更始大業書十三年而不書十四年者統絕也大漢終孺子嬰而不終劉盆子者國滅也烏有所謂宏光者乎昔者鄭妃艷煽福藩厚崩狐祠驟火鹿酒遂烹王子由崧者喪國之孤注流寇之懲羹也而乃

君薰丹穴。聚遷陽人。彼留都諸君子者。非僨軍之驕帥。卽誤國之書生。亦復遮車而迎子輿。設壇而禪鄩亭。半壁江山。終無一戰。小朝氣象。不穀中興。而子乃比於瑯邪之五馬。康構之南奔。乎相州棄宗澤。而中原不守。靈武得李勉。而朝廷始尊。爲史督師者。固若桓桓。尙父。皤皤老臣。則當踞彭城。臨中原。控宛洛。振襄樊。夷杜弼。於湘州。則招陶侃。散伊盧之殘卒。則召劉琨。麀西華戰落門。擊彭脫。破隗純。燒黃巾之車。重蕩白波之遊魂。夫然後脩下國之禮。命詣我師。而犒軍。何爲乎鎖狗連鷄。畫牢江戒。偃旗臥鼓。尸居廣陵。非王恭。而督揚州。非謝公。而壘新城。據一城所必困。占四鎮所必爭。而卒不移守於徐州也。兩不下之。勢外不調。停於高傑。劉澤清。七不可之議。內則受制於大鉞。馬士英。而閣督之權。不啻於景升之犛牛。子陽之俑人矣。晉之東

也。天也。宋之南也。人也。佛狸窺江。而不渡。敦温伺篡。而不年前。有飲馬江淮畧地。不有之石勒。後有投鞭建業。不涉淝水之苻堅。滕舍抱天子祖逖。死中原。殷浩書空。豈能北伐。陶公經畧。不過江邊。然而始不見。併於劉曜。終不見。篡於桓元。王導因天。而無功。謝安貪天。而無權。至若浮圖撼鐵拐。馬破羣順昌。忠義之旗。背嵬韓岳之軍。見張浚者。從天而下。指郎君者。鬚鬚而奔。和尚原。疊陣之奇。浩王兄弟。黃天蕩。金山之鼓。鄴國夫人。以是鐵象。鳴來曲端。雖死靴尖。踢到宗爺。留京。或以爲兀朮帳前。甲燈環列。或以爲劉錡城裏。鷄犬無聲。蓋不獨善戰者存。中血漢善守者。河北義兵。且虞允文。亦書生名將。洪尙書。亦天下聞名。檜惡。雖奸。擅廬伏哭。歐陽雖慙口。伐金軍。又不但張憲。施全。一時義士。胡銓。趙鼎。一輩忠臣。而宏光。晉則無天。宋則無人。徒有初

平西徙之名而虛擁此永嘉南渡之兵也可法之寓書我攝
政睿親王也上國聲援辱王扶義時既悖乎春秋討賊之經
義又乖乎新君卽位之例非奇貨而居爲異人非孫心而立爲
義帝彼固知偏安者小國之綴旒不知一統者興朝之大計
方是時也我豫親王以曹彬命將竟下清流且楊素平陳直
窮南裔了大亨於二月四十縣之江東止天正於一朝二百年
之漢地子尙不知宏光之坐斃乎彼夫玉樹花者亡陳之歌舞
也念家山者亡唐之樂府也留都破國江山敗家金粉水纔隔
乎迷樓門方臨平辱井爲宏光者卽能監戒荒亡調停軍政袖
明帝之金鞭蹴康王之馬糞舟藏濡須之鳴水結金山之陣防
江而鐵鎖連山航海而章安作鎮我猶恐南人之船使馬無風
臥榻之傍酣人難枕而乃降表不書黃門選女降帆不出狎客

遷延獅子黃金之賺春燈燕子之箋瓜步黃旗魏文皇之甲士
宮中粉墨李天下之管絃逸史謂其對月當頭停杯在手夫豈
有人間萬歲之天子而日勸長星之杯酒者觀其太子來歸童
妃被廢微時故劍尙然漢帝無情斗麩三郎何至唐皇不記良
玉義激君儲疏呈大義謂卽妖人陳勝詐號扶蘇卜者王郎假
稱成帝亦當厖衣金玦察東宮之死生何得挺擊移宮付共工
而獄秘豈必晉陽君側皆是惡人焉知掖庭曾孫獄無王氣蓋
其時江陵軍勢盡在上流天寶伶人多奔漢沔三清客在左幕惡國寶則
怒激王恭護貞明則衅成僧辯國未救乎外寧軍已撓乎內變
斯何時也豈不笑王敦未下六師麕奔蕪峻初來百寮狼散者
乎洎乎慧狐遷鼎羸樛毀周唐王潛逋於閩粵聿鑿及弟聿鑿魯王延喘
於杭州以海入越一統山河已無故漢三家村落尙有諸劉若永明王

者則又帝不庚申六更莫續門非甲子一旅難留矣式耜才如
女艾忠是臣靡姜伯約之放甲投戈降旗易豎公孫賀之悲哀
涕泣丞相難爲我天兵鼓行緬邦也平陵軍帥擁方望以奉
真人天水驕兵擁隗囂以成敵國如李定國其人者蓋又聚澆
泥之黨以復少康合秦楚之兵以納蠆虬日月出矣而燭
火不滅爲之哀也夫金陵明祖之錦鄉也泗水雲龍多由豐沛
蕭王富貴盡在南陽然而定鼎不榮乎洪武牽羊不怨乎宏光
永樂遷都已亡建業建文遜國早失長江良由宰相黑衣使忝
大事選名高僧主燕而姚少師策定燕都矣何況書生白面最誤戎行當日之靖難兵來
時無闖獻他日之彭儀門破罪在燕王不然而六代江山龍蟠
虎踞何然而一皇陵寢敗瓦頽墻神烈山頭保不賴王承恩之
殉國石頭城下亦不需秦良王之勤王蓋金陵爲帝王之都焉

有漁陽鼙鼓况長江自開闢以來豈無可塞沙囊國必由乎人
滅地不係乎天亡彼晉宋之百餘年有其地利者非如此長江
乎嗟乎時無顧賀當金陵三百年王氣之終誰是張韓讀中興
十三處戰功之績依然明月可憐庾亮胡林大好新亭誰又周
顛涕泣彼登廣武塲而聞阮籍唏噓者亦曾眺平乘樓而聽桓
温太息耶

金陵城外大碑無字厚丈許濶三丈高亦六七八丈文明建文
時將以樹之神烈山者永樂破都碑遂不刻歲癸丑予偕袁
倉山先生過此曰此石無文必作哀江南文以補之先生曰
子山文孱弱不足刻足下爲之及文成而先生死當以質之
地下

隋蕭愨后哀文

暴君之國。不失於好色。而失於窮兵。大業之亡。不亡於荒淫。而亡於遊幸。繫古明婦人之遇。其昏主不貽徽音於後世。而最可哀者。如蕭愨后。乎嚮使苻堅納諫。則張夫人不殉身於五將之山矣。晉帝保家。則羊皇后不蒙塵於平陽之虜矣。秉起居之筆。而帝德難書。奏上德之頌。而軒轅不悟。此述志一賦。所爲三致徘徊。憂思怨諷於江都之一幸也。祿盡則劓曼。先知喪雄。則定姜已卜。后何不幸。而卒與桀宮嬖妾。浮海同舟。幽王鼓鐘。涉淮並載。耶仰飛行之殿。來裸遊之宮。花方作孽。樓已名迷。聞一往不返之音。揣大鼠阿廢之夢。萬寶常所。由早泣新聲。侯夫人所爲先死於棟下矣。后弱似貞風。義能不裸。勇非馮后。勢不當熊在。佩玉晏鳴之中。寫離騷九辨之憂。此康后鷄鳴悲題。永巷班

姬辭輦怨咏離宮一篇之中殆有甚焉及乎變動虎賁兵交黃
屋君薨組練盜踞重門迫伏后於壁中急唐姬於抗袖哀姜哭
市舉國無人穆嬴啼朝何能討賊后於此日縱幸不被錮金墉
懸頭小白亦自當酒飛金屑藥搗宮椒特以賊在圍中兵須奧
助遲十六院幸姬之死俟六十路義師之旗苟生呼吸延喘須
臆捧君王鏡裏頭行借魯國聊城矢至而化及得斃於夏主降
王之一戰也孔子曰女智莫如婦后之謂歟既而東道清塵賊
臣授首二京立辟共主分周后不得不乞虜馬以勤王假明駝
以靖難始畢婚姻之親建德君臣之禮連衡老上走馬陰山藉
曷姿主壻之援馳頡利外孫之騎碑盟甥舅酒歆黃龍后不踵
向姜之無歸而法紀姬之大去者春秋之本義也無何夏軍撓
敗黑闥求援突厥以中宮播越奔命窺邊也思亦將置主中原

請君河洛而兩王弑絕一帝禪亡僅受與唐和好之盟率成昭
君歸漢之局而后於是乎路絕蒼梧湘君命盡天傾杞國哭斷
長城矣稽自有唐迎歸故后卒葬於煬帝雷塘也北史未成隋
書未作時無通德誰脩外傳之篇婢少佩蘭解說宮中之事年
堙代隔事舛言訛繼以虞初競作稗官無稽人惡驕君罪歸孱
后遂謂驪姬禍晉褒女覆周不知宣華拜賜一物早可亡商寶
兒慙生再顧已傾人國亡陳嬪御豈少於孫皓之後宮晉陽江
都不減於石虎之女部后姪謝婧英妬非昭佩席多莫敝房大
難專野雉興沛中之漢焉用才人茗華覆夏桀之宗何關妹喜
耶或謂后德性能詩才華作賦何以世基佞佞竟無諫書化及
觥觥不關諍草不知垂簾殺杜非先后之聖明冒絮誅媯豈中
宮之盛事而况后和熹紙墨僅可書生甄后筆硯惟堪博士倚

急以未央縛信之謀速來華歆搜辟之禍后之驚怯斷不爲也
或謂化及毒既逞君慘當及后何以懷娠仍女出竇無逃嫫祖
元妃道路無死則安知不少典龍逃高辛狗嫁在昭儀豹尾之
中有臥榻人酣之逼保不伯明篡室寒浞縫裳文芊勞軍息嫫
從楚乎不知化及者隋宮劫賊周室忠臣黑獺殺蒺藜明月前
事可懲景陽收叔寶麗華後車可鑒江都之弑所謂齊襄復九
世之仇必不效伍胥蒸昭王之母也亡人可壘豈令尹振萬之
時四國交爭亦蕭同作質之日爾裴寂主晉陽宮事或有醜聲
呂后在項羽軍中不聞失行况后之詩明禮習者哉或又謂小
君失位尤物移人延壽史書何以建德妻忌載諸后傳不知建
德以作賊之才義能殺賊以勤王之烈忠與封王聊城之遜后
殉於甘夫人小沛之窮路隔乎慎夫人邯鄲之道而建德稱臣

拜舞先馬爰驅出

於雲臺衛弓刀以侍婢良以休屠尙有

名汗河朔幸存驕主后繙藉有一成臣靡力能復國此遣使朝
侗移兵救洛釋隋官文武萬員宮人萬指者堂堂乎王者師也
唐書謂建德妻不衣紈身惟脫粟明建德婦夫有英雄之用無
帷簿之嫌也或又謂突厥之俗但知啗牛胡人之禮不知敬母
后乃非細君而和戎敷王嬙而出塞何歟夫婦人越境固經禮
所不宜女事邇戎亦春秋所必戒不知后與義成僅此姻親相
爲休戚身不能鳴弓射鳥逐馬牽裙且蒙荆棘以來歸但頓王
庭而告難庶幾乎呼韓務面烏孫抱馬而啼也聽戚夫人出塞
觀歸之典所謂竇建德有回生起死之恩歟若以鷄泊一過疑
文姜之會禚穹廬萬里譬隗氏之居温者嗚呼冤矣以今觀之
小憐下嫁者宮妾之竒聞玉兒配軍者嬪嬙之恨事后死法三

妃生歸一穴。縱復下齊辛癸。猶能上軌英皇。使鷄臺從死之魂。作萬古迷樓之案。猶其幸歟。嗚呼周天子。一月御八十一妻。闈國則三婦受其美名。宋寧宗一夕幸三十九人。有才則楊娃傳其姓氏。后何不幸而生。以才死死以名傳也。

遼懿德蕭后哀文

讀遼史至懿德后之讒死。迴心而慨然。誓曰。願終汝世。生生勿復爲有情之物矣。皇娥之聖而誣以爽德。少皞不免玷言。關雎之興而指爲淫詞。康王亦成詩案。書紀以來。房后憑於丹朱。流虹感於女節。龍迷少典。鸞覆娥商。或以爲伊尹。聖人私通。末喜或以爲鄒屠。佚行潛期。大人凡諸盲史。盡是讒夫。稽懿德之始。爲后也。冊耨幹爲孤。穩壓帕菩薩。下生命可敦。領三十六宮。天書墮地。何其盛哉。如單登者。恭心獬婢才。豈念奴孤。僨闕氏君。如冒頓雅。是胡旋。敕勒何妨。樹梨歌來。不知唐山夫人。何必房中樂作。后不學嫫母。奏上德之頌。亦斷不爲白帝吟。嬾娟之詩。沈觀音。是中宮賢女。高菩薩。非內侍私人。而乃齒牙啣骨。遺臭。優施羽林神仙。謂通射鳥飾。郎中錦被。以誣望。卿借畫工。傅

粉以獄昭信使。修嬖侍寢之奴。居然僕射長樂更衣之婢。自稱大人。爭琵琶而彈四且發詩案以讞回心。淖方城非披香博士。馮無方豈所愛侍郎。忍唾讒言敢污貴德。匪所謂青蠅之矢積階。單極之統斷幹乎。遼主不別房帷無辨。祗席宣王好色宜在。無鹽登徒多情。豈知巫洛懿德以陰麗華之脂澤孔貴嬪之神仙。紙墨供於和熹竹帛慕乎明德乃甘夫人。若月下聚雪而元順帝非瓊花洞主也。予想當時宮羊咤地聞雷未來指血染鞅攀車不宿后以飛鷺禮義之人。婕妤修正之福詩吟萋楚酒酌金罍卽或有流音管絃寫聲樂句者。亦不過帝妻愍生君妃狂態遂乃禍起烏臺辭連魚貫。賊臣以宇文玉珽之殘爾朱牛刀之橫塞甄后以口糠飛佛堂以血襪指北宮尼男燥聲告月將三思亂狀而昏主榜大閣徐妃穢行竟仿金樓讒臣發淳于長

定宮姦居然王莽豈不痛哉。予聞之臨春結綺之中。豈無脫兒善度羯鼓斜陽之笛。亦須懷智崑侖為明上者。但使妃后與伶官別傳自然宮詞與樂府同調。必謂梓瑟桐峯皆成私約。神童歌曲畢竟桑中。則又后妃二南宮商誰譜。周興三婦幽籥誰吹也。懿德詩有仙心人如玉。德高辛少女或疑淫戀。槃瓠宓帝神妃豈肯夢交窮羿而况黃花不寵赤鳳何來。郎出郎出仙乎仙乎。有是理哉。遼主略識華音未通穢史目不見典。籌握槊門腕侍書聞壁中嗽聲。啣楊花窠裏詩題枕角乳露雞頭。或小吏非常衣服忽有或少年寢處罪過全無。使遼主邁此淫荒亦不過絲絡橫窗烏銅對鏡。甘糲半面同輦升輿而已矣。嗟乎詰汾天女死不利於母家。昭君才人生不終於胡主。見南風以少年私侍誰檢空箱。謂陰城與嬖人淫帷誰伏牀下而忍使唐姬起

舞抗袖悲歌貴人壁中不能相活今而知昭儀徽好何物人堪
五。月。生。辰。古。來。所。忌。也。乎。某。賦。是。長。門。歌。如。長。恨。聽。閣。道。淋。鈴。
法。曲。淚。念。肥。環。慟。瑤。光。西。殿。梅。花。心。傷。小。后。如。懿。德。其。人。者。吾
願。此。貴。妃。子。受。生。善。地。生。生。世。世。勿。降。嫁。帝。王。家。也。

余寓居秦淮作懿德十香詩案曰迴心院傳奇者四十二齣
乙卯公車留之山陰爲李氏勘案入之縣庫此文在殘稿中
錄出以配隋愍后哀文爲二篇以附今稿嗚呼文書蕩盡矣

告妒婦津神文

驅車獲鹿至於井陘信宿龍窩之寺走觀於妒婦神詞而謾曰
美哉妒乎自袁滔殺妒妻以後虞通撰妒記以來神其不靈矣
乎古史氏曰莫跋扈付丁昨勿反顧付奚度其有併張跋扈而
反顧者天以畀我妬婦是夜也雲鬟儀衛數女侍宮衣擁後美
婦人手大荆而訶曰子知予古帝之艷妻侯門之貴主乎昔蘓
季子才傾六國辨不下於機妻桓征西雄蓋一時權不行於內
子紉壻以棄妻而亡馮衍以再妻而死子讀史乎雌龍聚夏后
之庭牝虎充桀王之市皆予神之所使也高歡束帶自稱下官
劉備弓刀見吾侍婢專諸勇士也可以刺王僚之君而不能不
屈予一人之下樊英名士也可以怒萬乘之主而不能不拜予
下牀之地非野雉妒而三趙誅則功狗之冤不申非南風妒而

八王死則典午之惡不報世有力擒項羽之劉邦射父頭曼之
冒頓莫敢予神是傲子奈何以一孔之書生訕笑吾九天之尊
媪乎妒之律曰偶語者棄市腹誅者別趾上帝之命吾神司是
妒也毒溷世之桀夫殺不仁之男子有辭則行無辭則止聞是
語也某怒如虺虎袒裼辟戟歷階而升曰呼妒婦我語子矣男
唯女俞德也陰干陽位刑也女子行而丈夫心者淫也七孺子
而三夫人者情也聞牝鷄鳴而索家者必妒己也聽婦人言而
戒酒者非劉伶也予頭能觸共工之山而不戴女媧之天力能
斷蚩尤之尾而不畏旱魃之母和后爲蟒呂后爲鼠武后骨醉
化爲鸚鵡閩后擲人死葬雷斧美不過黑鳳皇勇不過麒麟虎
面如藥酒心如魔母梁皇之經可懺乎赤睂之屍肯裸乎子能
禁其夫不愛桃花之樹不讀洛神之賦乎錮汝以金墉之城毒

汝以房喬之醜子能大聲霹靂起於牀簣乎能白日現形割勢
操刃乎能獅子一吼使子拄杖落地乎能駢妾五首使子殭尸
不殯乎我男子也豐富偉岸誰似朕下體洪壯創汝甚子如不
俊將放汝於無男國東刑汝以女子罪宮不夫而有孕衆雌而
無雄有辭則凶無辭則從神以目視目屏營唾地半時而言曰
吁吾語汝子男也一陰一陽之謂道子女也勿二勿三之謂德
御妻八十一可乎不可面首三十人得乎不得妻之謂齊妾之
謂接彼功封者哭其貴而棄妻彼利算者苦其富而買妾愛其
內則鑄錯愛其外則諱酷九錫不嘲則玉導不爲丞相關雎不
諷則謝安不至太傅是其情裴談畏鬼母非其情沈括不受夏
楚子不謂情之所鍾在我而謂人之冒嫉以惡浴斛覆牀散灰
扃戶君不如婦人之仁我亦深惡夫男子之妬也某於是感情

順氣危言正諫而告神曰子介推之妹予恐其歌龍蛇以禍汝也其聞必衰者色也不衰者情也色惑乎男子情迷乎婦人是。以掩鼻絕乳雄風不聞春鉗髻髮制夫不仁。獨孤之母不容阿。雲無鬚之人不得入門至於真長佯愚王敦懾魂何瑀投軀於。深井子敬炙足而離婚溝水東西而夫人之情蕩然矣女媧氏。之補天而王也金輪氏之禱狄而帝也嫫母爲世繫安樂爲繼。體神於此日能卓一令於地曰外淫者宮野合者。剽如此而男。子守貞節丈夫受七出傳曰陰王陽微金鐵爲飛今女皇不立。國彼妒之人亦何事乎懸旛到天擊鼓動地爲哉我願神放情。於無何有之鄉斷情於佛如來之場陰敕天下之妒者樂而不。淫蕩而不狂以食鷓鴣爲美饌以賣皂筴爲瓣香馮敬通不操。井曰劉孝標家道遐昌則神之福其妒人者溥矣不然而鷄皮。

告巫覡祠神文

總督南河太子太保兵部侍郎徐端檄告巫覡祠之神曰某聞禮官之法以狸沈相近明神之福以馨香佑國是以王尊沈馬黎陽不溢爾朱縮水灑津不流梁山壅則晉景公縞衣哭河大江崩則始興王荆身請命其有斫水罵胥而狂流獲安濱河列陣而波神戰退者某豈不能逞王閔之忿爭用索勸之故事特以淮賣神之明禋四諸侯之順若也今淮不扈河而効靈者又數年矣河之神謂爾洪河之中有怪物焉雷抨風鳴木號石驚青軀縮鼻獮猴儻獐牙白額金睛晶瑩率其鴟脾桓胡水魅山靈與我洪湖從事爾非刑天干戚羽淵之黃熊駘臺汾神洧淵之鬪龍亦以晉祭三塗剋祈四墉故遣官致牲以汝爲鎬池之君也乃與之弁纓而勿聽與之瓊筭而勿從某月某日壞我

洪堰之隄三千四百餘丈是爾神陸梁圮命昇兀滔天也昔禹
帝之錮汝淮神也制之烏田授之童律頸汝大索鼻汝金鈴時
則九河神女雲華夫人胥命元夷誓爾龜麓圖汝於九鼎之上
記汝於岳瀆之經爾躡承命乃梁武君世忽壞我浮山九里
之堰大殺生靈萬萬是以明祖龍興敦命我徐武寧王出爾胥
并告爾絨毛關盪寇威震華夏徐中山功蓋九州特以金簡玉
書遵塗山之三宥魚頭人身赦淮堰之九死今 朝廷鞏固淮
隄一百七十年矣舜棄黃金禹捐珠玉巡山畫海神之形入渭
寫忖畱之狀聲靈所暨海溼山陬爾當奄奄屏氣如泉宮之蛇
若鮫人之織乃敢永夷天吳肆其驕心魑魅罔兩奮其憤能某
考淮南之書往古之日火熾炎不滅水灑洋不息女媧氏乃斷
巨鼇之足殺黑龍之血而淫水涸冀州平狡蟲死顛民生鳥獸

魚鼈匿其爪牙藏其螫毒今淮民濱河而居共工氏之陸處什
三水處什七也堰水而隄神農氏之石城十仞湯池百步也爾
不聞蚩尤逆命元女下天翟威壞陂天帝震怒乎今 皇上
四年以來殺九嬰於凶水斷脩蛇於洞庭繳大風於青澤擒封
豕於桑林楠木青羌調於玉燭蜎飛螻動息於永風而爾跳壕
不順跋扈爲姦不見負貳之臣極其右足防風之戮骨已專車
耶今與爾神約自今後銷聲潛形伐毛洗髓許汝以黃安之龜
萬年而伸頭黑繩之罪百劫而出獄崇汝以李神媪龍之祠飫
爾以韓愈鱷魚之祭若損我出土騰彼一波則某驅山之鐸趕
海之鞭具在也彤弓素繳銀戈雪鋌俾鑿齒戰汝疇華窳窳口
汝弱水呼庚辰以咨禹召河圖而告帝檄如律令

卸花坡女賊齊王氏傳首露布

琅邪呂姥寡婦也。而報仇海曲。交趾徵側女子也。而稱兵朱鳶。其時也以威斗為君。新息為將。然猶聚亡命者數千眾。破日南者六十城。今茲襄陽女賊齊王氏者。驟起黃龍。

齊王氏以嘉慶元年三月與其黨劉啟榮樊人傑姚之富王廷詔張漢潮張添倫高均德王光祖同起襄陽其地曰黃龍墻云 潛招白騎鬻身駢女。

山東賣駢女也混名賽昭君人呼為賽昭 賣嫁孀妻。敢於緯恤。齊嫠紡懲莒婦。殺夫不忍。其雍糾助夫欲

雄於詩索。始不過拳。逐馬如李波妹之追風。歟。不料跨鞍彎

弓學毛夫人之敢戰。前者齊林受首。

乾隆五十八年安徽劉松宋之清劉之協與陝西韓龍襄陽樊學明謀不軌齊 十族未夷。一雌忽吼。

齊林素富正法後齊王氏入青蓮菴帶髮修行 顧真是睦州女子。膽敢偽僭文佳。白頸鴟為遼水婦人。乃號將

軍懷化。陳持弓之走虎。上遲昭平之亂平原。殆有甚焉。既已朱

林以武舉與樊學明往來劉松發配

甘肅敗露正法齊林以交通亦誅

樊人傑等嗾其殺襄陽縣報仇又勸其殺襄陽府云

龍千里順風而騎睢陵五縣雞犬無餘矣

湖北初起五縣宜都則聶人傑作亂於枝江湖北巡撫惠荆州

將軍成刺之荆門則有石雷屯石三寶陳德本熊道成當陽據其城兩湖總督畢以火攻半年下之來鳳則有楊子教譚貴起四川總督孫剿之郎陽則有曾士興破竹山保康二縣西安將軍恒剿之此乾隆六十年至嘉慶元年也續後三月有孝感縣賊楚金貴魯惟志起胡家砦侍御明剿之宜昌則有林之華譚加耀起長陽縣之榔坪七月總督畢復當陽來鳳之賊未殲大學士孫葵

命兩江總督福統來鳳軍是時贈郡王大學士貝子福四川總督和同進剿苗疆先後薨

命領侍衛內大臣額領侍衛內大臣德廣州將軍明雲南提督鄂接辦均授

統之任敢又明瞰陳倉潛軍蓋屋以女隊八百騎橫攔潼關也奪

民人婦九千餘家為梨花槍二十年戰蕭娘呂姥布為奇兵陳

珠章丹結為粉陣將誑光顏以名姝故艷女巫以國色石虎以

女騎一千人為鹵簿是可忍也靈臺以女官十八等習步馬誰

能禦之本帥尚書惠渡渭以來時萬勝之旗斷七盤之嶮啣枚

縛馬間道燒營不難井底行軍地中鳴角命闕稜脫此兜整使

馬懿禽其中帆而蜀賊徐添德王三槐冷添祿等又連破東鄉

隣水梁山新寧

達州賊徐添德與弟添壽初起亭子灣一弟添富起太平之城口又巴州賊羅其清弟羅其書哥文明鮮大川起方山坪通江賊冉文儒冉添

元冉添泗起王家岩太平賊龍紹周徐萬富起南洋關東鄉賊張子聰廣向瑤起豐城大寧賊

陳崇德起老木園其時官兵大半赴楚故徐賊連破渠縣廣安州隣水長壽大竹梁山新寧開

縣歷踞守金鷲寺重

石子而諸賊響應也

楚賊姚之富樊人傑王光祖高均德等又走楚

入川連為聲勢

由豫陝入川之通江竹峪關至東鄉與徐賊合王氏為黃

號餘賊定以青藍白為號雲陽奉節二縣有月藍線號云

媳婦入

百瞎巴三千通江竹破漢中齒寒緣是臥虎饒風守罷箭筈歸

師勿掩大敵未除當雲屯劔閣之時有鐵鎖巫山之勢慮爾漢

南士女拒戰無金龍之妻登陴無任城之母睢陽代父木蘭尚

未從軍荀女潰圍灌娥不來借救是用徧檄鄉民告爾村岩孔

枯前年十二月某日齊王氏竄渡滾河以田雌鳳之妖兵無沈
 雲英之女將致呼彭樂為癡男反笑張良如好女夫非仁貴敢
 衣白袍婦豈馮燎亦張錦織入川之日聚明珠翠羽為營包原
 隰山川而陣明馳千足侍婢百刀加以雲來霧去劉雄鳴之妖
 言劉之協往來妖煽懸鏡燃燈天梯山之左道雞泊之中山棚之內公嫗
 山娶神巫祭牛晉水部藏其畸人陸法和麾之羽扇遂令黃巾
 到處傳張燕者冲飛赤眉軍中笑齊巫者輒病此翠翹呻吟於
 歌樓賽兒急裝於草澤女賊王囊仙亦起南籠殺函險澀襄郎蕭條河西城
 門幾於晝閉陝賊馮得仕等起與安府安康縣之大小米溪連安嶺汝洞賊王可秀成自智胡知和廖明萬等陝甘總督宣陝西巡撫秦剿之而張漢潮又攔入
甘肅之徽縣成縣等處緊可恨也今本月某日檄奉伯大將軍明大將軍德
 圍剿黃號首賊齊王氏於鄖陽之卸花坡投厓而死高教曹鼓
 蓋而來周亞夫從天而降輕呂劍好小白頭高始則鶴團鳳隊

部其女軍忽則屏風臺盤散其肉陣是以馮緄之婢未脫戎服
 金溪之首已傳洛陽日觀弓鞬小燭燒作朝天粉首油髻聚為
 京觀楚幕無烏漢幟皆赤矣本帥才愧李陵未能先誅女子將
 非孫武焉能驅戰婦人用是變其徽章乞此匱印昨到檄文知
 貴州狎苗女賊黃囊仙亦已就禽奢香用命龍場之九驛全平
時女土司官龍囊仙為貴西兵備我叔朝梧所部龍氏年一十八歲勇冠一軍拔柵登山皆伊戰績槃瓠歸來赤髀之橫裘不反
 而青號賊張漢潮白號賊高均德藍號線號月藍賊冉添元龔
 文玉林亮功并別賊馮得仕翁祿玉李九萬等尚復竄沿四省
 劉之協逋逃未獲 朝廷以經略大臣勒經略大臣那節制川
 楚甘陝豫五省軍事獨川賊徐添德一逆自踞守金鵝以來破
 州陷縣最為狡毒猶欲全窺楚境本帥盪寇窮林揚威鳥道蜀
 丁通路遁甲開山空子午魏延之谷部庚辰鴟脾之兵若不攀

木緣厓急趨綿竹張燈夜宴竟奪崑崙猶恐雌龍已醢牡馬重
遊牝虎方除雄狐又跳今剿洗通江冉文儔一路已畢鳴犢出
沔卷甲趨川絕吳玠之名姝烹張巡之愛妾燒山索介砍樹書
龐務使胡蘭獻首散之蒼梧張豐破囊槌其肘壘蜀山之鬼鳥
無啼雲夢之虎狼不補山空谷靜東馬懸車今檄爾漢南川北
官弁鄉兵樵乾登豆飽櫟巡城火馬灰囊奔車殺賊 天兵有
九路之師涼州有三明之將凡爾韋彪杜虎之勇竹園水滸之
團守如玉壁戰若昆陽或有檀鄉鐵脰大彤之賊左髭雷公牛
角之妖歸誠闔下用間賊中亦復署之戰簿書其級功本帥置
以赤心誓如白日漢三十六萬甲子同此蒼天隋六十四路烟
塵誰爲好賊 國家儒館獻歌戎亭虛堠萬萬年矣今當本帥
府拔柵遶行爾等於齊王氏傳首 瞻黃到日仰謝 天

恩同呼 萬歲凡諸良善各安太平戴女媧補好之天莫作
愚人履后土夫人之地須感富媪檄到如律令

貴姬小傳

貴姬者始遇藍橋終歸鄂渚

以庚戌自鄂渚來天台
壬子自杉青歸鄂渚

五百年翺風之殉

十六院幸姬之首也貴人以裴晉公之晚年楊越公之威望春風好去韓滉還戎昱之姬蕭郎路人于頔返崔郊之婢其放一寵人也掀謝太傅之幃開王將軍之閣如魚縱壑似鳥歸林雖刺史賜斷之事在司空見慣之中得其所矣而惜非故事也至若張說門生誕敢獻夜明之簾李靖布衣放肆作虬髯之傳以押衙之參恩作沙吒之惡劫在李十郎葛溪之鐵斷罪過人頭賈平章妒夫之鋒斬犯中門客置爾朱馬肉盤中死嚴武琵琶絃上探皮囊之負心飲帷簿之盜血固其宜也而猶念春鶯而空晉卿之房望秋娘而造江南之曲使朝姝四姬同入出夜來一人獨居謂絳仙尚可療饑非小憐不能續命琵琶已去鸚鵡

猶呼吾不忍誤觸相公之響版也。目葛周愛妾多多將才私袁
盜侍兒休休相度則以爲願嫁烏孫愛通赤鳳而不知非煙鞭
婢曾無女奴漏言窈娘裙帶絕乏郎中詩句陰謀禹錫之姬豪
奪韋莊之妾非貴姬罪也。僕初到瓊臺便逢玉女仙客渭橋之
下內家車子之中臨邛縣令弩矢先驅天台山神吉祥敷座似
張建封燕子樓人在蕭遙光八柁輿坐夷光驚爲神人博士唾
爲禍水寓居於豐干樓者二月若華清端正樓中繖梳妃子如
麗華臨春閣上圍繞神仙七佛誤造其迷樓九蓮皆呼爲菩薩
度仙巖則二女來迎下天宮則七妃同妒布金錢於曇獻散天
花於龍華而又以三千萬佛汗之錢塑五百尊應真之像貴姬
功德畱在名山也。綠珠攜笛朝雲吹箎念奴度曲蹇姐彈絲四婢
中名產於月夜唱龜年大石聽玉環彈詞裂月而萬鳥齊鳴凝雲而
度曲山鳥驚噪

百花盡笑空山哀響猿猱之所未聞已予已歸杉青貴姬買一
宅花於予居之樓東牆東氏之舊廬也。靈夫人絺帷一拜纔聞
環聲劉公幹磨石五年豈惟平視日妾事司徒更衣侍尚書執
拂臺盤借肉雙陸行人十二年矣上華山則落雁驚人賦朝天
則建封還鎮郎君之所聞也。石太尉之園若荒孟才人之腸必
斷。古人云使百歲爲樂猶不過十萬日夜如白雲有期亦豈能
終老溫柔是以避陽臺於關中逃玉清於斗下小玉知李郎名
字內家識宋京才人無幾何時而若有黃衫挾彈豪士風神者
來曰予孟嘗君之舍人也彼薄其宰相不爲我死以醜夫爲殉
於時知馮無方非所愛侍郎以袁大捨爲憐才學士使方士遍
訪仙山命五嶽潛搜太白畱狂夫之身首掩夫人之壺漿勿令
其露焉而已矣。初時也玉簫諧笑許與韋郎青洪侍身欲歸如

願子亦借侍女靈光之賦索夫人大雅之吟也。一品怒而磨勒。逃無雙歸而塞鴻死矣。嗚呼疇昔之日吾恨不借荆娘狹女。勿此負人使崑侖豪奴斃茲惡犬也。節度使之門亦庶幾有空空妙兒精精紅線其人者亦曷可少哉。

為貴姬而開華山之道費錢萬萬子所得關中金石亦蕩然無有存焉。今虎邱之香山尚存白祠小閣而韓熙載夜宴一圖所以報貴人姬者僅存隨園集中一詩而已吁。

煙霞萬古樓文集卷三

秀水王曇仲瞿氏一名良士

與盧抱經先生論公穀書

讀。屈。原。離。騷。以。為。狂。人。毀。仲。舒。公。羊。而。遭。鬼。殛。若。賤。子。者。郭。泰。靴。聲。不。聞。吉。莫。陳。竒。論。語。久。付。薪。樵。荒。經。蔑。古。非。一。日。矣。昨。承。示。公。羊。辨。說。所。謂。得。館。陶。服。氏。春。秋。是。晉。世。永。嘉。舊。本。也。先。生。以。飲。酒。之。謫。仙。作。講。經。之。博。士。賤。子。不。枕。孟。喜。之。膝。亦。豈。食。皇。侃。之。唾。哉。至。後。附。穀。氏。數。條。所。謂。鐸。椒。之。解。不。足。許。瑕。邱。之。說。不。足。取。歟。元。魏。之。末。儒。者。繼。起。北。史。謂。其。於。公。穀。二。傳。諸。儒。多。不。屑。懷。先。生。何。不。食。大。官。饌。而。賣。餅。耶。

此書前後一千餘字篋中僅存此數語

報工侍吳先生書

尼山門下養徒三千太史奏來賢人五百昨先生示書謂手放
入榜獨心國士此孔融之妮禰衡謝鯤之泣衛玠非門生之福
也盧植學於馬融而不得窺後列之女樂彭宣學於張禹而不
得聞後堂之管絃俱無師恩皆登儒傳先生獨不記迦葉升座
阿難夜悲南能傳衣秀師擲鉢乎前謁邸第見闈者屏某門生
於門外而延曇於後堂擲粥則感郭泰之仁枕膝則彰孟喜之
過樊儵弟子皆是公卿鄭元門人誰非國器而使見愛者爲處
囊之錐見不愛者出公超之市曾子之門豈無吳起荀卿之徒
或有李斯則他日拂衣之惡割席之怨非教曇兄事子產弟畜
灌夫之盛意也登劉備於上牀勢必揖張憑於下座六月河間
奉書謂丁寬何以東歸楊時何以南去曇之東歸東中丞之招

南去蘇方伯太守之聘也。今之幕僚古之徵辟無宣明之面而居青油之安有僧孺之賢而容樊川之狂十倍於長安索米中書伴食矣。前歲同門王以錡榜發

上皇帝命御前進卷

另選一榜而先生呈勘落卷曇在第一非東臯師闔門待罪伯相公伏蒲請

恩則當日張文朱武魏玉孔金一時黜落

科場異聞曇爲詭遇此力辭別榜之中書而不願也。羊長和不追被馬帖騎潛逃阮光祿已走方山追之不及古之畏影今之救寒乎曇聞羊綏佳士不登謝公之門楊濟駿人畏入當陽之座而今愛士者纔一聞黃憲於人言卽力拔孟嘉於座次十金之雉而以爲鳴鳳也。楚王賓之矣蒙童之鶴而以爲能舞也。羊公譽之矣究而言之郭子元懸河瀉水語議無窮衛洗馬噉杵搗糞膏盲有病曇之炫耀自貽感爾西園之遊見柱國止車門

外置狂生第四車中此何平叔熱湯汗面之時王文度手版倒持之日若非顏回一座先聞仁祖其名何致西堂百人惟問伏滔何在耶太史公曰世言蘇秦異異事多附蘇秦班孟堅亦曰世言方朔奇奇事皆歸方朔不知語許元度於曲室之中才情自別進張孝廉於撫軍之座名理全無先生以殷浩手巾拭謝郎面汗丞相有帳中之客參軍非入幕之賓也庾征西料事方皇豈暇消停盛暑何驃騎文書不暇焉能應對元言七月從東撫軍至歷下魯婦人髮而哭者二千家檀鄉青犢之賊戰於鄖陽氏根白雀之妖麀於來鳳此范史氏所謂獷賊橫行正皇甫嵩朱嵩投袂之時陶謙梁衍獻規之日討匈奴以自贖出都亭而待罪毀闕子文一令尹之家立槐里侯蓋一世之業散折像之財空糜竺之富揮黃金如佛汗以犒軍出美人若宮衣以賞

士韋丹貨宅魯肅賣田破波才禽彭脫谷靜山空讓功驕將冠
鐵負鑽歸命司敗然後書牘背而乞恩止畫室以埃命使今日
稱郭况家爲金穴他日不作劉宏論爲錢愚策之上也鄙嗚不
能藏畢世之金鐵門不足守燕陲之穀潰塲雖痛勝於內食雷
香不踢豈能愛臍如此而竇憲之罪晚蓋於雉鹿班史之功亦
銘鼎於燕然此董崇之策而寇恂可以自全孫鑠之謀而石苞
可以無禍不然鄧氏鑄山豈無一簪王衍雷車亦難三窟策之
下也藥味嘗卑藥言獻貴塗麻油掌上豫見吉凶聽浮圖鈴聲
先知禍福所以佛圖澄遊諸石之間視同鷗鳥竺法深入簡文
之座看若蓬門先生愛一狂狷士而欲成其未有之功名豈不
愛一大柱國而保終其百年之富貴哉先生之言又曰
帝堯九十而倦勤則大夫七十而致仕此先生以經典析疑弟

子敢以史策問難宋史司馬光王陶皆以五十求散地呂誨五
十有八范鎮六十有三歐陽修六十有五富弼六十有八皆不
至七十致仕而時愛大臣者鷗鳥之賦陳振所獻赤松之詩魏
仲所賡圖五湖而恭公納節咏生辰而持國歸休雖少年之言
莫聽實退位之佛可做蕭嵩從容之言莊敏止足之謂王晉平
山資已足羊叔子盛滿爲憂良史嘉之至若田豫七十纔畱賢
路崔咸門生忽贊退休比夜行於鐘漏恐描畫於後生又稍晚
矣褚淵中書而在期頤之後周侯末歲而歎鳳德之衰此周易
甘臨之憂係遯之疾也先生倚馬萬言全牛一目召元武司馬
班固敕南宮東觀曹褒數十年矣張載文章遠鑄劔閣劉寬侍
講久在華光以今比古李元禮天下龍門是非名教庾子躬城
西公府名士門庭大江以南一人而已爲踈廣則祖道都門爲

賀監則鑑湖一曲。豈徒南山之蕨。淞水之鱸哉。曇譽比方。干狂非陳亮。有五千卷。崔儵之書。無三十乘。張華之博。上馬殺賊。下馬草露。布是所好也。左手操龜。右手執馬尾。非其時矣。是以匹練吳門。吹簫吳市。豈不欲抗禮將軍。長揖丞相。一筒餌。拜都尉。五斗酒。得涼州。所謂應龍以屈申。爲神鳳凰以嘉鳴。爲瑞虞翻不能避。糜將軍之船。而能避糜將軍之門也。太山之雷。穿石積燬之火。爍金楊匡郭亮。天下以爲美談。胡廣趙戒。千古以爲口實。以是脫雞冠而辭仲尼。立虎靴以俟王儉。遲先生於機雲二山之間。淞泖兩湖之上。左太沖招隱之詩。孫興公遂初之賦。徘徊五夜。馳驅一書。

工侍師二書

伏讀侍

宴詩先生建燕國延年之杖。乘明堂步挽之車。

魯恭待詔白虎觀中。劉寬侍講華光殿上。此三十年侍從之華。千萬禩文人之福。竊以楊彪八十而光祿。王祥九十而三公。竇熾拜太傅而榮。王琨加侍中而壽。丹青所記。史冊所書。輒以爲不及。山濤未如龔勝。此前書倦倦爲無隱之獻也。山中亦有宰相宏景。何如紫衣亦侍聖人。鄴侯可貴。與其相國而尊。黃老不若膠西而禮。蓋公語曰。藥味嘗卑。藥言獻貴。劉向之所忠也。鴻濤蕩嶽餘波。見漂韋忠之所憂也。曇年弱冠。過中書門下。見看衛玠者。如堵牆。觀狄青者。擁馬足。當是時也。知王衍必誤天下。豈必山濤識衛瓘。不免其身。無須杜預。特以徙薪。無徐福其人。損權無魏相。能奏我侍御曹先生以貴。主之車不避。赤棒霍家。

之奴敢躡大夫乃搏蝨而不及蝨披枝而不傷心猶以爲郅都
鷹擊臯陶鷹觸京師所貴先生所知也嗣是而後名藏太室形
圖凌煙譽者謂林甫美相見者謂處仲可人積漸之勢而子魚
大於宮中黃柑美於供御杉齋侔於延昌花石侈於艮嶽王涯
井飲寶玉真珠劉惔靈光淫聲艷妾請考功地以益田蚡乞肥
牛田以富張禹方鎮必賂廷朗貢獻先輸梁門地衣媚侂胄炬
燭獻申王練布千端一時增價蒲葵五萬頃刻生風尚無王導
震主之威故無石慶反室之詔而俛眉承睫之士乞兒向火之
輩爲大參拂鬚與太尉濯足吮總管之馬膿嗅相公之靴鼻手
捧溺器口承唾壺幾幾乎恩府恩父措笏開籠願相公百二十
歲矣幸而班固傅毅之流未充幕府禹錫宗元之士未立權門
屈已不過呂諛傾身僅有徐紇頌功尚無張竦懷刺惟見崔暹

及王銍兼二十餘使國忠領四十餘職於是范溫蘇過盡是通
家丁北巖南無非孝子或畫日獻筆或賣鼎呈辭或一斛而得
涼州或萬緡而改宣歙或尚書由竇或御史呈身師旦獻妻程
松納妾媚史王不殊鷹犬諂安石無異家奴至於今日而祝欽
明踞地搖頭五經掃地楊子雲周公以來無若安漢之懿已北
史盧祖詢曰我昨東方未明過和士開門已見二陸兩潘森然
與槐柳竝列今者沈約之流多於老鼠元稹之類不少蒼蠅昏
夜而參丙吉臥內而見文場續命之物黃龍之湯見幾者以爲
與受和凝之衣鉢不若不識和安之北斗也指楊右相爲冰山
識張昌宗如海市桓公之裘企生不感孟德之財良家豈汚而
欲以屈駘奴婢之室爲孫宏招賢之館且欲以曹公自家之金
鑄呂布將軍之印乎以匡衡入史高之幕經生羞談以崔駰爲

竇憲之賓。白衣何補。曇擇澤求蹊。披榛覓路。韓愈門生。寧爲馬勃。梁冀席上。不貨牛黃。日者吳會。棲遲長安。西笑所謂。伯陽入秦。及關三歎。梁鴻適越。登嶽長謠也。夫位高者疾。顛嗜厚者腊。毒視遠知。晉厲之亡。舉趾識莫敖之禍。豈有鳧毛龍鮓。博過張華。牛鐸勞薪。識同荀勗。而不見虹霓之雨色也。毀家之說。旣不信於鬪文。折翼之夢。恐終應於陶公。誰爲鮑生之言。徒負召平之弔。一亞父不爲置箸。百張良不能爲益世。豈不知陶桓公珍奇寶貨。富於天家。金谷園玉色。金聲別於婦女。而猶愛香啞臍。惜指失掌。安知戴法興之鑰匙。不爲大盈庫之寶藏乎。來書謂密康必禍。羊舌終危。謝晦將亡。門庭有籬籬之隔。延之不幸。平生見富貴之人。先生亦見其溺而不救也。危而持顛。而扶孔子。所以待季氏食。云食坐。云坐平公。所以事亥。唐今稔知其山非。

銅陵家非金穴。埒無錢溝地。無黃鐵徒有迴天。獨坐之名。迄無四貴五侯之實。此梁商薤露之歌。酒闌上巳。孟嘗雍門之琴遊童。牧豎矣。呂種豫禍。纔知馬援神人。奴輩利我。始信石崇東市。竊聞胥靡之人。登高不懼。彭祖之慎。觀井爲憂。是以稱疾竇威。急歸田里。棄官褚翊。避地幽州。裴潛識者。去劉表而不依。許邵歸乎。見陶謙而早捨。前書未盡。望馬吳門。何日見歸雲之慶也。起居萬福。

工侍師三書

示書謂暨艷盛明臧否陸子璋戒其必傾張温清濁太分諸葛公知其有禍此馬文淵之教子姪惡國武子之招人過也曇聞翟威壞陂天帝亦怒桓譚鼓琴宋宏不樂昔者周章以太守親竇憲爲憂袁宏以伏滔在桓府爲辱今高幹旣無雄才鄧騭豈能好士此楊駿辟王彰而不就張華聘韋忠而終逃也陳咸受父命不從駱統辭母面不顧有自來乎田竇居中廉藺處外而泄泄者以景升木偶子陽俑人當公鼎之重居在人之右蒺藜失據鳩毒爲甘遊其門者非温太真謬敬王敦詐交錢鳳卽周尚書陽爲姦毀陰取封侯爲之危矣楊炎爲元載復仇盧杞與劉宴報怨將無有賣丁大全之直聲試陳宜中之反覆者明日發竇參之贓必有敬輿他年斲林甫之棺誰爲李泌耶聽三言

者成虎指千夫者無病而况爭棋已禍伏西鐘穿堦已釁成東市豈霍禹之關將斧斬而王伾之門猶羹沸乎聞之出處在於機先去就決於事始聽洛鐘而知銅山之將崩聞馬嘶而識主將之必墮是以羊欣自疎於桓元蒯欽自疎於楊駿刁約用事而荀邃疎之義康用事而江湛疎之先生以晏嬰之望阮籍之曠陸機非好遊權門杜預豈喜事朝貴彼將師鄭元以重諸侯交張華以光董灼班固燕然之銘馬融西第之頌務觀南國之記潘昂錫命之辭先生皆無有也而猶恐盧仝終累於王涯令狐或傷於元稹者嵇叔夜之形交未絕鄭當時之請謝難辭爾中台圻而彼不知第門壞而彼不悟朝夕之間一節入其北軍飄風失其儀蓋國家棄竇憲不如孤豚刺袁盎何須十客卽不然而長平故人移於冠軍魏其客士歸於武安欲回王雅之

車思散翟公之雀呼吸變遷矣先生知處仲非忠臣識安石誤天下惡絳灌無文懲博望不學亦嘗笑晏颺管輅與泉下人語也今日之勢爲禽息則憂國而爭爲廣德則止車而血列癡相之罪褫獨坐之權使范睢一言而穰侯兄弟皆廢石顯一徙而充宗黨友皆安則一簡之紙百世之史也然後借荊州之布帆飲秋風之蕪菜辭司馬光洛下耆英爲白樂天香山九老時蘇郡建白公祠錢辛楣宮詹家蘭泉司寇趙雲菘觀察陳東浦方伯王夢樓侍講諸公皆進先生歸爲九老會邴原曰公臣不事冢宰君在不奉世子况當此日月重輪之世而不爲朝陽一鳳之鳴乎趙昌調倭敢害鄭崇張禹帝師豈畏王鳳必有助先生而攀朱雲之檻者上聖主賢臣之頌王褒釋屣而來讀忠臣義士之書尹勲投編而歎一疏待漏馳念寢興

上都憲師四書

先歲二書兩蒙獎答一書不報寒暑憂思昨閱邸寄知先生晉
升總憲喜極無眠以伯璿爲耳目之官以君牙爲股肱之寄露
章請劔去佞拔山躡巖相之一樓除秦門之十客在此時矣霍
雲家倉卒之日上客頭焦郅君章奏書之時狂人膽落夫權傾
天下不疑功蓋天下不忌侈窮人欲不貶郭汾陽可以當之儀
禮比於蕭何封邑比於鄧禹賞賜比於霍光梁伯卓非其人也
今者賜步挽以寵尉借明光而避暑珥貂插筆決奏於休源之
前南面黃綸畫敕於龍駒之手侯安都供帳稱觴韓侂胄假筆
升黜見一斑矣驚先趨則誤拜江都着黃衣則醉呼萬歲凡諸
故事略在今聞而且林甫恐對策言姦尚書覆試元載禁百司
奏事先白長官前者鮮于討南詔大敗國忠署其戰功劉法爲

夏人窮追童貫隱以捷報今復使王衍營三窟之計弟非敦戎命謝元督淮上之軍人皆巷議姻戚若樊靡卿之父子竇廣國之弟兄有幾人哉褚裒國戚猶讓大權於會稽王蘊封侯能避恩澤而不拜今則受爵天朝拜恩私第雖無荊州十郡女壻實用謝安一半門生入捷徑者指爲終南至昇門者此中輻湊蔡義可制居然霍光關播不言儼然盧杞運掌而賤吏富於季孫咳唾而爛羊貴爲郎將服食次於尚方園林侔於暑殿膳夫庖人繡衣錦綺珠襦玉柙秘器東園總其欸迹具在前書以今喻古所謂毛髮灑於奉冊芒刺生於驂乘在此時也而又有猩猩死酒蚩蚩負驢寧烹五鼎甘臭萬年者爲之羽友哉都憲爲漢御史大夫三公之貴居丞相之次在將軍之右非梅福上書申屠對策可以比擬也先生乘徐樂瓦解土崩之勢爲賈誼流涕

痛哭之奏捧

日天門徒薪曲突或不至然臍漆首殉以廚車亦不致鵲喜蛇迎罪干虎睡

兩宮有八議之恩九卿

有十宥之法爲昭平豫贖死罪使曹爽不失富翁賈爾朱緩其牛刀寬宇文遲其玉璫則先生厝

朝事於太山之安存丞相

於牘背之上矣我 國朝康熙二十七年御史郭琇參奏大學士明珠七款早申一疏夕

命三褫載在

典章藏

諸 歲史昔者漢宣帝知霍氏不善早在民間唐代宗收元載端目盡出禁中而况我

今皇上日月離明雷霆震出

及今不劾而先生嘉謨嘉猶曠官曠位一朝蕩然矣夫事之急者不能緩言心之忠者不能諛聲高彪覆刺而投書迫也劉陶驛馬而上便宜激也曇糟粕書生都養弟子以枕膝感孟喜之恩故發被露楊軻之醜亦知廉頗當失勢之時故爲潘尼作安

身之論。倘引嚴郢以發揚炎。假庾準以傾劉晏。則非先生仁者
之用心。而事亦緩矣。劉向曰。執狐疑之心者。來讒賊之口。持不
斷之意者。開羣枉之門。若彼相居累卵之地。而尚圖太山之樂。
為朝露之行。而猶思傳世之功。則請先生以是書上之。彼相身
當披鎖。甘服上刑。述王雅之生平。書生膽大題曹公之活字。相
國門寬。

與兵侍周石芳先生書

西園謁別承以尚書尺牘。介交淮南鹽權。又承以細生出處。譽
薦河隄水工。良士陽鳥戀南塗。馬知水緣。是未稅邗江先。遵睢
上八月二十五日。見松圃尚書於河澣行臺時也。田蚡視水。延
年之策太多。汲黯治河。淮南之病不減。命寓河干。恭候章下。
九月八日伏聆。諭旨不準人員納草。投効相如。慕黃霸一
郎之貲。未籌買臣學。西施半肩之薪。莫負餐珠析桂。遐想龍門
背坂。面隍積傷。蟻慮罄十九年。袁宏土窖之情。叙五十歲。孟郊
無官之故。初良士之待詔公車也。不欲碎胡琴於都市者。欲為
端人。不忍彈鬱輪於主家者。畏非佳士。是以麒麟寧糜身於魯。
經渥注不自媒於漢殿。語曰。相馬以輿。觀臣以主。此良士始入
京師。逡巡趁起於時相之門者。豈期埽門魏勃。未見曹參懷刺。

彌衡已逢黃祖嘉慶四年以師門芥蒂之嫌車後塵囊之垢錯書舉燭誤點飛蠅遂轟薦福之碑忽破太初之柱當時也腐鼠飛鳶欲亡虞氏箜篌漆匣幾殺王彪都察院都憲吳師晏嬰民望苟爽人師不先淞水之鱸致拔仲尼之樹良士梁鴻適越早到蘇州劉超閉門絕無賓客當日之畏影匿迹救寒止謗江南人士之所哀憐者已辛酉壬戌復以靜菴少詹之知先生賞愛之酷更生之傳虞監手抄會稽之碑范雲背誦幾使劉歆忌口醬瓿莫覆竇融飛書洛陽傳寫矣無如昭君面醜不勝劉白之圖墨翟書多未免弦唐之怪此東坡典貢舉而李廌無名承叔修五書而韓通無傳者也李白曰千鈞之弩每發不中則當摧撞折牙安能效碌碌者蘇而復上哉冠一免而貢禹不彈門一杜而汜騰不出是以吹簫歸去仍居胥相之城廡下春來終守

要離之墓妾非彩鸞寫唐韻而賣錢婦是唐寅買丹青而換米擬以爲荀曇禁錮不過終身王通著書老於河汾可也何圖李衡種橘有賢妻竊笑之時劉凝隱居無夫婦遊山之福一雌忽飛五倫遂絕於是逢萌迷路不識東西羊曇西州無非痛哭此戊辰辛未以來挈子拋家重蹈燒龍舊路也昔有勸李賀必舉進士者而李賀不從亦有勸桑維翰無舉進士者而維翰不聽良士左思溷上歲歲三篇袁虎馬前年年七紙蓋蘇季十上不行實陽嶠八科皆中也考漢郡國舉士皆取少年能報恩者良士四十五歲矣尚能夢中咒柱乎馮唐九十忽舉賢良唐都百歲居然待詔未必然也舊年都下讀先生山西程式諸刻人則郝隆滿奮盡是高才文則橘柚檣梨無非美物加以攀安提萬說項推袁幾幾乎會凱下第欲爲釘足稱冤王褒愛才竟與門

生擔飯矣。良士胸中柴棘大半是。國家經濟之書夢裡江湖
小試亦治世農桑之具無奈。柏耆杖策不會遇裴度。於淮西馬
周年華不忍諂常何於幕府。觀黃河積石之難思睢水囊沙之
計乃復逍遙河上。徒賦清人黎陽亭邊空歌瓠子。是又詭遇不
得驂王良之轡異途不能呈卜式之身良有然也。凍蠅不翼沖
天之飛焦堯不救夸父之蹶仍歸舊隱有地蒔花欲上揚州無
錢跨鶴祇申忉怛馳念安和不宣

煙霞萬古樓文集卷四

秀水王曇仲瞿氏夏格

總統閩浙水師浙江提督壯烈伯李忠毅公神道碑

當嘉慶十一年五月公北汕失利之後漁山受傷以前某以鴈
蕩山遊謁公於雙崑之泊別公公哭指酒尊而誓曰子知老夫
之在水師乎蓄憂者喪心急死者喪勇事成勿議則劉向不必
爭陳湯之功致死若寃則李翰必爲我上張巡之狀逾月某以
遊輿道松門路人藉藉謂公已入鹵水犯霧露逼手搏披六創
漂舟蛟門吏民荒荒不知公之存亡死活也某笑曰將軍死矣
全名爲上全軍次之全身又次之今而後將軍之厲爲神將軍
之卒爲靈將軍之寇殲將軍之海平矣又逾月渡浙見邸報知
閩大吏誣公逃寇陷公以必死後先一日浙中丞以公負重傷

入告二章交上 詔復公翎頂於是浙百姓呼天而譟曰

皇帝聖明見萬里外將軍生矣嗣後剿東湧擊粵洋之大星攻浮鷹禽斬殺獲又數十死戰惟閩大吏之露布是聽遂以戊辰十二月二十五日黑水洋之戰日奉四檄逆風攻牽薨於礮窰之日常州洪亮吉爲公墓誌叙公爵里戰績 旌功堂贈之典詳且悉某讀而慟之慟史官於公未知也乃目實事耳敗狀心公死志將爲官紳將吏擬文以表之阡曰 朝廷以浙閩鎮協之不總率也故授公爲統帥以州郡軍火之急供也故許公以專調前制府郡王之檄後巡撫阮公之奏莫不聽公便宜假公號令後之節度我公者亦第如謝安圍碁助阿元破勢寇公飲博慰真宗怯心搜南塘察舫下逃人登首級受國淵實數急則嚴助之救東甌斬一司馬緩則法雄之追海賊降五梁冠而

且遲以孫武五間之謀柔以臧宮緩賊之計如是而公以路博德之樓船馬仙琕之生死擒龍出水誘虎登山招鳥入懷縱魚去壑戈船下瀨畏其麾橫海伏波受其令如蛇首尾若手左右兵法所謂無地無天獨來獨往者賊不活公不死也公之死蔡牽以三舟檣島距公洋半更耳先日寇蹙窮門魂遊天竈一山當背四壁皆天出下策不過生降動長圍便成死地公因山爲壘以逸待勞避不周一夜之風了傳首藁街之事姑爲張步開一面圍者約楊么當八日擒耳何圖事敗垂成功隳熟計闔督以龍駒畫敕之華飛金牌十道之書以辛毘軍門之威爲臺使封刀之嚇日不三竿檄凡四下謂公今日不戰則胡建先斬監軍謂賊今日不禽則莊賈必殊大將夫伏波非西域賈胡豈肯壺頭不進况朱蒙非河伯外甥焉能魚鱉成橋勸公者謂詔書

尙可封還臺教豈容中制扇非諸葛何地祭風術少藥巴無人
喫火彼以大海爲澶淵我以將軍爲孤注乎公斫舷怒曰此爲
生賣布不如死走達矣於是温序銜鬚章邯畏口夔牛三震海
水皆飛螿弧一麾天風盡黑悉呂蒙鱗艦精兵斷黃祖柁櫓大
繼露橈冒突盡去長緇攢柱枋箠力揮大斧約以孫權箭滿船
平之時各爲畱瓚披髮叫天之戰環槍務蔡蔡必速飛郎機搏
人人皆著翅公猶千牛備身七賢扞刃雖糜芳船上人多有許
褚馬鞍藏蓋一鈎忽接彼槳齊摧兩艦方交我兵皆上當羊鯤
抽稍出艙之時正侯景透水無逃之際蔡牽鬪樓而窺踊楫以
俟望典韋五步之戟將到持陸遜一茅之火而死矣而牽之奴
林小狗者陣門鼓蓋偷識高昂軍中白衣遙知仁貴覬博浪狙
中副車畱阿奴火攻下策桅樓出藥窗眼藏槍公不知天狗墮

地之一聲有大火心星之一落也誰實使之誰實死之非仲長
統所謂叫呼蒼天號啣泣血者乎初閩督之官公醺酒歡間公
後退靳公而笑曰知古所謂兜鍪無勳貂蟬足貴乎母寡王之
頭能假至飛將軍之侯必真得矣名將躡敵神巫追魂耳君何
不以露布書告黃巢授首我能以崑崙船助魏收奇貨也如是
達旦公大怒曰于清端之捉賊姚靖海之用兵長庚所知也
皇上所以稱鉅鹿李齊每飯不忘者天也所以使買臣治軍東
越欲度尙掃平南海也命以元謨刺史軍事則虛張戰簿罪也
命以褚蘿都督水軍則餓絞入口命也公阿利樓船宜其畏水
我安成齋舫不畏遭風今日李廣生劾以失道可也他日李敢
死諱以鹿觸可也長庚身出驍游止披衫甲大府躬居常伯已
戴貂蟬謂賀拔岳不讀兵書卽馬季長不闕忠經乎公何其以

鄧。騭。之。肉。塞。李。充。之。口。推。几。而。出。密。以。語。客。客。諫。曰。將。軍。誤。矣。
華。登。不。死。而。假。裴。華。登。之。首。則。揚。徽。之。徒。勝。矣。林。卿。不。斬。而。借。
懸。林。卿。之。頭。則。建。鼓。之。人。無。矣。朝。廷。六。合。爲。家。九。藪。爲。囿。燭。
龍。緩。照。誰。非。蒼。水。元。夷。岳。瀆。窮。搜。盡。是。天。吳。水。魅。將。軍。以。旱。魃。
應。龍。之。師。收。鳩。脾。桓。胡。之。卒。能。包。化。內。淮。渦。亦。是。水。神。不。察。淵。
中。罔。象。亦。爲。寶。藏。客。以。爲。蚩。尤。有。搖。尾。之。樂。其。工。必。無。觸。頭。之。
怒。自。見。閩。浙。用。師。以。來。馘。高。熊。耳。兵。白。人。鬚。牛。羊。亦。大。漢。畜。生。
魚。鼈。亦。上。天。赤。子。將。軍。思。劉。安。間。忌。何。以。不。降。南。海。之。王。高。帝。
良。平。何。以。不。擊。橫。來。之。島。非。以。楚。購。伍。員。而。伍。員。讐。深。漢。求。季。
布。而。季。布。名。大。乎。將。軍。知。汪。直。徐。海。之。力。勦。爲。有。明。姦。宄。抑。知。
朱。清。張。瑄。之。不。力。勦。爲。有。元。功。臣。則。奏。而。降。之。可。也。不。然。如。蔡。
牽。者。禺。隴。海。宅。滯。梁。舟。居。季。漢。之。張。伯。路。非。殘。晉。之。徐。道。覆。也。

軍。中。張。燕。聽。其。冲。飛。河。上。孫。恩。憑。其。水。化。若。將。軍。必。欲。函。盧。循。
七。首。焚。大。雷。千。舟。掃。空。鳥。獸。之。門。涸。出。鼉。鼉。之。宅。海。非。蒲。類。功。
不。雲。臺。備。少。千。刀。沙。長。萬。里。入。居。風。無。功。之。中。恃。紙。船。稍。工。之。
險。一。旦。張。仵。風。鳶。不。通。書。紙。管。寧。神。火。不。照。將。軍。睢。陽。之。力。已。
盡。青。蠅。之。矢。積。階。王。濬。爭。風。石。頭。不。利。匡。衡。內。訶。司。隸。下。章。客。
恐。李。息。之。畏。張。湯。今。日。始。也。公。曰。客。亦。云。然。乎。虎。飛。食。肉。豹。死。
畱。皮。長。庚。與。蔡。牽。同。日。死。不。與。蔡。牽。同。天。生。矣。鹿。耳。門。之。圍。遂。
有。譖。公。爲。北。汕。縱。走。蔡。牽。者。曰。賊。之。鹿。耳。沈。舟。窮。寇。也。龍。頭。絕。
港。死。地。也。李。某。以。江。龍。上。流。全。軍。守。濡。須。藏。舟。小。鴨。障。官。軍。耳。
目。之。明。活。賊。人。肝。臟。之。裏。在。垓。下。已。圍。成。十。面。卽。落。水。亦。不。失。
三。公。不。以。此。時。掃。赤。壁。膏。油。薪。火。之。兵。爲。覆。舟。麾。折。幡。沈。之。戰。
升。活。人。以。示。攻。具。謀。死。間。以。誑。降。書。而。乃。捧。土。填。津。丸。泥。塞。谷。

五條鐵索空鎖巫山七日李牛遙觀天漢使蔡牽鑿破凶門呼
開蹕路潛播水底之鈴響撤城門之網鐵鹿無聲油船竟渡謂
非縱歟不知銀刀代將者客兵也黃金行間者陰謀也劉文叔
之燒王郎私書者安反側也張世傑之辦香籲天者乘颶風也
蔡牽先以銀錢四百餘萬遍秦臺灣公園中半是閩兵部內無
多浙將從田橫海島者五百人入廣州城門者三十萬上有桓
閔被睽之刺史下卽有天雄魏博之驕兵雖不殺蓋長史爲負
天已蔑視瀟上軍如兒戲而公猶老羆臥道白棒無前矢中酒
尊淮陵不動者所恃一船尺藉猶魏尙家人之子兩廂孤兒皆
德威父子之軍也又數十餘日李遣變童踏小舟遞公一札學
日本致書作匈奴謾罵遺馬懿巾幗內已藏許貢之刀奉高乾
布裘外已結柏人之壁公收梁罪狀燒其獄辭獲宋狂狡殺之

滅口苻離臥而甚酣子反飲而大醉當其時四面楚歌不驚頂
羽而一栝纘酒氣死吳規矣公乃撞破酒鍾陣開旗鼓率董襲
五樓船爲郭伋一士鬪無如東北圍成方擒朱泚西南風起忽
助侯瑱呼餘皇而長鬣無聲叫倉兕而太公不應東明之渡無
橋石頭之舟已遁公以爲孫處番禺之海戰坐守虛城而不知
田豫成山之水陣已陳兵空地矣此趙充國之所謂兵事百聞
不如一見者乃楊僕之偶失真真非高皇之不善將將也漁山
之戰公士變祈死賈復輕鬪內懼杼投外憂盃影乃誓祭三王
白虎之船走了盱抱河之陣集垣護斷鐵長柯之斧約韋叡焚
橋灌草之兵以是年某月搏蔡牽於舟中桅煙臥水帆火烘雲
陸渾之燒海赤睢水之血天腥百舟鬼爛萬刀魚吞公投不磔
石登不懸布橫屍一艙懸命四手諸葛亮之七禽七縱老生常

談韓昌黎之再接再厲。鬪雞聯句。呂布拳捷。石勒手毒。丑父傷肱。桓魋腫目。魏犇索胷。林雍鑿足。良夫披髮。華元皤腹。搏人未投。枕尸已哭。公以爲退。原原降圍。鼓鼓服遂。乃辦葛榮之長繩。回頭縛虎。牽忽掣董公之手。戟反面當。熊衛侯手。揆子犯戈。逐中肩中背。志眉志目。及黃蓋之走舸。方來而慶舍之俎。壺中面矣。於時友亮兵驕。難星空過。元規船小。風順隨漂。蛟門之泊。譖公者謂虬髯已入。暹羅陸賈。竟降南越。不知浙撫方以萬金良藥救活。灌夫而閩督急以一紙鑄章乞收。延壽豈非彭汨陽之軍中盤腸大戰。張宏淵之靈璧播扇。清涼乎當是時也。朝廷宵旰早知。周處無援。大海汪洋。畢竟張良大索。天子不懲李邑。知將軍何恤。人言更慰孟明。謂勝敗兵家常事。乃還公章。服勉公捷音嗣。是村畱海醜。年年魯班圖形。禹將庚辰日口巫。

虎大戰轟一炮戮蔡牽從子一人。鬪幾刀斷蔡牽大桅半段。使此後粵洋之戰。黃天蕩稍有濟師。鄱陽湖或逢後。至則蔡牽在南海擒矣。此聖上所以優叙公功。切責粵帥馮將軍之垂翅。回溪方將奮翼。澗池者也。公段頰性剛。趙雲膽大。胸藏伐惡之城頭。直弼公之華寧。持銅面不踏金靴。自從事林爽。文平定以後。犯石頭。凶氣指太歲。逆行戰則銚期。攝幘臥則什門。衣虱登門如投稷。蓋入水不著龍工。戈來肩受劍。至項承以致周秦一身。皆如刀刻。孤延鬚鬢盡被雷燒。嘗謂郡王福康安曰。長庚破家爲國。惟火藥非私家自有。以故二十餘年。蒙山不問海師。鎮惡船皆自造。素不標異。或商賈白衣。呂蒙之櫓。自搖或袒裸赤身。陳平之舟。手刺鬪霹靂。萬槍之中。戰魚龍一船之內。公意恬然。賊亦不知爲李將軍也。性樂士卒。泗水則崑奴。投身燒船。

則魯奇應募公之功平安南夷賊擒偽官倫貴利爲最多三盤
舉之戰公樓船旗鼓甚盛夷人見者皆以爲河伯水神敖曹地
虎黃龍高艦楊素江神也颶風助公覆夷船數百殆盡俘斬數
千人公舟無恙夷患遂平蓋自北汕以前已計一百一十七戰
公所至脩學校立義倉讀史慕曹褒葬射聲營棺百數於是鹽
倉山下年年親祭亡魂黃雀樓邊夜夜手埋戰骨好讀書樂靜
坐喜爲詩贈友有諸老定誰先賈誼有司偏不第劉蕡題竹有
偶然誤入篋管谷錯認軍中十萬夫句皆餘事也夫以公之才
閩越和衷文武秉志如徐幹之助班超杜預之代羊祜早見木
華海賦灑乾烽火之樓道濟長城築出迎州之外何至鑄伏波
金印犬字未成製五百斬衰海神先哭豈非使楊大眼馬上行
屍斛律金往來如雁者皆陰子春之洗腳天雄軍之誦經敗之

也。今雖戶帖桓康家畫成慶揆公始志實喪初心此來歛之授
筆抽刀周瑜之背創盡裂者歟。皇上慟公忠誠哀公壯武

蜀中鼓吹迎歸龐德之屍詔告瑯琊高作伏隆之墓諡公忠毅

封公爲壯烈伯養子二長廷駒舉武科早卒以次廷鈺承襲
公諱長庚號超人同安人曾祖思拔祖宗德父希岸彰化縣生
員以公貴公以乾隆辛卯進士藍翎備宿衛出爲浙江都司副
將擢海壇鎮總兵其初閩也嗚呼盤龍血戰生無父子之兵徐
福童男死飼螟蛉之肉聽滕修四丈蝦鬚之說海上誰傳讀梁
竦封侯廟食之談望洋長歎昆邪莫泣李廣是天下無雙書生
不文王雅亦一身是膽銘曰

張騫鑿空博望則封將軍而飛死則無功殺身也孝喪師也忠
將軍之噫於海爲風經天一星與公同名退天三度賢人下生

天狗墮地。譔譔火聲。將軍心赤。他人膽青。不生不死。不神成我者。君殺我者。身子我者。親死我者。臣老子曰。死孔子曰。仁海之爲物。居地之外。名之一字。於天爲大。龜鼉蛟龍。中有萬怪。心星一火。公不務。蔡封侯。廟食朝廷之德。死則千年活。則六尺。麗德之屍。將軍之骨。哭公之淚。其名曰血。

繼室金氏五雲墓誌銘

夫以情愛爲穉。稗瓦甃者。天神好女。革囊之盛也。以生死爲屍。輪蟲臂者。鑊邪夫婦。不祥之金也。予自嫡室朱氏。梟香亡後。浪迹金陵。流連吳會。覓劉延明爲壻者。一席常懸與哀。駘它爲妻者。數十未已。或厚貲以女。陳餘或貴家以媒。李益或夫人半老。親書大雅之陰。或侍女憐才。偷讀靈光之賦。金陵大家青衣競誦予得解文字謝道蘊雅人。深致卓文君。放誕風流。六族訂婚皆同時閨彥予概允之。而心有待也。

會稽金氏系出炎漢。其宗祠在金坂者。奉光武以下諸帝神主。與劉氏不通婚媾。馬明德之。但慕竹帛。鄧和熹之。惟供紙墨。以故世世子孫。有女德焉。受經書於大家。從祖母受儒經佛典借筆硯爲博。

士織錦寫太平五言之頌。迴文書天寶八百之詩。年十三手書予所作織錦迴文爲蹇始則采三氏長女禮羸。字五雲者。爲高明最鳴乎。伏勝之女。曾

傳父書班彪之愛亦傳家史采三氏以子托名場自悲世外遂
乃索温嶠之鏡臺解馮京之金帶郗鑒方求佳壻范遠初舉孝
廉以乾隆五十九年十一月四日婚於山陰諸葛擇婦徐邈選
壻適相合也以有涯之生賦無家之別辛壬癸甲塗山娶女之
期子午卯酉舉子當梁之歲三夜不會息燭四日而就公車錢
江遂為天河雲間隔於日下子挾柏耆之策寓常何之家淮西
未見裴度京師識為馬周以秦楚蜀三隅林莽交錯建清野之策獷賊橫行書生落第無
可歸也而時諸老先生或以桓開幕府嘉賓才可參軍收本知
兵僧孺索為記室相府薦伯耆而侍御范師亦薦子贈郡王幕下伴來瀛鄭馬走燕齊木蘭許
我從軍齊河女子以走驃平原將從戎幕碩真亂於睦歛女賊齊王氏起襄陽方熾而南壘女賊王震仙擁眾黔貴計欲
手攜紅線殲彼空精身入朱鳶殪其微側結李陽之俠拳乞鍾
會之送馬得四馬皆走五百里行有日矣而少微星隕丈人山摧烽火千里

家書萬金驕馬而覘敦壁至大梁而朱仙鎮燬於女賊投鞭而渡長江則五雲金

刀刲臂闔土填門以刲臂創發潰血逾年三年泣血也既遭父喪又傷妹服以飲

一文姬紙筆真草惟命居喪攻書子文稿詩冊遂有成本亡父賜書流離塗炭矣采三氏

乞知章之鑑湖葬史公於禹穴望東郭作松臺辭墓圖而聊城任曉林守

蘇州知羅隱已歸江東恐陸賈遂畱南越指支道林舊巷之門

沒賈氏奴西支巷大宅直巨萬者又贈我東支巷宅後皆還之為孫伯符道南之宅謂梁鴻春杵宜住皋

橋簫史夫妻當居鶴市催回訪雪之船迂我渡江之櫓畱皋亭

而坐梅花上虎山而參大士以孫宏開閣之時為呂蒙延賓之

地賓客下四調絲千指下箸萬錢仿子美滄浪故事買羊求三徑舊

園買蔣氏山園捐祀白大傳香火為東浦方伯懷杜閣地也崑崙懷智善才之琵琶朝雲夜來鸞臺之

婢妾賈胡波斯安民篆刻清河珍珠書畫之舫金管玉簫沙棠

之楫韓英宋昭之閨彥何曾虞棕之飲食膳祖一人廚婢數十

玉杯金盞涼堂燠室五雲以清照詩詞道昇翰墨萬錢買徐熙
丹青四時蒔坡公竹石上縹渺而圖春雲宿穹窿而繪曉雪畫
鄧尉之梅寫司徒之柏獅林之石一洞太湖之水千尺天平而
白雲上下虎寺而劍池壁仄傲郭李之長技追文唐之故實山
塘龍舟石湖串月煙波畫船浮家泛宅謝靈運之衣裳器物徐
君禱之管絃聲色吳中人謂王陽能作黃金疑智瓊必為神女
也惟時也作寶融露布衆識班彪鎮陶侃武昌人期殷浩皇甫
嵩黃巾之戰未破波才烏重允軍幕之中急需温造或薦韓愈
以行軍蘭泉司寇等或舉馬隆以良將雲督吉將以子改雲以府非蓮
花院非起草丞相之帳難眠亞夫之壁莫入且李翱不任於陵
幕僚劉蕡肯為令狐從事乎京師使至將以章京乃閉馮衍之門移居金
橋巷釘門而居寧投揚雄之閣何圖洛陽年少吳公忽而荐賢牀下
不赴已未禮試

姓名王維已通天聽葛誕之雷破柱滕放之雷碎枕愛我者以
籊籊覆庇庾冰惡我者喜霹靂驚翻王導倖雞竿方懸赦書而
五雲猶脫簪待罪永巷別遷東支巷承則始寓吳門之第四年也雲
歸剡縣子遊登州一船抱越絕之書兩地陟蓬萊之閣一則千
岩萬壑雲門若邪烏蓬竹筏遍一則海市蜃樓瀛洲方丈哀我者
謂李白逃名東海且畱釣鼇勉我者謂唐都再入金門何妨待
詔寫真容而寄楚材寄我邪溪乘筏賦南征而勗庭瑜紹蘭時以書
來韞秀每因詩諫乃辭望仙之門重踏京塵之路楊於陵薦李
程日賦五色空華辛酉楊靜菴詹事薦中子文時三主司託為奇才吳武陵薦
杜牧奇才阿房徒好壬戌那東蘭洗馬薦中子文十八房蓋匿姓名於戶
壁之間咸知子慎子八試入中入黜每文入房典校者逃身命於水土之
下重困康成也第四試為本師戴先生辨石舫學士遂手抄三招方干於寒山
場全卷五色紛披出闈而諸作已傳布諸

指鑑湖為博士

招隱寒山戒子不仕

五雲居越又二年矣淵明感孺仲之言

興公聽賢妻之語王臨川誓墓終身何仲宏告靈不仕良有以

也吳郡衛街西橋普大夫宅者紅欄架閣青漆泥樓主人曠獨

樂之園尤知襄之室宏景以三層為樓熙載以暮年畜妾肯假

晉卿為西園許借王敦以後閣子以緡錢居而安焉紅鸚傳語

白松來風課綠衣誦秋水之篇教春風習雙聲之字

課僮奴四五人書法時蔡僕工

北宗班昭女誠漸有成書

刪增各家女史合為鴻樓閨範冠以班氏七誠

蕭統選樓幾歸婦氏

依昭

例為妾

依劉向欲訓毛詩

踵劉向傳說將并集齊魯韓詩為四家傳

笑馬融徒知女樂

伶女以琵琶集

館下寶山生徒

於是管絃絲竹以特進之後堂珮色釵聲為宣文之

絳帳琵琶弟子桃李門生森然成列也新子畏桃花之菴寫六

如詩文之集

雲手寫唐寅詩文集而唐陶山明府遂有重新桃花菴之事

瓦官寺金錢百萬畫賣維摩

蕭子雲書紙二十名傳百濟

銅船以所畫維摩像及十大弟子十餘燈入日本而倭國長旗將軍以柳絮燈來乞畫

張

吳顧陸之五經董展鄭揚之三史莫不掩譽丹青馳聲翰墨或

思訓數月之功或道子一日之筆或十斛以易寸牋或百縑以

成一紙庶幾乎夏昶一竿之竹西涼十錠之金矣秋室蒔花詩

廊坐月橫塘泛暑楞伽翫雪既安市廛旋思山澤慕峨眉而追

陸通緬鹿門而隨龐德始不笑李衡之伉儷約種橘於武陵實

則羨高柔之倡隨終畝川而築室則重寓吳門之又四年也紅

柏山莊為湖墅養魚南宋種花之地元詩人所謂歸錦橋邊停

舫子散花灘上結樓居者雲樂而誓之曰我之歌哭殆在是矣

以嘉慶十年九月養病杭州王子猷借宅而竹鄭康成借田而

耕其故事也是行也聽龍眠自寫山莊知伯時才為畫累雲既

拋槩而棄鉛子亦帶苦而擁耒傳蠶室不辭自污卜田居何妨

自穢魚隨名呼鳥就掌餵榴花避秦之雞犬煙波志和之奴婢

順昌山裏不識熙寧武陵源中焉知晉魏或以爲山中宰相有樓可居或以爲白衣尚書無官則貴此孟光婦夫所由辭吳絕越再入瀟陵也明年屬予爲鴈蕩之遊狀天台之境語予曰春山如慶夏山如競秋山如病冬山如定子不詡夫詩仙我何爭乎畫聖師人不如造化遊山必有濟勝苟疾病之可禱何死生之有命我因子而投畚子因我而墮甌梨園一本黃梁一枕知萬歲鄉之封君能壽於武擔山之石鏡乎年三十有六卒之日以梅爲聘以桃爲媵將慰遣我四十年文字功名之比興抑懲戒我十二年熨體畫眉之情性歟按古冀缺黔婁接輿萊子皆以妻賢全其隱名子髫幼習太史公縱橫之書弱冠學百家之藝喜婦人之集愛英雄之記前嫡室朱氏鑿心納劑束髮署髻勸樂羊以斷機勗李固以負笈雖越姬不免狐狸先驅毛玄徒

以蕭艾負氣卒之邴超門下尚無性命之憂種放山中猶有田園之地此子所謂背坡面隍而不覆墜者兩妻二十四年之助也雲臨終之言曰名大則攻才大則窮余閱女史至阮修劉巖四十無妻而王敦褚淵爲之更娶者君其免乎以某年月日殯於湖墅馬塍之散花樓下嗚呼非盤占夫妻何須合葬是蒙雙男女何必重生空呼臯媚人不將將軍魂招後死徐悝我不見一娘文祭銘曰

臯亭之西秦亭之東曰花馬塍曰半道紅伏勝之書班彪之女義成孝經宣文論語著書不勒丹青則神如曹大家如管夫人

二十二相蕭梁鑄像

以供奉蕭統觀音大士尊像此山中借隱一念因緣也

萬花樓中散花供養桃

花九品梅花九命以是因緣有大士之龕五雲之殯

第五姨墓誌

古之善嫁女者開一窗而自選牽五絲而得紅媒妁之言婚姻之賊也其姬死火貞姬死水良史傷之春秋所由罪彊委禽乎予自金陵來山陰也指青衣而識狀頭舉車帷而呼小宋姨獨語其姊曰讀漢書乎君慕鮑宣梁鴻之高妾亦從少君孟光之事也馬南郡女倫語翁聞之曰讀晉書矣段元妃不爲凡人妻段季妃亦不爲庸人婦也慕容段氏傳語姊皆笑而領之越明年子道天台締七孺子而不婚聘三夫人而未娶見翁於會稽之東郭不知嚴光之志在梅福也樂廣之心在衛玠也厲言諫子使子還范雲之翦刀辭王珉之團扇曰八篇典式二女傳經君之婦也僕老矣侯高嫁女不與凡子杜衍選婿無若舜欽而時也州郡之舉以種畧爲孝廉垂橐而來入子圍之婚館蓋但知郗公徧覓東廂不

知玉璜誰爲繼室也詢於二介時李三堯枚沈四金燧爲介曰幡竿竹馬旣見許於甘公布被練裳必鍾情於五女二君知趙冕擇妹意在九姨崔浩求妻志存少女亦戲予曰翁若愛慕容之姊畢竟許爾雙飛君能射竇氏之屏或者中其二雀及戒賓筮日奮衣登席喜得延明坦腹登牀樂觀逸少謝月鏡戒王式之夜時惟仲冬裴叔道婿夷甫之女行居第四先是時也簡婚鍾母愛在兵兒覓婦裴家欲媒萬子翁不得不分季隗於趙衰輟小喬於公瑾非其志也劉孝標之妹有三宋若昭之妹有五同時鬢髮敢違祖母之心一樣知書喜弄甄兄之筆此連稱不媵仲妹於宮聲伯必嫁外妹於人者又鄭志也時兄承祖母意而翁不能違維時山陰夜雪朱百年送婦天晴息媯無言賈大夫如臯不笑而予已一舟桃葉渡江公車矣虎媒擇媳鳩鳥求娥錦瑟夜啼玉樓曉哭曰吾死必以

姊夫之文文吾冤也明年偕兄姊葬翁松臺亡人振萬共仲內淫三月歸寧一烏姑惡關輪而抱媯毒眸目而招盛姬楚越姬禮義之身班婕妤好修正之福橫遭怨耦殞陷貞魂始而揮匣沃盥希圖怒我懷羸旣而粉筆書屏決不屍歸陰氏縣令受賕狂夫道死摸金之尉初來淘沙之官已諾發墓而歸女柩蕭至忠旣已愚矣劈拳而出手玦斛律光豈不痛哉幸而嫻都童女保有真身相如完人昵歸全璧薛瑤英勝衣之骨尚着龍綃戈小娥紅玉之軀依然處女蓋其于歸數月浴斛覆牀散灰扃戶雖嬰陶名有賢雄許郎實未牽裾也不鑄金而合葺食殘魚而寧死姨之死姊知之乎嚮使胡兒咏雪能如乃姊多才崔妹登車早與女兒代嫁安知多情歐九不敢作小姨舊壻之詩亦何至才辨女倫不能爲阿妹申情之賦哉世無溷糞涅麻而保其西

施之潔者無敦洽。隼麋而辱以南威之姝者。讀彩鳳隨鴉之句。怨火寃霜。誦女師德象之篇。紅冰碧血。嗚乎火嘻。宋廟傳不至。而捐身水逼楚臺。使無符而竟死。當年避雨疑我爲安東貴人。今日射麋何處。是崔君府裏。

虎邱山窆室誌

飛鳥之跡。蟬脫之殼。騰蛇之灰。神龍之角。名之於人。亦猶是乎。盡綿上爲介。推田環會稽。爲范蠡地。身名不滅。亦何藉乎。一隴之松。一棺之石。置塚要離墓旁。求葬西門豹側。哉。憂竹帛之不書。文章之不立。於是趙岐自爲壽藏。王樵預卜繭室。顏清臣自作墓誌。杜子夏臨終刻石。繁可哀也。曇字仲瞿。一名良士。吳郡由拳。杉青人也。私窺中秘。空洛陽市肆之書。學射十年。盡寇恂淇園之竹。年數歲。祖瑩聖小之稱。張堪神童之目。凡將急就。元尚之篇。八法六技。史籀之錄。然糠滅漆。斷蠶削竹。棄豕亡羊。忘羹竊肉。減油置燈。藏灰節燭。墮馬據鞍。穿牀升屋。異書借鈔。官書竊讀。落燼晨明。警枕夜觸。讀道邊之碑。覆圍棋之局。如是多年。而陸澄號爲書廚。李善稱爲書篋。旣而擊弓逐走。調矢射飛。

學大黃於飛衛師參連於由基七百里平秦之馬三十萬迷香之姬嫁女欲得以爲婿美人樂得以爲妻登牆而窺宋玉金枕而薦陳思聲色絃歌君禱遊踐衣裳器服靈運奢侈而狂白三十萬之金盡矣上禹稽採禹穴登東山臨碣石經途三千行年二十而時也

先王羣玉之山謁者獻書之路麒麟天祿

蘭臺石室之秘華林總明仁壽文林之富靈威洞庭之藏委宛

天承之蠹莫不準劉歆七略之名在王儉蓮花之府

叔祖文莊奏開四庫賜第發

祥坊凡官本遺書皆準總明王儉故事

予乃八年於次道春明之坊依温公讀書之堂聚

卷爲樓積石爲倉晨摻海錄夜寫巾箱居王導之宅七年不出園抄陽城之書六年不出房夫然後翱翔金陵徘徊建業雨花臺城長干采石過河東而背亡篋登凌煙而補壁闕李賀唾地任昉腕脫賦入圍城詩叩銅鉢圍碁以四子一首靈運以百篇

半日書十吏而不辭作百函而竟得杜秀才之五題武德殿之

二刻庶幾乎曹子桓之上馬橫槊下馬賦詩傳修期之下馬露

布上馬殺賊不是過矣出馳駿馬入羅紅顏醉盡花柳賞窮江

山李白之在揚州也愛止邱壑性同鱗羽眷戀松雲輕迷人路

宗測之不樂於仕宦也姓不載登科記名不入翰林志青溪之

樓十三平山之橋廿四遜抗機雲聚巾書於鴛鴦之樓倚翠偎

紅掌教法於雙飛之寺

居鷲峰蕭寺而往來信宿於隨園安園寓園之間

陳季常戎裝駿馬細

女游山杜牧之紅粉狂言紫雲乞侍時或司徒妓宴洛陽之名

士皆來時或康海琵琶姓董之牽頭畢至方將以金焦北固爲

狂生之三山虹橋新亭爲酒人之牀第而乃機絲蠶簿僅有故

妻竈突風吹忽焉喪耦堦陶謙者豈止甘公相陳平者不徒許

負約七姓以婚姻感一人爲箕帚晏公愛女方見託於希文山

谷詩。文遂見選於師厚。王子敬山陰道上。郝鑿東牀。顧長康會稽山川。嵇含女酒。恃以為劉凝夫婦。從此遊山高柔賢妻終焉。鄉里而孰知漢武帝元光初歲無端忽舉孝廉。唐高祖武德三年畢世不成進士也哉。舉應奉將帥才薦。龐參宰相器。學則為任彥昇。五經筭博則為李倉曹。人物志或重崔沔。以魏科或擠李戡。以下第或欲以固毅典寶府文章。或欲以令狐為太原書記。予方視諸石間如鷗鳥亦且望灞上軍如兒戲。以是韓琦及第五色雲飛孟敏文名一甌墮地馬拊便面車驅塵尾郭丹之符未買終軍之繻已棄也。夫邳惲耻以軍功取位。崔圓媿以執戟受職。嘉慶元年獷賊橫行殺函險澀時也。問張郎之弓馬豈獨褚淵應勇士之詔書不徒師德子亦謂班超筆硯安事丈夫呂蒙從軍且探虎穴無如魏其客士軍門亦田寶之分翁歸全

才文武亦東西之別

贈郡王福伯督和分統秦楚諸軍事

乃嘆蒯恩馬士徒事彎弓索

靖詩書焉能廟食且朱雲之劍請上方少游之車乘下澤此杜

少陵東下姑蘇南尋禹穴職有由歟田千秋之一言阮千里之

三語頭痛讀陳琳焚山召阮瑀居吳三年有遺我書者曰舍捷

徑之仕途棄終南之佳處乃韋忠辭司空之聘義方觸宰相之

怒乎子報曰晉有殷浩漢有樊英謝萬眩曜房瑄虛名播流者

許靖浮稱溢美者葛瞻令聲日者秦楚之事連營七百里犄角

十三城誤國一人沈田子還朝單馬段中兵賊窟沒河遂至蔓延四省予安能

望塵而知馬步嗅地而識軍情今日之一隻簾鈎且畱杜甫他

日之兩杯殘炙誰救陰鏗吳中士大夫將為九老之會可寇蘭泉稔宮詹辛

檣錢大昕侍講夢樓文治雲崧觀察趙翼東浦方伯陳奉滋藹若值子買蔣氏山園

觀察宋思仁立崖司馬蔣業齊許穆堂隨園卒待工侍師歸也築懷杜之閣崇香山之祀祠石湖之堂移仰蘇之址聚吳下歌

姬居東南名士絲竹醉於洞庭燈船照於虎市高流朝客妓酒
 分朋惱亂司空蘇州刺史聊城任太守曉林葺治園林樓船燈
火賓客飲食之費五年中凡數巨萬方是時也
 志和自號煙波叢之將以樂死矣豈期銅山未塌方聽鐸而知
 風杯酒纔乾乃聞雷而失箸都憲吳公賈餽座師和凝舉主
 詔書初讀手戰桓温司馬行軍忽薦韓愈笑孤延之敢戰霹靂
 鬚燒唾太初之視書雄雷破柱細君未嫁於烏孫狂生幾死於
 黃祖幸而孫權席上衆救虞翻嚴武幕中不驚杜甫也歎遂乃
 陟琅琊泛登州遵黃腫上之呆避楊球路上之刀中郎亡命受
 王彪漆匣之嚇臺使筮篋冒巨浪犯陽侯循扶餘之故道臨薩
 摩之舊洲漢武秦王之跡浮沮下瀨之舟颶母吹時魚龍出沒
 寅賓出處蚌蛤翔浮斯時也視楊右相之冰山身經苦海入張
 昌宗之海市親見蜃樓誠盧生之所不到徐福之所未遊也已

既而陸贄衡文不收韓愈劉幾程試又黜歐修或以爲策是天
 人何用仲舒敢諫或以爲文如枚馬豈容方朔俳優減食忘餐

楊子雲之愛士楊靜菴詹事辛酉分校以子
名不入榜聞中三日不飯號陶痛哭衛洗馬之風流王

聞中那東蘭洗馬以子名又不
登榜出閣抱子大哭皆薦師也始以爲鄭元逃生纔避馬融之禮樂忽不

料服虔改姓又遭崔烈之春秋狂不似乎孔融偏逢路粹才不

同乎曹操亦忌楊修然後知賈誼之見薦吳公盛恩可感翟黼

之力欺孫懿陰沮堪憂梁武帝所謂恨我詞人數窮百六者乎

昔富人齎十萬錢而不得附名於子雲之法言豪士遺五百金

而不能載姓於穆修之廟記今則以不須由竇之文章爲不肯

梯媒之遊戲宜其龔寬劉白寫昭君爲醜人馮宿龐嚴屏劉蕢

於落第此芻狗之科名無害我畸人之文字也杜光庭萬言不

中再隱青城蔡中郎十有二年重居吳市於是奴婢一船家山

萬里張志和之浮家泛宅林君復之梅妻鶴子居吳三年又有
遺我書者曰妻宓妃而儷織女何福能消學鮑宣而慕梁鴻君
才太似子安能以八百彭篋之壽寫三萬蜜香之紙也復棄臯
橋舍春杵問康成而借田向東山而乞墅擲果一車種桃萬樹
於杭之散花灘爲隱人也喟然而歎曰伊尹區田之法不行於
今二千年矣闢土藝粟盡地利之宜管仲不如甯戚躬執耒耜
開播琴之法孔明不如鄧艾仲尼之體不勤后稷之功最大力
畦畷手灌溉畝收一鍾粟支二載將告之行省而無人謂獻之
朝廷而未暇呼亥章召許邁四十九盤之鴈蕩遊身地中萬
八千丈之台山舉頭天外火種刀耕梯田水磴李悝地力之書
宗測遊山之帶方悟劉晏爲錢流纔笑陳湯爲丐貨乃漆園之
岳又鼓而少伯之舟又敗也嗚呼間氣鍾於婦人鍾情在於吾

輩。滄海巫山之句何處招魂金釵沾酒之詩心傷舊配而予年
四十有四矣飛鳥夫妻盤龍父子再泊秦郵重遊燕市遮視河
使者而說之曰河與運不如是治也昔平當以明禹貢爲河堤
劉向以治尚書爲水尉一湖洪水梁天監之下流四閘分流斬
總河之急淚幕本下才人無上計爲今之策移淮堰於上游塞
洪河爲水櫃雲梯溝爲屯田倭銅鑄爲大幣收三十年估佃以
足河兵劃六百里淤河以爲井地不塞馬港之新河直敞開山
之下勢富國則斥鹵盡變爲膏腴彊兵則人夫悉編爲戰隊特
牛草馬散洿萊以孳生臥柳禿楊遍河隄而樹菽上新例者十
條陳蠹國者四弊歷行臺宰相尚書皆知爲一勞永逸之計而
未能行也予惟一子曰善才者從學淮南亦知讀盤庚三誓之
書下鄭監流民之涕告之曰太史公年二十南游江淮北涉汶

泗兒其時矣有廿一朝史傳於胸中無一萬里山川於脚底如
視黃河不知地理東坡曰惟有王城最堪隱子再觀書於燕肆
平時也巫誣仲舒巫亡而仲舒不亡僧咒傅奕僧死而傅奕不
死作蘆蕪之謠雪籛條之耻而讒人尸於柴市於是張祿變名
辛文改姓少年謂子曰君以杜默之英雄而不成進士文其不
善戰乎予笑而頷曰參軍屋漏來諸侯壁上觀自乙卯迄甲戌
策試十科文成八卷爲陳湯作稿誰識兒寬與潘勗爲辭衆知
王粲疑盧郢者謂徐鉉之文讀黃樓者猜子瞻之翰佛骨之表
馮宿捉刀常何之奏馬周握管沈約之詩或間借於謝謨韓愈
之集或託傳於李漢餘錦潤於邱遲唾殘噉於皇侃是以劉向
作新序而王尊無名魏徵作隋書而王通無傳也孔子謂子路
曰嫁則不嫁矣已嫁過半矣昔唐張鷟崔融陽嶠員半千陸元

方皆入試入科皆八中予於文亦庶無憾乎後漢寇榮傳曰榮
性矜潔於人少與以此見害於世流離奔竄予之謂耶初乾隆
六十年王以錡榜發 太上皇帝以臺官奏劾 命

御前進卷別選一榜曇名與焉而時東臯師闔門待罪伯相公

伏蒲請 恩榜乃如舊及嘉慶六年見閣學禮侍戴座師

東山使署謂 今皇帝四年普 諭軍機若王曇來京會

試朕欲親見其人汝見吾家尚書乞其奏請而知貢舉副都陳
公嗣龍以爲不必對簿汝名登榜我當奏 聞此曇所謂夢

天難舐捧日難升 聖恩太厚臣罪太深也乙丑大庾中堂

戴文端主禮試入闈之日又預告十八分校今歲浙貢王曇若
不呈薦我當拆名奏中而予以旣隱吳門不復偕計梁公舉士
急薦柬之宰相糊名獨求張說呂蒙正之囊中冊子並非私人

施師默之夾袋人名徒勞相國方知鄭虔命運數已定於相如
李廌文章情不通於蘇軾也倭道人者居虎坊五道神廟年二
百餘歲矣蘇門再到見阮籍之真人汲郡重來遇嵇康之道士
昔孫思邈識太白於酒家李淳風知七星於西市日子而笑曰
釋爾矜情去爾驕氣子奈何仙佛爲因緣必欲以功名爲遊戲
子曰僕來挑縣官令長才也不行區田民無食計不治黃河民
無燥地懷兩事之飢溺心甘年之經濟葛洪勾漏志不在乎丹
砂王喬鄴令意不矜乎飛屣師啞然笑曰一身仙骨誰似楊收
十年宰相何如李泌子不鑑墮落仙緣之夏竦乃甘作見笑麻
姑之盧杞乎子悚然懼曰是亦不可以已乎告子曰爾實善乎
文章子不期以科第清流不爲步兵而阮籍醉之名士不爲主
簿而孫寶祭之我爲子準告緡於司農丐一官爲縣吏他日父

老家貧兒不擇官而仕焉可也疇昔之日歲在作噩潘岳閒居
揚雄寂寞東發軔於榆關西停驂於劔閣經秦晉之故墟悲漢
唐而著作於沔南之定軍山止也李固曰周觀天下惟不見益
州耳王右軍亦曰願遊蜀都登岷嶺峨眉惜不遂其志爾時惟
甲戌至於大梁汴水滔天飢荒死傷滑臺兵火人民流亡曹丕
感癘疫而作典論摯虞憂餓死而別文章舊年邗上人傳我死
者得輓詩焉山松尚生道上已殞歌滿口張湛未死齋前已墓
木成行子今年四十五歲矣倘或六十度刀重徵別駕七旬布
被竟舉賢良則不望史晨之後碑重書孔廟亦或有趙雲之別
傳再刻堂皇嗚呼誓墓義之官情遂絕告靈何偃不仕何妨愛
我者謂杜當陽之俠遊少違人望哀我者知孫興公之穢行老
不荒唐所著有詩文集如千卷西夏書如千卷讀竺貫華如千

卷鴻範五事官人書如千卷歷代神史如千卷居今稽古之錄如千卷隨園金石考如千卷繙帙集如千卷魚龍鬬傳奇遼蕭皇后十香傳奇如千卷或寄之人家或付之塗炭或未足殘編或尚存斷簡昔桓譚作新論未成班固足之仲長統作昌言未竟董襲誤之他日我子著書循我例而纂焉可也嗚呼摯仲治文書蕩盡杜鄴流離庾子嵩家財萬千隨人取散太史公曰世言蘇秦異異事皆附蘇秦班孟堅曰世言方朔奇奇事皆歸方朔子少嗜禪宗長耽玄學不知我者或以爲學如孫吳博如管郭吾恐謝胡兒不識何人漫作王堪之傳也銘曰

讀書而有益於身者爲理義讀書而有益於人民者爲經濟學。王夷甫者事廢學王介甫者人廢以予周視一萬里之疾苦四千年之利弊而不得宰一縣官之地爲賢良作循吏以吾爲羅

隱方干吾亦視文字功名如敝屣有十八篇論議畱以爲後世生民之利

古之自爲墓誌者唐則王績傅奕裴度杜牧顏蕘辛秘白樂天李栖筠嚴挺之柳子華衛大經李行之顏真卿也朱翌曰生前作誌謂之達亦可謂之近名也亦可蘇子瞻謂秦少游曰某在儋耳亦常自爲墓誌大抵憂讒負譏死又誰爲之論列哉若陶宏景告逝文陶元亮顏魯公自爲祭文秦少游自作挽詞徒事解嘲無關臧否也吳范孝敬自爲長室姚秦梁國兒作壽塚攜妻妾入塚讌飲則又立意好奇又不逮趙岐司空圖之壽藏矣若曰寂居穴曰復真堂曰永息庵者我無取乎爾也

鴛鴦塚刻石爲唐峨山宰公作

孔。雀。無。詩。鴛。鴦。有。牒。何。北。福。高。達。姑。同。時。縊。死。事。同。紫。玉。無。礙。
網。常。情。類。韓。憑。不。關。名。教。比。逃。天。之。太。白。曷。曾。欺。犯。帝。孫。律。奔。
月。之。嫦。娥。豈。便。斷。歸。后。羿。仁。同。一。負。商。陵。子。實。是。義。夫。誓。不。二。
天。魯。次。室。豈。非。貞。女。嫁。廝。養。而。不。愿。義。異。於。邯。鄲。才。人。棄。母。命。
而。弗。從。禮。本。於。廬。江。小。吏。本。縣。體。仲。尼。之。例。得。情。則。矜。上。司。懲。
周。禮。之。文。此。奔。必。禁。何。也。前。者。檄。同。四。鄰。讞。彼。兩。造。牆。頭。着。棘。
絕。少。狐。行。門。上。安。關。略。無。灰。跡。相。廬。家。少。婦。之。梁。卽。橋。下。尾。生。
之。柱。生。死。關。只。隔。一。垣。東。西。李。原。非。同。宅。以。致。一。條。歡。帶。雙。纒。
共。命。之。禽。兩。座。情。樓。合。作。同。功。之。繭。於。時。擁。雌。雄。之。樹。鄭。櫻。桃。
尚。似。同。根。捧。夫。婦。之。花。郭。芍。藥。猶。然。兩。朶。騎。來。竹。馬。少。小。長。干。
生。是。窮。家。同。年。總。角。街。臨。十。字。人。疑。佛。國。門。樓。路。接。三。义。家。近。

飛龍藥店日則呼郎白帽門前隔谷之歌夜則抱被黃昏牆外
圍人之戲闖河有鵲何拘七日纔來到羊無益豈但十年不字
如魚合隊似鳥同林慕容冲之姊弟未必胞生木蘭女之雌雄
居然火伴蓋以爲明月長生青天不老者也豈期勿慈烏母另
安鸞壻之牀不好鳩媒別掉墓門之斧明知蕭史近在樓頭暗
配羅敷謀之桑下黃瓜小草死不願五馬使君螢火身單心勿
愛縣官公子無如出門庚帖已成渡海飛書入戶冰人忽化經
天大鷄何兆福殺荷斷藕之日西鄰責言高大姑踏地喚天之
時東窗事發其時也銅梁玉壘已驚蜀道之難金枕銀環又值
丁娘之索黃禾羸馬無錢則畫地而賒石闕棲牀有背則圖天
而誓妾非遊子敢做飛花郎豈狂夫甘爲浪水惟是望漁陽於
門限牆上難趣指海水於西洲公河莫渡與其吞席中蔽膝短

線難縫孰若叩肘後香囊長繩竟繫生而有鬼終爲子夜之夫
嫁則隨蝦不願龍王之壻懸簾走馬生可無情入地梳頭死寧
無計蘇伯玉盤中之字寫滿裙欄郭紹蘭寄外之書藏諸衣帶
於是郎呼起起同懸蘇季之梁妾叫荷荷兩縊莫敖之谷此理
官之所哀矜劉向之所必錄者也乃有狗曲迂儒人倫腐叟謂
彼季女乃無父母之言懲此童郎絕乏婚姻之禮豈知東家食
而西家宿不問爲淫如其子哲美而子南夫曷傷爲節良姻自
擇宋司徒亦聽女郎嘉偶自求徐吾犯亦從乃妹若謂地皇兄
弟若箇行媒天姥夫翁何人作伐則上古無士昏之禮葛天定
作鰥夫太初無媒氏之書媧皇亦成怨女此豈通談必非名論
也已本縣官非月老司民間合姓之文職等調人安地下呼天
之鬼仲卿不死焉知男兒可憐碧玉有夫寧識女生苦相日者

踏搖娘子戶歌何滿之詞播塔郎兒人望比肩之里呼發邱之
郎將藏此杉棺召復土之將軍封其馬鬣竹郎有廟生不成雙
木客無家死須同穴華山畿之古塚雲陽尚存祝英臺之舊墳
明州猶在仿彼故事葬汝於西子湖頭依此前聞附爾於鳳凰
山下今日過青溪小姑之水山響棖棖他年經漁山神女之祠
花竿子子相思兩樹多畱蝴蝶之魂野土千年永變鴛鴦之瓦
再來天上爲生神墮地之男重到人間作長命西河之女

煙霞萬古樓文集卷五

秀水王曇仲瞿氏良銘

爲吳江紳士呈請故贈光祿寺卿浙江按察使司前輩秦
階兵備道王翠庭公遵新例於本縣建昭忠祠狀

竊死有五節獨疆場之餘勞爲足書祀有七名惟祐主之無歸
爲足卹故祠官經典以能死勤事者入昭忠郡縣章程以別建
專祠者著令甲紳士某等援周官旁招堂贈之禮引鄉社族厲
鬼歸之法有故 贈光祿寺卿浙江按察司前輩秦階兵備
賜進士出身兵部車駕司主事王某籌軍獯道裹革隴西一葉
身輕 皇上已子之葬而予之祭九層天大 聖恩復贈

以廕而贈以卿努力酬知竭誠奉職 制詞之龍光也見危
授命臨難捐軀 溫綸之敷錫也其嗣子某捧 璽書而

泣血淚盡眶枯其嗣孫某承 懿詔以受官天遙地重是何
 敢於窮泉雨露之外再乞馨香幽光日月之中復求毛血獨是
 熊光哭墓少尺地以廬其子孫韓弁死邊無一費以藏其匣主
 不崇社祭則樂公之餒何歸不立叢祠則桐鄉之魂無託某等
 是敢粗具見聞略摭行實丐恩節府待命臺司初光祿承
 上命備兵鞏昌也洮以外雷公飛燕之妖秦以內牛角羝根之
 賊光祿疑以傳車走六百里書而一馳負三十日食則不若舍
 張綱單輅就杜周一馬掛不疑櫺劍脫暴勝綉衣直覘賊壁殺
 門竟揖將軍霸上大府松公筠署光祿為徽成軍需總事於時
 也民有掉山杷土之勤官無藁稅穀租之供茹陂七處咸慮攻
 瑕倅馬什羣皆來就草鞏昌之守或以為軍興費大疑鄧隲之
 在涼州地險山多恐鄭莊之遠千里光祿乃告大府省糧臺啟

元戎撤調劄故其守岷洮二城也榘乾豈豆盡為軍儲魚膏草
 苦皆資戰備甘境之賊為藍線白線慄竄無定光祿以為不編
 魚陣則蓋勲莫殲羌人但寫孝經則宋梟豈辦隴賊遂乃求臨
 淄之弩兵募煎靡之勇將火矢五十為排馬士一千成隊摻匿
 人於舫中計殺賊於功簿檄三郡二十一縣得民兵八千餘人
 凡一切解仇交質之豪弛刑應募之衆倉頭廬兒之厮白虎揚
 威之校莫不出魏尚私錢以買犒牛設虞詡三科而賞壯士光
 祿又遠修斥堠內壁堅營木樵澆壘之堡中周虎落之樓尺藉
 伍符之書蘭石渠答之器不半月中成二千所兩當之戰賊帥
 張漢湖由鳳縣攔入光祿衷甲抽戈橐韃負鉞如馬融之假部
 號犇命西羌似文聘之隊一軍親當石梵或賊去三舍或虜來
 十步或持重如韓安或力戰如張羽賊又偵伺糧臺窺覲成縣

率烏合二萬圍城門三日光祿偃旂臥鼓示之活門拔旆投衡
蹙之死地及賊之疑則又潛出環槍捷被慶甲斷田疇平岡之
磔署國淵首級之簿當此之日擊長離而諸羌散邀抱罕而涼
州平者以光祿八千鄉勇爲長城也秦階地連川陝大營五六
處官兵十餘萬流寇所竄追軍所屯時或賊壘居內官營處外
光祿乃明脩流馬暗餉陳倉冒程昱之膽送鍾會之馬蜀中方
一日而十驚峻軍乃十道爲一部知公武者謂王脩必冒難而
來笑公文者謂孔融乃成軍而出光祿有募士王元佐者西和
鄉貢生也生能挾輶死猶鑿足實南八之男兒爲史慈之名士
死之日曰我從張睢陽乎無負嚴將軍也識者謂子桑知人曰
季舉士無以過此嘉慶某年軍功上計 皇上命爲浙江按
察光祿自以未殲餘醜必靖羌涼且大府以慶忌爲爪牙官恐

湟中有重腿疾乃遮劉勳以安部曲畱杜畿以鎮河東光祿於
是繕平涼州邑之壁置流民棲宿之所給牛犁籽種之資脩掩
骼埋胔之政或疑于禁鬚蒼葛公食少則光祿已於五年二月
伏羌觀病然猶覆頭柏孝負大盾而習勞擁膝高柔抱文書而
臥看伏枕之日口占朱博檄文夜問賁麗星象直至七七死
之時猶操九拒九攻之算到十舉十危之地尙畫三沮三仞之
謀及自知不起人說彌畱始乃召丞椽爲先令書呼長子爲鑿
楹語也巢門有鳥雖張璠自知死期夕陽在亭豈楊震竟無歸
魄况乎豫州百姓尙爲陳寶圖形焉有梓里九親不見倉慈畫
像今其嗣子通判某寄居吳江本族名爲士著實則寓公抱胡
公之祭器俎豆無家載木主之先君衣冠無廟伏蒙 皇上
賜有恩卹銀兩尙畱公庫未紉私囊可否馳牋上臺下牒本縣

卽君父貨死之金錢爲臣子藏衣之夾室卽叔敖期思之首邱
爲石相棲神之泊宅乞於吳江縣境擇地一區置王光祿專祠
一所以神主祔升昭忠祠忠臣勿祀魂則在羌湟水中大招若
來鬼不死玉門關外

舒鐵雲姨丈瓶水齋詩集序

沈李昌谷於溷神之中寄劉公幹於鬼伯之口微之未死託遺
稿於香山荀攸臨終交阿鶩於鍾會良士自大梁來揚而吾姨
丈人之集成於真州昔宋考功毒希夷而有其佳句齊邱子沈
譚峭而有其化書若巴樸園觀察之敦命劖工與刊傳作何遜
卒而王僧孺集其文崔湜死而裴耀卿纂其集爲千古尙也我
姨丈人位才備八厨身行萬里於粵則愛鐵雲之山於黔則樂
飛雲之洞故其詩千巖競秀萬怪惶惑趙雲菘八十而願以詩
師梁山舟九十而見其書拜其實錄也王筠見沈約不謂遲暮
逢君劉頌見張華豈信人間有此蓋讀書數倍於前輩宜積薪
居上於後來嘉慶二年偕我備兵叔馳驛軍營值齊王氏火燒
朱鎮而西時也師漏多魚翁驚失馬入黔貴則南籠方圍馳楚

壁而襄樊正急間道則經烟塵六十四路而遙遇敵則會相州
九節度師而戰湖督汪文禧假我叔氏勝軍三千以田悅之親家

分猗盧之餘卒與先生一鞭一筆九拒九攻纔及貴境而雲南
士練藤甲諸軍悉隸麾下婦人作賊馬援之所能平女子從軍
李廣之所不將而時所部女官土司龍囊仙者馬上桃花木蘭
火伴寵以妹喜之男冠假之敖曹之鼓蓋壁其軍於水倒流山
也斬龍仙則惟擁二矛禽史歸而僅馳七騎從先生之計又更
舊將以易夷兵變徽章而改番服不旬月間而女賊王囊仙致
於麾下與義之戰以李典步騎八百破吐番寧州三萬力追銀
鼓生擒鬼章論功者謂督部灰囊火馬之功實本道輸攻墨守
之奇也南籠圍解我叔氏以前官左降復介君於湖楚軍營者
五載急攻則種下濃書緩戰而圍城作賦杜暹州紙豈止百番

謝公庫賤殆將九萬房元齡軍書之奏駐馬皆成令狐楚白刃
之中揮毫不輟大府初以君奏留黔中而介推逃賞魯連辭功

賦櫻桃爲林甫微辭

軍中作水山曲

詠蜀道與嚴公寓意要其賦性蕭

閒秉心引退示不願爲桓冲參軍故託意作郝隆蠻語也叔氏

嘗語余曰吾貴州之行泣斬叛苗一百餘萬雖韓愈行軍不逢

裴度而令狐辟幕實得劉蕡蓋謂先生鄒枚之亞也八年癸亥

與良士結鄰吳中何蕭兩雋之巷張陸交讓之瀆既無貞白層

樓誰與戴公築室重陽風雨日日催租淞水莼鱸年年負米長

洲宋汝和觀察爲同人刻今雨集也屬良士刪鄭集之鷓鴣屏

謝詩之蝴蝶選取雄章多將百首其盛氣如孔文舉其博議如

劉子駿其貫串如酈道元水經注其磊落如司馬大人游獵賦

繫是時也趙睦第論其詩細蔡邕已傳於京師愛君者焚宮中


媚香不識君者亦薔薇浣讀香山誦一首而女子價高康樂出一篇而洛陽紙貴無以逾矣古之工爲詩者或一卷擢第或一聯入相或一詩得黃門一詩得郎侍如先生者李泌蓬萊之閣王珪金炬之蓮國之光也而乃楊徽警句未登御屏公權法書不題殿壁生無花樹之居死乏西華之里嗚呼命歟性樂楷隸工李主錯刀法永公門限穿羽陽宮瓦寫老嫗扇頭其與人書也綠盆糊麪豈惟百函青泥封書每馳萬里棄陳遵尺牘爲榮得劉宏手書爲悅若良士之不嗜裝潢者亦復衣藏索靖之書帶秘鍾繇之札孔文舉謂舉篇見字欣然獨笑蔡中郎謂筆跡當面相見無期能無慟哉精音律工三絃亦習弄笙篳篥琵琶則鸚鵡立聽奏羯鼓而羣羊躑躅十四年己巳與太倉畢子筠華珍流寓京國作伶元通德吳剛修月數十齣微服聽酒樓之

歌重賂購樂人之價若王昌齡之旗亭次第李協律之流布管絃王門伶人爭爲搬演也素不賃車馬輿轎公卿名大夫或時訪其門館怡然不報單衣練布惟能晝眠散髮斜簪不標丰度竊以爲南州高士但見林宗江東步兵不推張翰先生之致貧乎高也淵岱之寶不盡延州之德不孤錢塘陳雲伯泊令子孟楷太倉蕭子山學相次第才各縱橫先卒之日紀其喪事賻之歛之傳之序之而先生之哀毀滅性死孝傳矣夫詩小藝也好香山而死者爲唐衢膏少陵而飲者如張籍李洞鑄佛孫晟畫仙諒有人焉李益征人之作天下皆傳嵇康四言之詩愷之如畫君何不年而使後君死者沈子明刻李賀遺詩王士源爲浩然集序也時嘉慶二十一年秀水姨甥仲瞿王良士頓首拜書

唐陶山觀察傳疑錄徵事啓

國語證經民謠著史自公羊定傳聞之例漆園發寓言之凡信以傳信擇其尤雅疑則傳疑見於他說是以韓非述事務乎兩存鄒衍談天驗之小物灑神人之墨汁道德五千駕使者之黃車韜軒九百皆有補於教化實足資乎簡編昔裴松注三國盡輯異聞景文作唐書兼收小說使汲冢不藏紀年二代幾無正朔康成不探讖緯五帝幾無名號况乎神怪未明桓子將欺以獲狗浮夸必斥劉氏且昧夫豢龍是知傳疑者傳信之肴蒸傳信者亦傳疑之炙轂也且夫天道好還風霆顯其至教人心不死冰雪表其精誠匹夫匹婦愚而神一動一言畏諸道閭史之所未載鄉老之所樂稱若無徐廣劉向之長篇王粲戴逵之短部將名湮於談藪事闕於語林抑亦有道仁人之所深惜歟庖

丁輪扁柳梓韓巧五行方技之流二氏因果之諦名物象數鳥
獸蟲魚見智見仁可歌可泣卞壺整衿以爲禮法之文王衍揮
塵以爲清談之助郢書燕說誤亦可思笑鰈言鯖婉而善入則
譎趣勝於莊語讜論寓於庾辭矣至若伶元據通德微辭白帝
拾神童遺事乞嫖姚太乙之精求后土人部之夫未免房幃勸
褻卷牘誨淫文不雅馴摺紳先生之所難言也蒙也足蹇九垓
心眩八索筆墨僻於嗜竒文章耽於寓託玲琅邪釋郢之精悟
顛頂讀翹之繆賦蟬則文無二千徵貓亦事少七十苟非揚子
雲之鉛槧在懷左太冲之門藩皆設安能效匡鼎之解願隨馬
王之著腳此傳疑一書之所由作也是書也類無取乎區分文
勿嫌於累牘義主遏惡而揚善辭貴微顯而闡幽不傷名教則
滑稽之雄也不惑異端則機鋒之妙也不及時政則野曝之獻



虎邱建白太傅祠堂狀

伏考禮祭之法以能捍菑患爲功勞郡國之典亦得索鬼神而祭祀以故陸雲去縣浚儀之俗祀其神石慶相齊卽墨之民配諸社或以報功或以示本承而勿替矣吳郡鳧鴈爲鄉舊稱澤國初時也范蠡闢長洲之瀆地尙鼉宮子胥叱淞水之潮人離魚府泊至黃歇城吳水分四縱韓臯布地波奠三江所由禳社費連叢祠屋接五花樓下盡刻高公水政之文四絕碑中大書禹鑿了溪之事固已祀法粗隳祭儀畧備已獨是香山一瓣空題刺史橋名粉水千年未立江州祠廟如唐太傅白文公之刺史是邦也太湖五宿有三年去郡之詩武阜兩壕開七里橫波之路散龍口而築濤門灑彪池而通斗戶常使長干靚女盪花市以川游大隄行人泛酒城而水戲設不塞海眼以金錢賂波

神以玉璧焉。知不地尙陸沈山。仍海湧也。嘗考昌黎訟早有懲
呵風伯之文。表聖愁霖有痛斥雨師之檄。是明神有吐食之嗟。
功德歸馨香之薦歟。公身尙讜言。史明直道論。河東入相。豈容
褻哉。平章斥于頓。倭人不許曲歸。天子且復奪中官兵柄。謂承
璫不可監軍。竦天下忠臣。謂奉國宜假節度。至今讀虞人之戒。
字字忠言。當年詠新井之篇。人人忌口。夫豈但年尊九老人。重
鷄林祭倉頡爲文神。鑄閻仙爲詩佛也。已哉。按祭神二義。王充
主于報功祀事。十名許慎兼以會福公入灘手鑿六井。重發想
當日虎山立碣。水號流。桑鶴市蒸隄。洲名種荻。水功紀在五湖。
宦澤流諸三泖。豈可使白蛇廟壁弗題。魯峻碑陰黃水祠門不
建。李剛石室。今虎邱東麓有五賢祠者。但陳豆俎不述勤勞。亂
列衣冠無關祭法。且復西門靈館。法字欽頽。晉川涼堂神宮。侈

場若非郎官水上。另書李白文章太傅湖邊。別塑謝安神像是。
何異沉碑峴首。棄羊祜於荒阡。作廟羅池。屏宗元於瘴海。卑府
等擬於塢影舊園。建白刺史祠堂。一所。髣司馬遷夏陽。覽古再
列桓楹。視卜子夏。岨谷棲遲。重安杵臼。庶幾樂陵墟館。記府君
往日遊神瓠子。金隄志子貢舊時工築。燎牲磔犬。有歲常豐。面
郭臨岡無堂不固。伏懇綿田。桂樹榮書。介子之祠。木主石龕。永
拜北君之廟。除申籓臬伏乞施行。

上達香圃尚書乞改名良士狀

竊惟烈士殉名君子疾沒是以顧雍佳士慕中郎之才而借名
鄧艾農人讀太邱之碑而改字名以立義孤而不更古之制也
曇待罪公車計偕選部又數年矣雲間日下恥士龍鳴雀之再
來四海彌天悲鑿齒道安之又至司馬公兒童皆識愧其相才
韓休伯婦女皆知焉能賣藥語曰避名名追逃名名隨非黃瓊
之名難副抑樊英之名太盛乎前者孟郊牀下累王維之一呼
賈誼小生誤吳公之謬薦於時服虔改姓畏師門崔烈之春秋
鄭元亡名懼帳下馬融之禮樂曇聞宋庠避讒以郊爲嫌趙岐
逃難以嘉爲諱茲之呈改舊名者非傳燹之慕南容實劉備之
畏北海大部憐葛靚之義問自字仲思何居愛嘉貞之才恐他
日中書誤報是猶欲鄭君以籍名求官希楊朱以死名潤骨也

呼劉胡而止啼聞花卿而已瘡大部何望乎狀元之必中老夫
進士之不諱晉肅哉或者劉向更生辛文不死峴山再刻鴈墻
重題識狐篤之爲馬忠知范睢之爲張祿去戈則爲柳渾加日
則爲程昱安知滕曇恭之卽非曾子黃叔度之不爲顏淵乎慕
樂天者黃慕李白者碧如曇者力學髫年隳名中歲變范蠡以
陶朱豈忘功名改董蠻以仲舒自傷今昔伏惟大部俯准稽奚
聽從疎東庶幾易杜牧之名白駒皎皎仍唐風之字良士瞿瞿
呼華陽貞逸山中知有隱居稱糞土愚臣朝廷識爲方朔謹狀

重脩潮海寺啓

朝梧啓伏惟法華一雨是地皆霑毗首干堂無金不布能以一
擬瀉大海之瀾卽以甘露起梵王之國是在法王大力無容咒
鉢呼龍而在越士檀施敢不鬆金報佛阜城縣潮海寺者始唐
貞觀之初越宋政和之末因法運爲廢興隨世輪而毀立方一
吹而成世畛卽五變而化劫灰至於今也蓋已古矣寺爲齊右
夷庚燕南使候利竿初倒在乾隆癸丑之年彌勒當來逢司寇
玉公之至因決獄而賦東山乃菱舍而畱南國時也飯王宮裏
正讀神農求雨之書防風國中忽來大禹騎龍之駕民方磔犬
而弗靈公乃斬龍而不拜爰是默禱天神靜惟佛力繞牀一匝
十地雄雷彈指三聲八天大雨遂使老人舞國不殺巫庭元女
下天得收妖魃人謂使君隨車之雨公謂仁王護國之霖是冬

大司寇胡公亦銜 主上之命往察東人之獄入瓦官破寺

讀靖康殘碑方停車而住初地亦秣馬而弔諸天目觀宿桑迦
釋土面風吹獻花文殊泥容露立慨楞伽化作荒山陀兜率鞠
爲漏澤遂欲以羯磨大斧重脩戰勝之堂且思以舍利餘灰再
起切利之塼某士民長官佛天弟子既分符於一郡又受命於
兩公始擬以五十九年之炷爲萬八千功德之始而其時毒龍
作孽瓠子生波蕩鹿苑於尼河沉鷄山於香海幾使鷓鴣佛土
祇畱大海一漚帝釋天人盡証水光三昧此給孤長老分金布
地之遲優闡賢王慕佛雕檀之晚者也今歲玉燭萬年人安俗
又金剛四位雨順風調某念前誓因緣感諸方護力爲大司寇
立頭陀之碣地利當興爲少司寇作喜雨之亭佛恩當報是用
工召魯輪匠呼宋墨爲法華造此世界與楞嚴改作講堂敢布
同官集腋咸分大力輿瓢務使母陀手臂衆舉而造天宮勿
須彌鼓椎獨拳而打大地是序太凡乃爲小引善財五十三參
之拜佛佛書名蛟龍七十二座之碑人人署號

陳汾川封翁查太宜人雙壽序

雲伯大令攝崇邑之明年爲嗣君孟楷茂才得孫之三歲辰在壽星汾川封翁暨查太宜人七十初度廉頗矍鑠高允聰強則以爲美意延年則以爲修道養壽於是雲伯改集其詩文之自序曰頤道堂者志實也崔瑗才華無非父業孝寬經史傳及孫曾昔三班以父子著述鄭元以孫祖傳經今元伯何如其父乃仲弓又有童孫投分則元季兩難忘年則紀羣三世蓋自真人東行以來所謂陳太邱有何功德而公不慚卿卿不慚長萃才於穎川之一門也麥邱之祝宜有憲言壽人之文大難鋪序夫薄宰相不爲則韋賢必以一經老矣爲天子不臣則桓榮必以五世昌矣先生依記室而爲賢良列黷員而工才語舉孔休源茂才一策轢倒仲舒試杜正倫秀士五題驚翻楊素方且謂尙

知言言百種文集卷五
書求我諫議得君。乃才辟四府而不薦辛湯。人求孝廉而弗舉黃穆。當李棲筠觀察浙西之時。有劉穆之日得百函之目。而無如馬周章奏不遇常何張忠辟屬徒留孫寶置崔駟於憲府。尙著白衣得陳琳於頭風。但居記室非不知河陽節下。温造道高東海府中。潘滔才大。而先生切以仲由之負米。寧學嬰兒之不嫁也。以幕穀事尊甫膝下者數十年。或縣榻以待周璆。或立倦而見千木。爲鄒衍褰席。爲侯羸執轡。爲蓋公虛館。爲田忌郊迎。而先生終不出百里之杭州。近料一門之家政。讀甄琛稅書手。恒覽鹽法舉羶。而作軍書倚馬。而成文檄。怡怡然曾參之事。親悵悵乎魚梁之不能奉母爾夫。不居經儒之名者。則必入循吏之傳。不登科名之錄者。則必列文章之志。韋負逍遙不仕。而荆州之治。乃盛於世。康韋孟詩禮傳家。而郊廟之制。卒正於元成。

長君雲伯張霸神童徐陵才子。讀漢書五行俱下。問秘閣四部。皆通文彥博舞象之年。侍尊人而監稅阮孝緒。未官之日。書父紙於湖州。以故靈臺豹鼠之博。馬前七紙之書。莫不斧以天雷。速其文步。武平卽席七穆。三桓張華胸中千門萬戶。咸本父書。皆成家學。此洪公弼寧海荷光祥鍾邁。适司馬池光山薄宦名。命温公者歟。察本郡孝廉。充旗生教習。徐孝穆玉壘之集。刻徧京師。白舍人百金之篇。流傳夷相。於時待詔則祿養稽遲。棄襦則縣官可試。乃隨牒而至淮南。復量移而宰吳地。歷寶山常熟。上海奉賢崇明五縣。彼號神君。此呼慈母。持衣嗅靴之民板船。海上民樂官清之字。寫徧虞山。若固淮平使者。許留侯霸期年。穎川吏民能借寇君一歲。何至攀申徽者百里不絕。遮五倫者數里難行乎。昔齊樂預七十老嫗擔榭葉而追縣官。梁蕭昱百

歲嬪人扶曾孫而送太守史所謂鄧侯挽不來謝令推不去者
今有之矣慕劉渙官清修其亭墓哀休屠母烈寵以卣形不憂
雲漢之災竟獲鴻陂之利此皆樊遜清德之頌授之義方傳民
治縣之譜秉之家訓者歟少文之孫必有宗慤種放之孫宜如
師道孟楷終軍弱冠白狼槩木之奇賈誼少年諸老先生之上
親師則蕭夫子之門牆取友則王離騷之名士才既大於陸機
書更多於袁豹若上滕王之閣必新庾信旌旗使賦阿房之宮
豈愧唐朝進士日者荀攸後事盡付鍾君楊恭門孤實憑張裔
非乃祖之慷慨交游作其俠氣也乎七月十日先生生嶽越二
日查母悅辰蒙雙嘉耦天與比肩盤古夫妻同年壽考始而劉
凝車好簿策同乘樊英婢來下牀再拜今則宣文講禮已與韋
氏之宗義成通經既啟清河之族七十年捐金讓水樂羊廉士

之妻五百里責鮮雷池司馬孟仁之母注七篇女誠不徒子嬪
能賢求仲將孤門乃信豕孫有室孟楷配汪氏壽母之孫息也
幼擬離騷長通班史去貂蟬鬢髮翩翩侍中呼紅粉關圖堂堂
進士詩則天寶迴文錦則太平環頌若非上官玉尺才子誰稱
亦非及第金釵狀元誰配所謂非此母不鍾此子惟斯人乃有
斯嬪歟先生次君壽蘇以生員無官季子謙谷以贊府奉政女
子一孫五女孫四曾孫一閭門之內閭閻如者先生之福也松
喬彭朔歲星住世之年龍漢開皇元始上元之紀若祝尙父以
鈎璜頌彭錢以斟雉則非先生聰明老壽之本心祖德一篇隱
居十賚太史占老人之星月惟孟秋如來現壽者之相祝公無
量謹序

代華頂百五十茅庵乞米啓

為天台湧泉庵女士陳妙圓作

竊以德財並濟顯布施之六門。澧食兼資譯比丘之二義。泥連
 河六年行道亦須牧女調糜。奈羅城五眾安禪。誰化道人送食。
 天台者東旦之鷲峯。華頂者南瞻之鹿苑也。獨是地隣奧壤。並
 無分衛之家宅。接幽匿絕少行檀之主。無非窮子萬二千法侶
 之多。盡是化城百五十茅庵之眾。雖其炊砂作飯。道性能堅。煮
 石為羹。色身難住。羅云法大食一菜。而猶羸迦釋功高咽一麻。
 而必瘦道中五漏。凡軀三禪聖業。放開頭角。託居士而譚元墮。
 落鬚眉。現女人而說法山。中歲月只勤妮子針功。道外風情誰
 識。陵米價邇者法糧同匱。香積同空。羅睺供眾。呵道輩為夷。
 齊彌勤投齋笑。仙山為陳蔡。甚者律明四分。無過午之頭。拖衣
 具七條。多呼庚之納子。鬻魚聲裏坐成。有漏之因。飯版時中行。

誤。之果道中嚼湯誦咒時逢餓虎聽經洗盃聞鐘日見飢
猿習。所望梵天托鉢假佛子之神通米汁流船借樹神之法
力仁。起信誰非金粟如來善士生心卽是好施太子三旬九
食人千僧應荷人緣七日一炊五百伴誰非佛果宗風不墜無
過困睡飢餐佛法無多祇此穿衣喫飯天台寺裏今朝鑿破砂
鍋華頂峯頭明日踏翻確臼。

天台國清寺建五百羅漢堂啓

原夫真性無形無一形而不現法身無像無一像而不呈張八
教之網度法無邊立五行之門度機無量誘凡夫於天界覩金
色者發心憇小睚於化城見灰身者起信駕舩濟險雖四魔習
定亦成勇猛之軍秉炬通幽卽六賊歸真亦入大王之路阿羅
漢者十睚之始階三賢之初磴也宋太宗時曾敕造天台山羅
漢尊像五百一十六軀肇於雍熙之年奉于壽昌之日儀形古
矣志載存焉當時也鑄我眉百里之鐘度天下名童者十七萬
衆建釋迦舍利之塏脩龍門石佛者萬七千身旣而乾明院土
木之雄尊尊有號淨慈寺金銅之盛像像有名蓋不嘆學士之
手題隘以十六夫豈徒懷安之廣塑多逾八百者耶耀冶愚荷
智超迷蒙悟度力同蜩斧住七租之宗門功類蚊梯守九師之

教寺大悲有眼弘誓無肩希聖賢出處卽應身以體真身感龍
象與衰卽化相以參真相前者緜宮墮場賴青衣護瀆神多紺
宇虺隤藉鴻福圓成人衆鎔金髹漆廿五有顯已光明團土雕
檀八十好儼然完備於時曇花亭下再覩山神造寺之年玉女
峯前重觀彌勒赴齋之日去年先師遺教指道場隙地爲壇今
春法衆興心延賢劫諸賢爲會影隨形現登中峯者見文殊萬
衆而來響以音生陟曹山者感梵侶飛行而至斧羣山之一木
百棟可成畚衆土之一坯千尊可就廓莊嚴之境功德如林集
歡喜之緣慈悲如地唯是庀功非易冀萬善爲因依鳩力唯艱
仰一心爲成就儻或解囊歲事何殊貢水歸瀛如其輸篋程功
奚啻軀星助月刻日材聘嵩華匠追楊鄴麗窮圖繪爰新鹿苑
之規妙絕剗鑄宛備鷄山之概所爲穿山度石仿童子之南求
帶水拖泥效常啼之東請半千年一作寧愁手足嘗騰五萬拜
不辭豈惜鬚眉墮落今啓貴官尊士結人天一會之因賢宿仁
人脩福慧雙清之果望脩羅戰勝堂成殊非婆達施眸倘昆首
稱檀像就誰謂豐干饒舌

答陳雲伯書

奉東海傳書於德公桑下。開槭一讀。語語出於肺腑。來書第一事。謂與小雲書。不宜多諛辭。凡忘年之友。所期於少年者。竊謂如禰衡之才。豈及孔融。而諛之以顏淵復生。顏淵之克己復禮。豈肯赤身裸體。打鼓而罵曹者。因其好學與顏淵類。故以顏淵許之。若黃憲學問大成。則直曰國有顏子矣。小雲洋洋纒纒。筆底之零金碎玉。一掃數斗。鐵雲在真州。謂良士曰。小雲比蘇過好。才高而氣下。及良士還吳。視其詩文。諦其氣息。聆其語言。性情從肝膽出心。以爲吾輩之替人也。喜之至。故許之過。良士浪游數十載。見前輩賢哲。皆以此法誘掖後進。故眉飛色舞。而欲於諸老後分一席也。今甫與締交。而瑕疵之。譬如吾輩盛開之花。而責初茁之牡丹。曰。汝蓓蕾小牡丹之才。必望我鐵梗盈抱。

之海棠而却蕙矣。小雲此時清才也。美才也。實奇才也。我輩目不遇清才美才。遇清才美才而亦奇之矣。况果奇耶。良士素畏奇才。兩字謂用之不善。不特嵇康鍾會孔融禰衡之倫可鑒。卽太白東坡亦以奇才受累。良士不敢自誤。以誤人也。蓋喉舌間有一斛言語。欲進吾小雲於百尺樓頭。又紅柏山莊有秘書數百種。欲效蔡邕於王粲故事。託付得人。庶心無罣碍耳。來書謂足下之詩。不如鐵雲樊村。且及良士。請以我四人之長短論之。鐵雲前八卷之詩。良士常向上一筆勾却。曰從此存集。則先生之詩。無古無今。獨步宇宙。於尊兄碧成仙館詩曰。一篇不可刪。二說出一人之口。非佞也。蓋碧城十卷之題。皆人人所欲做之題。如吳梅村永和宮詞圓圓曲。但看題目。已是驚采絕豔。故可改而不可刪。鐵雲八卷前出鬼方。則不若馬墨麟徐芝仙諸人

之奇險。出入京師。而贈答諸人。皆人世所不聞名。故謂之曰刪。樊村詩體。漢魏正始之音也。其作南北朝樂府。是蹈楊鐵崖之前轍。與鐵雲之春秋樂府。皆楊子雲太玄經。寂寞中耗費精神。非人人曾中欲做之題。恐作者極意矜重。閱者祇作十七史彈詞看也。碧城詩。良士欲盡一年之力。首首和遍。恐蹈詭符之誚。故不果作。蓋自有詩集。碧城一集。如秋。霄。月。華。玉。輪。五。色。如春。林。花。讌。繡。幔。十。重。又。如。天。女。炫。粧。仙。娥。顧。影。吐。咳。珠。玉。隨。閨。風。飛。落。人。間。也。宜將刪去之作。首首改存。不可一首刪也。謂不如鐵雲者。萬里路爾。不知萬里中人人欲做之題。不過百餘。如蜀道中人人欲做之題。皆在鳳翔漢中。皆陝西也。入劔門。則武侯廟綠珠井明妃村而已。縱作一首登峨眉絕頂詩。無人能口誦也。老杜在蜀。如秋興諸將。皆在成都。而作西京之詩。故人人

流涕而讀之。今樊村曾中深知其故。不能懸虛而作。故作樂府。此避易而趨難。樊村之慷慨悲歌。嘗稍稍讀其數十篇。而惜乎其未全讀也。想其盛氣流行。驚人心目之處。必不在南北史樂府也。質之樊村。亦必首肯。至若良士。則甚愛碧城一切之題。逞其狡獪伎倆。而改爲董賢廟碑。孫夫人廟碑。蕭皇后哀文。懿德皇后哀文。明與雲兄爭勝。而不和大集之題者。物可一不可兩也。去年見頤道堂詩選。益多憑弔古今表章忠烈之作。驚心動魄。自以爲不可及。故有必傳兩字之作。及觀崇明往來一冊。多至百餘首。則心竊不然。以爲鐵雲之詩。多於前。而雲兄之詩。多於後。將來之病。必無好題目。而隨遇皆題目矣。此不得不爲雲兄進一言也。鬱其才。使不卽伸。忽然而作一首。得之天籟。或出鬼謀。則半首一篇。勝他人之十疊韻矣。譬如良士作始皇墓詩。

曰。五百童男浮海去。八千子弟渡江來。揚州在汪劔潭先生席上。他人閱此二句。曰。此秦始皇一聯輓對。人人曾中有此語。而未嘗湊成一對也。所謂鬼謀者是也。雲兄新集中。篇篇有之。不謂過自謙抑。昔有謙之太過而不嫁其三女者。可以鑒矣。尊伯老成清簡。是徐稚子郭林宗一輩人。見屬壽序。當竭其心思。能事而構之。而略節不詳。古人作序作傳。皆舉其平生行事之零星碎小者。摹寫之。如謝安傳。絕不序其奠安江左之功。而序其坐海船。扇蒲扇。著圍棋。折屐齒。而東山絲竹。至今如聞其聲。卽馬遷作高祖本紀。亦不過序其賴酒錢。闖博場。使兩女子洗足。而英雄之氣。奕奕在紙上也。昨有一書寄小雲。屬添寄數條。遲久未得復。故先擬一篇奉政。仍望將嬉戲釣游之事。或幕中所辦公案。利弊平反。新異可傳者。錄寄數則。俾得添入此序中。使

文勢波瀾往返。則不同於章陳之沿襲矣。來書謂傾東海而潤筆。今急就而序次之。恐遇轍之鮒。見笑於東海龍王。而以為不足潤也。小雲代贖秋衣。而北風又來。索逋之客座。上常滿。較十年前浮家泛宅。全家在皋亭梅樹下度歲。另是一種風味。日日效陶淵明作乞食詩。臨顏魯公作乞米帖。知必有賞其筆墨之佳者。雲兄其首屈一指也。崇明卸事。若得實缺。良士思以方外之身。作碧城書記。先為大集。作一箋。注次將萬春園院本。作成再將鐵雲之琵琶。賺人面桃花。及諸樂府。令兒子善才書一通。藏之碧城仙館。此又一大願也。蓋自國初至今百八十年。詩人輩出。至雲兄而集大成。鐵雲嘗與良士言。詩壇一席。各宜避君三舍。此後惟當以詞曲度日。鐵雲詩勝良士。尚作此言。况良士耶。况有追風逐日之小雲。伉儷耶。文章五色。鳳之雛。無非丹勞。如何嘉慶丁丑秋日。

山。鷺。鷺。良。士。之。合。十。讚。歎。未。有。己。也。尊。兄。勿。過。責。也。山。莊。柿。葉。初。紅。老。梅。艾。納。作。紺。碧。色。望。東。海。朝。霞。隔。大。海。水。思。君。不。見。我。此。余。丁。丑。年。在。崇。明。初。刻。頤。道。堂。詩。樊。村。勸。余。盡。刪。碧。城。仙。館。舊。作。仲。瞿。謂。舊。作。一。首。不。可。刪。因。作。此。書。相。寄。也。蓋。樊。村。學。人。之。詩。墨。守。婁。東。沈。敬。亭。許。九。日。之。派。沈。許。奉。歸。愚。為。圭。臬。故。所。見。如。此。余。十。四。卷。前。從。樊。村。言。所。刪。較。多。已。梓。成。大。半。後。亦。覺。其。減。色。因。以。所。刪。另。編。外。集。至。今。頤。道。堂。全。集。微。特。不。愜。閱。者。意。亦。不。愜。己。意。手。定。之。集。尚。如。此。况。身。後。待。人。論。定。耶。因。思。古。人。全。集。完。善。者。少。職。是。之。故。試。取。漢。魏。六。朝。三。唐。兩。宋。及。元。明。各。家。全。集。觀。之。毫。無。遺。憾。者。幾。人。哉。余。詩。自。頤。道。堂。全。集。外。加。以。西。泠。五。集。華。胥。七。編。秣。陵。集。戒。後。詩。

存畫林新詠不下萬首潘榕皋先生謂余詩過多無人能閱全集者故擬分類分體另編碧城詩髓一編損之又損尙及二千首則多之爲患也此書久藏篋衍因錢君梅溪爲仲瞿哀刻文集因錄與之並識顛末以志良友相愛之意誤從樊村之言在當日亦未嘗無所見且非此則詩格不能變也故無悔焉道光戊戌六月雲伯書

煙霞萬古樓文集卷六

祭光祿大夫素香公文

秀水王曇仲瞿氏一名良士

元戎麗極仙源輝玉牒之圖華嶽崩雲天漢泣銀潢之冑國以宗老爲尊天必假耆臣以壽蓋長泰壹之神不死者國皇之宿乃勿令綠圖益算於軒庭紫府乞齡於羲宙國喪雄陶人思風后豈佑其後者能昌介其躬者弗厚仙闔難排靈穹莫敏如吾素香光祿府君之棄吾制府長公季昆而逝也一則班超萬里軍中讀馬服之書一則黃霸三年江表手鳳陽之訃毀容侍髮含明匪親纏髮承袞桐棺莫附蓋河湟遠而岷悲淮泗歸而藜莪賦竟使孝王伯仲慟闕禮於飾終百藥壙篋爲奔喪而徒步用是青芻縮酸寮侶摧膺白馬流蘇寅官孺慕者也公

傳賚鹽梅臯颺肱股懷平當之經濟學出天人資郤穀以詩書
才兼文武世紀伐於功宗身起家於民部薛生兩鳳翊家國之
羽儀荀毓雙龍惠熙朝之霖雨是非后軒夢駑驅羊出牧伯之
才抑猶趙夙生衰愛日煦江南之樹繫公啓宇手種三槐卽伯
廡初開幕府於臨安鐵鉞瑠戈遂築節樓於吳會人歌杜母羨
歛胥蠲民頌倪寬羸逋不督察蟲盤覆地之寃洗蟻穴黃沙之
獄秉墨吏于蝨炎屏諱官以鷹逐陶侃之恭勤軍府檢束豪民
劉宏之都督荊州威行南服於時中官錦彩善政時旌 天
子璽書慰勞最篤而又黃龍望府次君有飲水之清紫馬來南
太守有貨船之譽初官司馬江東兩杜之名繼駕朱幡鳳水三
刀之署使郵亭皆畜鷄 幹吏俱爛文句此非殷家世學盡

受訓於劉翁公綽門風定躬陶于孔鑄者耶 皇上以元齡
屏誠贈公光祿之勲韋賢籛金晉賤元成之爵方喜福時令子
永承鯉訓中庭堯叟賢昆長侍阿翁東閣而公則福天遊幻纔
蒔少海之桑壽宇迟迟竟騁遼東之鶴神鴻歸去天上行春赤
鯉飛來人間無葯嗚呼痛哉 和衷江戒有元方父事之尊
參佐淮南受萬石官聯之教認楊公石馬當年隴草增悲望彥
先琴牀今日徽絃永悼蕪辭遠酌思題都尉之碑絮酒空醴敬
奠平原之廟靈駕風來神顏電笑尙饗

督撫公祭督部大學士公孫文靖文

嗚呼靈穹勿圯倚斗弼之有九星巨鼇不傾藉坤輿之有八柱
以故樞陳元律七聖佑天世馭蒼牙五期佐命設若斷盤皇之
手臂必無兩嶽同崩卽或壞帝座之藩門豈有三台並暗况壽
中黃以翊寶鼎元輔長生老彭祖以相放勳大臣弗死豈有星
逢復旦再奪三公日際重輪三薨上將謂中朝多翼弼則未必
玉帝少股肱且天上有文昌又何必向人間借將相也越我督
部大學士公孫公以七月某日薨於來鳳時也苗民犬孽軍已
焚其牙旗米賊妖人部又褫其紙傘 天子坐金牀以望太
歲夜有捷書三軍祭白石而名彭巫鬼猶畏藥乃繼福郡王祁
山之訃一國皆驚距和伯督沔水之喪前軍先哭天喪元臣何
其革也或謂公宵趨上邽倍道兼程夕救樊城事繁食少而又

南封銅鼓飲伏波之毒流西祭金人食疏勒之井水以致偏枯
病禹大荒之神術無靈甘草醫龍伊尹之煎方不救七萃謫虞
五軍郊弔繫可痛也蓋公忠以相國義以督師前此黎侯失德
阮疆徂侵雕庫告國難於前申胥乞濟師於後說公者謂君如
好鶴臣敢盜弓訟是元咍國猶肥鼓公以仲尼沐浴荀息鼓鐘
自當收充國金城徙夷人銅柱將見一征自葛三戶亡秦國斥
突辛屯開戊已直可使百蠻土燂全歸 天府輿圖六詔交閭
盡拜將軍畫像此五單于分國之日天厭南荒亦兩克汗並立
之時利居中國而公則木鬻緩渡繩棧徐趨圍項三重退原一
舍明許其壺漿簞食以迎默聽其棄甲曳兵而走蓋以爲殺相
柳而三仞三沮無若服孟獲以七禽七縱故其師陳富良江也
爲之子竊燕而伐則匡章可以無功爲季孫逐君而來則乾侯

可以勿戰此由念彼苞桑傷其破竹者也泊乎羿弓射日共頭
觸天太公以蒼兕覆船長鬣以餘皇誤敵公猶斧開馬足軍出
龍頭以桓侯據橋之聲止晉帥爭舟之血宵且濟也整以暇矣
如謂軍籜衷甲荆舒肆欺梨樹奸盟吐蕃賣詐公豈不知危攻
束馬險出飛狐斷長蛇兩頭塞狡兔三窟祇以爲 聖人不
殺之心王者無外之意但宜魚水其君臣不可鯨鯢其土地是
爪士全師以伏弢膚公分誇於破斧者堂堂乎仁且義也於時
降城旣築老鳳初飛以桓公北伐之軍充寇恂還朝之騎以馬
援南征之檄應温嶠內召之書國以李牧爲長城 帝用張
蒼爲計相方知唐廷燕許便是將星舜殿夔龍亦勝弓甲公復
曳姬公赤舄活安石蒼生務使呼韓頓顙知貳師爲近臣回紇
來朝識汾陽爲內相所以樞庭樂奏無非夔吼鵬爭秘省文章

亦是三宮五意蓋行父之頭未禿而荆公之鬚已蝨也未幾中
書出鎮節度巡方領陶侃之八州奏姚崇之十事尉陀國裏旌
節花開日月宮邊阿衡船到人以爲田千秋之相度李光弼之
軍聲歟至若官轉六曹身遊九寺出托克爲行省中書屈太白
以翰林供奉君恩則前後公銜故事則子孫男爵此史氏
叙官詞林佳話公之相業不繫此也至於躬毆狡楔手掃攙槍
皇上以廓爾喀不靖命福郡王移師西藏也時則婆羅門
族黃教三千帝釋國中魔兵十萬帝謂梵天兜率豈容調
達刀聲佛土耆闍不許天神劍響而不謂鐵圍三戰鬼母皆飛
法螺一吹金剛盡甲王乃咒韋陀之杵折波旬之戈公又屏履
羸糧馬牛運木護火具以狼機通雪山以狗站驛名籌筆馬借
駃經聚米如山飛芻入國公之輸輓抑又勞也旣而韋臯鎮蜀

人言諸葛後身嚴武守川地是公孫舊國而其日黃巾白狄苗
龍之支黨潛來赤髀橫蓑縻瓠之子孫又反我以爲令如蠶尾
楚人是何多也彼以爲地是犬牙漢兵其如予何公乃掀翻大
海沃潑流螢全抽董澤之蒲慟殺萑苻之盜而無若荆巫狗噬
楚鬼狐鳴持白挺而作妖民探黑丸而殺武吏方將分元女兵
符收蚩尤魔陣乃赤眉之族未殲而白雞之年已讖矣嗚呼痛
哉河湟未靜休璟先亡安西未寧代公又沒公不念大庭減
膳南內撤懸與其風山紫府天上神仙孰若力牧山稽太平
宰相某等官聯江左手版淮南翼尙父以玉璜祭巫咸以金鼎
欲書亥字碑已藏峴首之陽要望午橋神亦葬畢原之上用申
盜酒祗醑緹觥爲將軍作諭蜀之檄靈馬風來與丞相作詛楚
之文雲車電下

爲河督徐心如宮保祭沈慕堂治中文

嗚呼。裹雞漬絮。奠南州之酒者。千里之交也。白馬牽旒。迎庾公之喪者。黃河之阻也。而况兒寬爲經術出身之吏。羊綏是國家可惜之人乎。嘉慶十年四月。天子嘉趙廣漢之聰明。使以

南路廳分知畿輔。以張京兆之儒雅。又以治中官擢佐黃圖。方將收豺狼避道之最。枹鼓希鳴之薦。賜黃霸以丈車。拜韓稜以楚劍。而乃輦轂三年膏肓。一臥褒馮。勤爲佳吏。未下璽書。望蔡茂爲中台。空成禾夢。受俸纔畱一月。攀車已哭。五倫如我。慕堂京兆。治中之卒於官也。公察舉本郡孝廉。充武英殿繪圖官。六年。凡一切玉衡金度國章。泰壹圖書之秘。風鼓孤虛。鐘律刑德。奇胲之式。蚩尤封胡。鳩治地典。容區之圖。星經日晷。宮室職方。形勝之器。靡不手規黍尺。目睇燿蠡。輸盤不能名其工。輅璞

不能究其博以乾隆五十一年

欽定四庫書議叙之日

命以左右輔令長官署用公遐慕潁川四長之名中牟三異之績手樊遜清德頌讀傳氏治縣譜歷雞澤唐山肥鄉安平蠡令於時韓延壽鐘鼓管絃之治恩信遍廿四縣袁邵公噫嗚流涕之聲獄罪出四百家矣而贈公捐館賢宰宅憂陶士行居廬弔鶴阮嗣宗泣血蒸豚無以喻其毀也憂滿又歷宰饒陽藁城爲大名長垣令懲西門豹請璽納璽之拙任巫馬期星出星入之勞二年之中薛宣幾欲換縣馮魴呼爲健令嘉慶元年總督梁公上最狀以公爲卓公寬中劉陶錯節也今上褒公治行畿南百縣張旣爲三輔第一日下諸城呂又以一州居首以三年某月應三刀之夢遇采薪之憂病痊赴部聖上以關中地重非良吏不能成况虎威直督以畿甸才難非賢者不能

保。繭。絲。障。大。府。表。刺。涿。州。所。謂。八。鎮。開。關。九。州。大。湊。也。改。保。定。安。州。長。選。深。州。直。隸。州。事。漢。法。以。六。條。察。于。石。州。牧。爲。尊。陸。彰。以。一。歲。歷。三。州。車。朱。最。曜。公。風。屬。吏。行。春。警。村。民。置。鼓。郭。伋。去。帝。城。不。遠。蒙。福。京。師。張。亮。作。山。頭。好。夢。絲。掛。幽。州。趙。郡。之。鹿。不。偷。綏。山。之。桃。常。熟。或。持。鎌。刈。草。而。宿。郵。亭。或。課。果。樹。榆。而。訓。村。落。來。則。耒。犁。用。水。去。則。胡。牀。掛。柱。公。之。愛。召。翁。卿。似。之。公。之。察。龔。渤。海。遜。之。也。京。兆。王。畿。千。里。以。同。知。分。四。路。猶。郡。國。專。十。道。南。路。城。接。天。垣。地。連。瀛。鄭。賣。刀。劍。賣。牛。犢。者。爲。良。民。棄。鉏。鉤。持。兵。弩。者。爲。奸。宄。是。以。南。塘。舫。下。逐。捕。爲。難。冀。州。部。中。豪。強。善。梗。公。肅。清。蹕。路。游。擢。治。中。方。高。柔。擁。膝。之。時。正。汲。黯。病。多。之。日。德。林。之。級。未。徙。張。威。之。笏。已。還。以。十。五。年。四。月。卒。於。雄。縣。嗚。呼。鄭。子。產。國。人。含。玦。盲。史。傷。心。公。孫。宏。經。儒。治。才。漢。書。循。吏。公。

四子孟季以孝廉明經授令長校官叔仲以河隄水工爲郡丞
縣宰胡威父子皆是清官石奮一家居然萬石豈非隱侯門閥
雲卿文章代有傳人替手乎公治類桐鄉慶流石相吳公爲治
平第一所去民思田叔爲天下長者乃令君死某婁湖列宅與
沈慶之閨里通親韋放徐州與張吳郡昏姻篤舊方期吳興印
渚他年歸話司州東陽長山今日已無支遁孫興公猷川築室
空賦遂初顧長康一鼻長風無從寄淚敬遣某官順過任城代
躬醊奠一盃椒醕臨風望顧榮琴牀幾瓣心香何處哭王濛塵
尾尚饗

爲河督徐心如宮保祭戴恭人文

夫有博平新野之德者宜饗以鄉君萬歲之封有宣文修成之
賢者宜報以趙母赤烏之壽此史氏艷稱乎萬石君之教家曹
大姑之能誠子婦也重九後之數日恭人之訃書倅來淮浦時
也季君玉年以邱媵功喪方館甥貳室夢中指痛許止之藥未
嘗遊子衣單許郎之裾欲絕括髮奔喪禮也恭人爲今治中刑
部員外郎前滇黔兩省州刺史芋園先生德配故廣州司馬石
蘭公冢媳訓導戴雪溪公長女也受經伏勝侍戴公之中庸治
禮曲臺傳韋姑之論語續史則巾幗選談弄筆而女中燕許凡
一切龍輔女紅之書劉休鼎味之錄陳媛獻椒辛姬頌鞠罔不
佩容臭於雞鳴承揮掩於夜燭結褵之始外則王舅在堂內則
君姑在室與門五世男角女羈食指千名奴耕婢織李平陽高

明賢女每事皆諮鍾夫人帷裏簡婚無姻不擇憲部公以名進士歷官內外也雲司畫日之筆治中京兆之眉三刀雲北一州水西凡韓母中興之賦皆蕭恭德政之碑也丈夫之子六人季女之尸三索漢武帝元光初詔三兄各舉孝廉唐高祖武德開科一弟先成進士竇家五桂添郟詵之一枝荀氏八龍少朗陵之二子嗣君等或乖厓治蜀一縣神明或震澤分符三吳大治九天咳玉榮墀步於堦篋一帖泥金耀宮袍於娣奴而恭人方三錫三加一驚一喜也喜則花磚弄影小郎之乞假將歸懼則竈突吹風冢婦之災占不已蓋洞庭之書方至而恭人之疴已不起矣當時也巫山滄海元微哭婦之詩蠶薄機絲王肅傷妻之淚王夫人郗門宅相九十何衰魯姆師宗國女儀百齡以外憲部公將衰潘鬢忽傷王維寡居乍鼓莊盆不作樊英再拜天

何奪我恭人以古稀之歲耶恭人期孫六人女如之曾孫二人女亦如之長君官銜在祿秩之令姓名登茂陵之書幼者或絳帷受易吞卦聰明或擁樹弄書之無識字李夫人之八篇典式不傳女而傳男華孟姬之輜駟安車比抱孫於抱子豈第京陵當日人仰慈雲東海當年獨畱孝水也已哉某學愛子將才憐士行有左思嬌女之情少張禹愛男之性季君之讀書賓幕也安陵樓上丈母見憐金谷園中姊夫最勝袁豹怪其書多樂廣知其玉潤方以為選壻窗開泰山峰近豈意蒙喪錦被元方訃聞泣血蒸豚嗣宗歸省翳可痛也夫甘泉畫像朝廷翟茀之光也子舍白頭士大夫私家之事也某家寄淮南地睽吳會六龍同食喜荀陳兩姓之方昌五鳳齊飛慨軼轍二人之未第方擬恭人以師氏媿媿之年王母皤皤之几何圖九龍母死五時

衣空萬歲山高。一星婺墜傾箱倒庋待謝家親戚之濃。篋管包
苴。信許允山中之淚。遙申椒酒代榛栗於威姑敬獻蕪辭補闕
友於君氏徐惠辭章唐六典誰修女憲之官書班昭文字漢春
秋宜入夫人之石誌。嗚呼尚饗。

爲戶部侍郎總管內務府大臣桂香東芳及己未同年官

九十六人公祭史太恭人文

嗚呼讀瀧岡之表。慟母儀者。一代文章。讀碧落之碑。哀母教者。
一門四子。匪桓少君。鹿車甕汲焉能相鮑。宣爲名臣。匪義成君。
紫綬文軒焉得訓。崔駟若師氏。我年母太恭人之叔季嗣。君某
等己未同年進士也。其初燕山五竇舉孝廉者。一叔而四昆。其
後鴈墀十年成進士者。同科而兩甲。雖堂開四桂。護庭悲一鶴。
之飛而家本五良。令母喜三龍之躍。先年以宜人章服晉封。
太恭人也。五花金字卽長君鳳閣文章百縑。告身卽季子螭坳。
手筆甫也。工部爲太夫人吟慈竹之詩。遜也。揚州有何水部看。
梅花之閣。我諸同年以歲時上壽也。擬以八十上郡君之板。九
十介蘭英之酒。登堂呼魯肅以兄上殿。掖馮勤之母。乃石建之

四子白頭同居子舍而王濬之三刀夢益一麾出守也季君守蜀郡之明年陶母居京潘輿弗駕官中書者以蘭臺秘省爲家居官工曹者以補闕拾遺爲林下舍人俸薄借潤筆以甘旨水衡錢多比參苓於米價太恭人方嬉花園以宜春抱佛經而坐夏豈意三周小滿還朝之五馬未歸五月中天無恙之慈雲忽化耶太恭人執婦道六十年風庭抱樹代夫子而臥冰麻粥兩孟乳小郎而夢抱蓋別駕不爽爲王祥之孝撫叔不失爲昌黎之嫂也初年丈蓀裳公通守南康三年熱釜寧畱孟光春聲一輛柴車不入王良官舍太恭人之意以爲冷官滋味不妨借鼎嗜龜海樣王城不若隱人高價嘉慶元年公膺
兩宮引

年之典受于謹延年之杖時也房中之樂盡是壽人夢裏之鈴無非才子七孫八壻韋姑周禮之書百拜三加子姓冠婚之禮其閭門福德孰有甚於此者嗚呼八子爲二千石之官一時未必三品受女賢人之號百歲何難太恭人豈不見夷鼓方雷一門氏族封胡羯末羣從芝蘭讀廿四首達生丈人之集齊眉畢竟手四十章西歸遺教之經人淚闌干文曰

燈纂能榮鬢華不萎仁人事母百年乃慰若佛涅槃若仙脫蟬

慈母安矣孝子憾焉月惟重午其日則晦熒惑在心

是時熒惑守心者一月

日中方彗三沐三薰灑潘請饋反席未安若坐假寐恭人先期召名畫師曰予事佛寫三歸依曰予受經具四威儀童顏鶴髮圖成而嬉飾終之物恭人手儲瘞錢十萬鑿楹而書漆棺壽藏舍殮所需明衣明器治於閒居不欠一錢麻姑升仙不磨一針大士生天南康之喪居以九年琴書一寢行像長懸俞氏史氏初爲朱陳漢法交互相爲昏姻內兄外弟出入庚庚謂甥謂舅

我舅我甥以是兩姓弟兄發發季狸季豹伯達伯适入廚八及
四黃四括進士者四孝廉者八兩氏各以姑表為昏各生四子鄉舉者八人成進士者各二人同科同甲
金昆玉友一樹之凋三珠之秀荀令中書何郎水部兩車入朝
五馬出守昔事南康不入官舍臥冰哭竹王祥別駕乳姑者有
乳叔者寡恭人之孝名聞天下上自廟祭下迄童婢三鼎五鼎
手自滌器鼠耗米耗三千不計恭人之仁如雨雨地延壽有杯
長生有枕飛龜不藥畫龍無病手遺教經人華嚴定鴻範五福
繫母則聖亥字疑年七十而五凡我同年登堂拜母絳帷聽經
一朝弗覩讀大家箴悲中興賦恭人之堂名曰四桂恭人之封
鄉曰萬歲張說父碑鍾會母誄一門之中文章諸貴絳州刻石
甘泉畫像列以班昭傳之劉向靈草一株胡香四兩絮酒椒馨
哀哉尚饗

查梅舫大廷尉八十壽序

某聞威械弛而俎豆布鉗鑕絕而九刑厝若廬都內之獄不興
而后廷尉得以斷天下之平孔稚圭曰從古名流皆有法學故
釋之定國耆頤漢朝元常文惠久壽魏闕也嘉慶十八年四月
朔日梅舫大廷尉八十攬揆九卿六曹大夫為公奏壽人之樂
翁覃溪學士以下祝嘏而介詩者如千人而屬序於良士曰昔
荀爽百日而司空賈誼一歲而大中僕年八十始為廷尉子毋
祝我以殷阿衡周鬻熊張蒼夏侯勝胡廣公孫宏亦毋祝我以
龐公戊子之大小晉公甲辰之雌雄使僕如羅結之百二十而
長秋王祥之九十四而三公一門襁褓百笏儀同堯年蝙蝠果
老侍中勿虛為我譽也予之康強而耆艾者予知之矣予滇州
再刺蜀縣再尹守粵西者兩郡臬黔贛者兩省常鎮觀察楚南

轉運中歷金川兵事安南軍政僕稍有武功不足稱也然予之
康強而耆艾者予知之乎予始宰縣也蜀之宕渠今爲南江橋
名黃金地曰柏陽灌木百十里古柏萬萬章盤古不名其枝柯
之壽豎亥不測其道里之長孔明不踞爲廟漢武不取爲梁幼
者柏精老者柏皇在混沌不鑿之天地有萬古不覩之太陽時
無莠民乃有奸商開山匪大禹墾草匪商鞅將庇焉而縱尋斧
亦狡然而思啟疆山虞貨金錢匠木刊州章予投牒而籲大府
曰人三爲衆獸三爲羣十年樹木百年樹人五丁欺蜀牛之糞
大鐘給公由之君商與民爭利夷與民爭地人非奢香驛非龍
場徙令者商君之木構兵者處女之桑黃龍清酒罰必雙深山
大澤禍所藏利市百倍必生否臧斧斤一入必有死傷惡木不
廢嘉樹無忘曷若斷鐵山之直道樹禁碑於桐陽寧絕地利毋

破天荒至今五十年無干我判也予知之乎枯松有太保之名
大樹爲將軍之徵老七松爲處士壽五柳爲先生樹有音聲木
有神靈某喟然曰此公之所爲康強而耆艾也某又聞之矣槃
疏地力揉耒耜耜神農氏之治也鑄刃范金避臭去毒燧人氏
之始也昔鄭國溉澤鹵而秦成奧區李冰開稻田而蜀稱陸海
公不嘗開巴山之老林乎檄楚民二千戶墾萊田三萬頃使九
真知火種者任延俾廬江知牛耕者王景棗祇之屯田許下張
飛不用於閬中鄧艾之手執耒鋤葛亮未行於南鄭蓋后稷以
稼穡而神伊尹以區田而聖某聞巴州通江之間大寧竹山之
內終南漢陰之際各有老林皆千餘里焉使大吏行公之法以
清秦楚蜀之山溝則材木柀蔽於漢江以驅秦楚蜀之耕牛則
粟米積高於庾廩統萬古之龍荒合三省爲一井苗民何所蟄

其穴山賊何所竄其脛公之德倍彭錢而八百之未有艾也公
觀察淮南某從公遊時蜀賊縱橫西鄉鄰水間公方吟焦山之
鼎咏橋亭之硯譔潤州之誌收漢人之篆率更千字之碑寶晉
百家之翰江淮草木張萬福之威名甲士金山陳少游之水戰
客方借箸而談公不拊髀而歎某以爲八公文字乃在淮南四
皓功名不如絳灌宋制大理官不置吏士大夫手掌文書防吏
奸也公筆惟畫日三尺之法不搖案卽如山一牘之手弗假不
使召公勞而爲方伯者 朝廷所以禮耆賢也必使臯陶暗而
爲大理者 朝廷所以慎肆赦也張湯持法精天子用何比干
而平周興治獄峻天子用徐有功而慎此今日大理所由覈尚
書之成要乎某聞之伯機有支離之叟法潛有蒼髯之友宏景
以種松而仙張騫以石榴而壽東平之柏西靡摩頂之松東首

白公有檜歐公有柳成都之桑不多龍陽之柑最久外黃柏樹
之數虞延知之大別千年之柏神禹植之某今而知楷模所以
百世周孔所以長生也夫福一日之名位者不若爭百世之利
立一時之事功者不若壽一方之命是以草宅病於周書均田
美於夏正桓寬所謂寶路開子思所謂寶藏與古云埋金九里
不若開得意之田置身九卿不若官一縣之令蕭何作相以請
佃上林爲奇功貢禹彈冠以請佃宜春爲善政若汜勝有九穀
之書而不墾一弓之地賈總有齊民之術而不開一廩之畷此
老農之月令非縣官之治譜也山海經云西南黑水之間廣都
之野爰有膏穀冬夏播琴爲公千萬年南江德政碑可也中丞
銅鼓堂詩遍天下矣公換羽移宮拋鍼擲線叔源之步不隨明
遠之色一變詩如千卷落花依草邱中書之風流舞雪迴風范

衛軍之婉轉廉頗今日方上馬而如飛馬援他年且據鞍而顧盼

歲癸酉春暮花農通守自南海旋京云廷尉生辰京師鉅公爲詩乞君爲序余曰某爲文喜紀實事平生無釀詞遲日走見廷尉曰我平生政事無當意者少年宰南江柏陽之柏廣袤百十餘里禁商民之奸顓監司立鐵案封其山至今遵之活大柏億萬萬焉時蜀未被兵恐伏莽有先見也又嘗開巴山之老林深巖密箐萬古不耕予召湖楚民一千三百戶伐叢灌芟荆棘墾沃田二萬三千餘頃刀耕火種數十年熟矣因書南江紀事詩暨黃金橋古柏行曰此題目也爲予序之某曰此功高大禹德茂后稷矣某聞川楚之間曰城口團城有未開老林千餘里焉終南之南漢陰之北并柴關鳳嶺而

東老林亦千餘里焉合大小巴山之老林千數百里凡三省四千餘里皆禹貢梁州之域也華陽黑水爲梁州黑水在今畱壩廳之內想大禹刊木益焚山澤時皆在此處此四千里之梁州更世亂而再成洪荒者也廷尉創開老林始此一縣所謂非常之原黎民所懼人情昧安難於慮始此事功之足傳千古者故序之以請於後此之節鉞三省者踵公法而行之庶幾乎弭百世山民之亂而衣食此四千里之人民也并記於此文之後

屠孟昭大尹尊甫蘭渚封君七十封安人宏農君五十八

歲壽序

漢崇上巳晉紀重陽春秋命歷之序魯侯燕喜之章古今士之
傳世而不朽者曰儒林文林曰賢良循良疑年在亥四月維夏
廿有三日爲封君屠蘭渚先生七十攬揆封安人宏農君設輓
舉觴則孟昭太史宰古真州之第六年也初先生年六十浙中
士大夫爲孟昭介學於通德之里第鴻章鉅製班書范史而先
生之德始彰先生直亮方正朱絲繩也溫良精潤玉界尺也儉
年稼穡寒年織績豐年玉也讀萬卷書行萬里路天下才也梓
其壽之文十餘篇景鸞經涉七州李固周觀天下序者謂先生
豪販吳漢於漁陽贅百里於秦市逢萌擲盾而不役傅介棄觚
而不事序者謂先生介一旦歸歟手計然之書取白圭之棄序

者謂先生善處貧。樓護過齊而合宗族折像厚藏而施親疎。序者謂先生善處富。顧凱手植嘉樹而憲之果爲吏部王祐身種庭槐而旦也。真爲三公序者。謂先生。迪。遭。而後。通。艱。難。而後。順。爲。先。生。食。其。福。也。若。者。序。先。生。之。遇。之。奇。而。不。序。先。生。之。志。其。遠。而。志。其。大。也。功。莫。難。於。傳。世。人。莫。難。於。知。子。陳。羣。生。實。而。知。其。爲。興。宗。之。人。索。靖。生。緜。而。知。其。爲。宗。廟。之。器。夷。簡。宰。相。才。祖。禹。天。下。士。皆。門。以。內。知。之。不。先。之。以。丁。覽。者。必。不。成。子。賤。之。堂。構。不。後。之。以。韋。陟。者。必。不。傳。安。石。之。盛。名。袁。象。才。識。父。覲。知。之。謝。朏。千。金。父。莊。識。之。蓋。先。生。知。孟。昭。之。學。不。惟。翰。林。孟。昭。之。才。不。止。令。長。故。使。之。盡。讀。天。下。書。遍。交。天。下。士。若。崔。液。以。神。駒。譽。兒。沈。約。以。青。箱。名。子。先。生。不。屑。屑。也。舉。孝。廉。而。不。使。之。急。公。車。也。庭。訓。而。讀。等。身。之。書。第。進。士。而。不。使。之。僅。工。詞。館。也。庭。訓。而。

讀。經。濟。之。書。宰。雄。州。尹。赤。縣。而。不。使。之。僅。通。一。邑。之。治。譜。也。庭。訓。而。讀。天。下。利。弊。之。書。以。故。孟。昭。之。學。精。於。馬。鄭。孟。昭。之。才。通。於。班。揚。孟。昭。之。文。與。詩。也。富。於。韓。杜。孟。昭。之。以。德。與。威。惠。治。其。邑。也。趙。廣。漢。之。聰。明。張。京。兆。之。儒。雅。皆。有。之。矣。孟。昭。讀。書。於。清。平。山。之。日。良。士。弄。田。於。花。馬。塍。之。時。當。是。時。鄭。楊。董。展。顧。陸。張。吳。讀。其。書。五。經。三。史。也。韋。王。盧。駱。蘇。黃。米。蔡。讀。其。詩。評。其。書。三。唐。四。宋。也。踰。年。而。孟。昭。入。詞。館。宰。儀。徵。良。士。縱。遊。秦。晉。至。京。而。士。夫。藉。藉。述。孟。昭。之。治。儀。徵。者。縛。汚。赭。而。禽。縫。裾。斬。持。練。而。辨。烏。盜。感。以。孝。經。賜。之。畫。傳。邑。無。苦。水。地。成。好。溪。及。良。士。遊。其。境。文。章。訓。士。經。術。飭。治。劉。寬。之。處。士。諸。生。文。翁。之。學。官。祭。酒。莫。不。敬。以。神。君。呼。之。慈。母。先。日。登。宓。賤。之。堂。入。崔。儻。之。室。知。先。生。韋。氏。宗。會。之。法。延。之。庭。誥。之。文。張。融。門。律。穆。崇。家。箴。樊。重。之。子。孫。

若公家華歆之閨門如朝典胥在是也。而後知先生數十年之志不憚孟昭之不爲儒林不爲文苑而欲孟昭之必爲賢良必爲循吏也。蓋古有父隱而名盛子仕而名不噪者龐德公不仕而山民爲黃門管幼安不仕而子藐爲郎中宗少文不仕而子賓爲南郡韋道遙不仕而世康爲荆督先生之所厯厯也必也王祚家居而溥也趨侍陳省華家居而堯佐也側立則父子隱顯之盛名先生當之矣。先生以一縣者百城之表十道之率陶侃之八州荆州之十郡同是治也乘一丈車賜三神劍隱者爲四皓之功名顯者爲三楊之事業鐘鼎在家竹帛在史政事文章先生之遠大我孟昭者如此宏農君年次於先生十二歲昔者馮勤之母八十而與朝會張齊賢之母八十而受手詔顧雍迎母朝臣畢臻合肥迎母將吏羅拜使孟昭他日導母輿而大

常奏四部之樂執母轡而淄州迎數十里之郊則先生期頤掀髯所謂公著爲名相而子揚其父美敬夫爲大儒而子彰其父功者先生之迪遭艱難與福位名壽兩無憾歟良士聞之劉柳無稱於事業姚宋不見於文章今孟昭詩文集盛行大江南北此韋蘇州之焚香賦詩而民不忍欺白香山之家絃戶誦而吏牘一清視當日局促翰院焚宮香而讀麗正文章登落雁而攜驚人詩句者庶幾乎西南夷之弓衣皆梅都官詩吐谷渾之牀頭亦溫子昇集賦畫鶴之記遍於新羅子雲之書傳於百濟吾願孟昭宏揚先生之遠大不急以藝事爲三絕而卽以勲名爲四夔也孟昭性純孝故江以南能文者必以一文爲先生壽同載青山羞掩父德移書太常求顯父名古之志也今孟昭求增父秩古之孫逖也乞擬母封古之趙槩也若良士之不文亦思

序先生梗概曰此非歐陽氏畫錦之記實趙清獻瑞安戲綵之
堂也

重脩靈鷲寺啟

人天何幸中華畱靈鷲之山烟水無人彌勒坐毘盧之閣寺左先
有毘盧
一閣因基
占廟云將興大法以人傑者地靈要作道場必財多者工聚與迦
葉建五層之屋大石山穿爲長者造祇樹之林人牛金盡至若
盲人五百託榛樹而求家窮子三千投化城而覓宿是非九百
柱化天之殿道衆難居無一千年住法之人佛燈易滅矣蘇州
府治良隅靈鷲寺者蕭梁棟宇天監剎竿地非花氏之城名載
摩陀之國化龍影散佛樹枝枯以吳宮花草之墟畱沙劫沈灰
之屋久已鹿皮爛盡髮地無泥雞足山封龕門不禮者已嘉慶
三年有住僧僧綱某某者大牀口坐窟室滯居陽脩梵網之經

陰。構。摩。登。之。室。私。呼。梵。嫂。明。犯。燈。光。亦。師。羅。什。大。吞。御。婦。之。針。
敢。學。文。殊。竟。擁。同。牀。之。女。半。千。年。佛。姨。壞。法。大。可。傷。心。五。百。衆。
甄。女。失。通。居。然。未。劫。以。致。雷。音。天。鼓。神。走。伽。藍。接。手。抱。腰。宛。呼。
佛。眷。宰。官。潛。其。故。宮。桓。因。呵。爲。鬼。住。幸。而。法。無。淨。穢。地。有。衰。興。
不。倒。魔。天。之。殿。難。開。戰。勝。之。堂。勿。夷。惡。鳥。之。林。難。種。鳩。羅。之。樹。
茲。有。漏。盡。禪。那。天。台。大。德。某。者。內。脩。白。業。外。覽。玄。文。讀。豐。干。樓。
上。之。經。望。天。姥。峯。頭。之。月。草。屨。踏。遍。依。普。賢。行。願。而。來。拄。杖。擔。
存。託。居。士。草。庵。而。住。以。乾。隆。年。月。寓。於。蘇。州。也。鐵。圍。海。裏。小。結。
維。摩。手。版。之。居。蟻。子。宮。中。大。書。彌。勒。遮。那。之。字。彭居士爲覓寺左
小庵署曰毘盧而且
開。道。場。以。甘。露。表。淨。刹。以。金。剛。止。觀。雙。脩。六。時。禪。定。機。緣。四。衆。
五。體。和。南。加。以。須。達。長。貧。散。陀。不。富。廉。留。賈。客。之。金。儉。餉。貧。婆。
之。米。示。病。不。肥。嗌。麻。長。瘦。如。斯。人。者。或。亦。梵。門。之。龍。象。釋。氏。之。

笙簧者歟蘇州百族蠶居五民魚聚笙歌七里色宮欲界之天
士女千年極樂彌陀之國亦有鞞藍大富象馬施金亦有糞窟
奇貧嬰甌供米或洗僧浴佛温室求男或敬塤懸鈴金錢祝子
且或香燒象藏花獻波羅媚佛燃燈懸幡續命如是小緣咸希
微福至於蓮宮既廢大利乃荒鹿苑盪爲屠場蘇州北寺今爲殺人場
如來沒後八十年祇園

亦改爲西園蘇之最大刹也雞園改爲茶市今爲茶場穢雜之地地雄九縣竟乏叢林寺曰四

禪吳中叢林最古者南禪
北禪東西禪也今盡廢不開鐘版以致行腳打包之衆過午無餐螺

蝨蚌蛤之僧沿街索睡豈徒分衣迦葉借宿桑中托鉢阿難誤
投媯室俗不施檀地無分衛良可歎也近惟長元吳三方僧衆

門稱應付未習四檀八教之儀官有僧綱不明十誦五分之律
或家居火宅神通則唾婦藏壺或身處魔宮法力則燒豬喫酒
其或搖鈴鼓鈸日諷彌陀般若之經讚唄揚聲夜譚噉口瑜伽

之印。甚至驢唇鎖鐵狗脚關釘身燒釋迦之燈香薰藥王之臂。而且獼猴作帝亦坐師牀狐狸偷涎竟操塵尾自號大僧難爲長老此輩魔民勿化必有因緣鬼趣難降須求賢聖所以虎山頑石生公到而低頭天台山神智者來而匿迹聖教如燈邪宗似海無關末法是仗導師此易俗移風宰官居士之所望於禪德者也某官等以十一月十有三日送師主席山門離垢棟宇發光槃特埽塵金剛淨糞目覩蜂房九曲尙是污宮蟻戶百門都非淨土緣是摧枯拉朽芟其穰藿正位辨方夷其堂坵以爲宏茲蘭若必建廣堂大此招提必興傑閣夫禪堂嚴密乃結冬選佛之場講堂寬間乃解夏談經之地瞿利帝三千食指則齋堂必有法同應供之厨善知識五十來參則客堂必須八萬四千之座乃若圓通示應開闡思一法之門則大悲閣在所建也

唐梵同函貯滿半三乘之典則藏經閣在所興也如是棟梁皆資土木夫化人宮宇匪偃師幻術可成天釋殿堂豈毘首妄心能造須彌山青鴛一墅亦用人功阿育王梵宇千間全憑國富則可知羯磨大斧勢不斲龍宮霜霰爲樓舍利長繩必不界蜃氣青紅爲屋某等因緣作雨解脫爲風誦福田一卷之經結香火萬年之社仗此身心布施同撐般若之船從茲利益人天共種菩提之樹讀洛陽伽藍之記草蔓煙荒撰北天精舍之圖高竿大刹用布長牋敢申小啟署多寶如來之號大士和南書好施太子之名龍王合掌

為師禹門刺史送琴師張燮堂道士入東磊山序

入懸雷之山者聽靈鳥以為箭韶說南斗之經者坐玉牀而踞
洞穴自輔漢著書而後鶴鳴山深想道陵冲舉以來雲臺峯近

道陵與夫人雍氏於雲臺山白日昇天見仙鑑

餐霞屑粒代乏松喬煮石蒸丹世無彭朔則何羨

乎陟山采藥泛海求師者之勤勤問津也予泣海州之明年尸

臯徒懲獷俗民稍安矣而雲臺懸海外枝峯蔓壑側碧斜青東

磊者又僻於清風之左麓延福之下方其羽流或太古衣冠或


空山鍾枝分門則別其子孫析地則私其農畝紫宮佇月掌玉

殿而道紀無人茅齋授雲守化樂而洞天無主半千年末法之

道場非五百眾總持之正法也爰選名流與司香火非葛仙公

名聞東海抱朴難居非費長房朽索懸心山深莫住而金陵隱

仙庵主張燮堂者清淨為師太和為友委駕於無欲指歸於無



爲其安心若操縵其學道若彈琴子使以蔡氏之五弄入成連之三山則東嶽者安知非他日華陽之室金壇之庭乎夫髓靈鑿破力士開山水以龍靈地由人傑彈十二引水仙之操安八十調魚龍之變其佐我必堂希聲者於吏治不無小補歟琴不期於濫脇號鐘曲不必乎陽春白雪以和平爲寬猛之音以宮角爲相悅之樂庶幾葛天之八闋義樂之扶來乎至於夏竦仙骨而道流惜其墮落李泌仙樂而世俗潑以葑蕀僕亦將觸膏剔髓浣垢滌塵從先生於綠水青山爲風月主矣蕉堅之體而慕龍鳳之年朝菌之肥而求積朔之久知先生亦未必尹林之冲舉茅君之飛升耳釋名曰仙遷也遷入山也列子曰岱輿員嶠之山沈於大海則先生猶龍伯國之一人靈冥五百歲之春秋乎王平甫爲靈芝仙官石曼卿爲芙蓉城主僕主是州亦將

闕 俟見原稿再行補刻



